

重刻奚囊蠹餘序

太宰元洲張公弱冠通仕籍匝四  
十年始受

今皇特簡平生不亟其官而在所聲光  
則赫燁薄海內云公有詩文若干  
卷曰奚囊蠹餘一刻之蒼梧再刻  
之關中公故守廬江又守大名公



為大名時今廬郡太守元城吳君  
實出公門下厚被獎誨乃今接跡  
是邦邈風趾美且以廬民之思公  
深也為重刻之徵言於期期惟天  
之與人靳於兼也揚休鍾鼎者隕  
觚翰之聞而驚精藝苑者鈔旂常  
之樹於是立功立言者各以其所

長自奮於天下而不能相兼至以  
其所兼而顯名當世者不獨有其  
才又必有其度才與度合而後其  
兼為至也古夏禹姬旦措為弼亮  
大業赫赫軒天地而陳謨繫辭其  
文可敝窮壤即萬代稱兼者何以  
加焉然而不矜不伐赤舄几几之



度渾浩如大瀛之浸所以合而濟  
其才者何盛也今之言兼者難至  
其才與度自相兼者尤難夫噴英  
揆藻性靈之緒也經經緯傳操行  
之餘也淺中狹識而窺言聖謨楮  
生風雅道之障也立言者其必有  
本哉公才情神解不追琢而章不

溟渤而潤其筮仕歷南北曹郎為  
郡者二為藩臬者七為邊鎮撫督  
者六已又起家南臺晉大司空  
天子以公宿德重望特自留京

召秉鈞軸天下方樂公之用而惜其晚  
乃公之冲襟逸抱則固逡巡退讓  
于其間絕不以世之淹速融顯易



其慮也此其中蓋庶幾與夏禹姬  
且同量為能度與才合而澤於文  
固宜其粹然淵然神詣作者之域  
歟若公者蓋所謂兼之至者非邪  
雖然言之多也天地運數關之故  
潤乎至色大圭也泊乎至味大羹  
也古盛世之所謂真詩真文者也

今天下結軌橫鶩著作之庭者不  
少然亦有謂其圭而理紊羹而味  
腐寢以不古者則其於天地運數  
為何如公今操

天子鑪錘之柄以鉤鑄萬類化鈞在握  
其將還天下以大圭大羹之風而  
益昌於文乎嗟其幸有公之粹然



淵然者在也期於公為後進生聯  
邑里而吳又同年敢忘其汙而敬  
為之序

萬曆甲戌春三月吉

賜進士及第承德郎左春坊左中允兼  
翰林院編修前兩京國子司業翰  
林修撰纂修

實錄

經筵講官烏程范應期頓首謹撰



奚囊蠹餘詩序

元洲張公殖學邃中敷華楹實悠然自得之意時形於詩篇什旣衍日星斯爛即所韞奚囊蠹餘若有觀其深云初予之釋褐也聞公在秋冬二曹即咸以文學飭吏治而庶績興焉已而出守廬江補大名中正涖民去後



見思至為立祠蓋得公於政事間矣  
繼遷藩臬留鎮關陝委蛇棘寺經理  
漕河居貞履順始終以之境有變遷  
而處之如一蓋得公於行誼間矣道  
成而隆望積而章簡在

帝心節鉞斯授威稜贍乎二粵元元之  
民罔不胥匡以生蓋得公於德業間

矣聞公之風仰其盛而未接其儀刑  
邇以被

命南來幸得謁公大叅莊石坡君復教  
以公詩而屬予序之予俯而讀仰而  
思諷詠竟月若有得公之為心者語  
曰詩可以觀若是者非耶今夫情本  
乎中理非自外代而有作其誰曰不



然竊謂風雅未興之前未嘗無詩世  
不以詩而名也風雅既亡之後未嘗  
無詩詩不以世而晦也天地之道運  
而為元化散而為元殼其在於人也  
感物而動不得已而為言苟有見乎  
吾之為詩也即吾之為言也則元聲  
無盡藏而詩之道昭焉矣以是而論

公所造述其大較不可睹耶蓋公博  
稽群典統宗六籍取裁上世叅訂近  
體而會之吾心故恬適足以發性靈  
酬贈足以昭嘉淑登臨足以舒襟度  
題詠足以暢物情出乎筆墨蹊徑之  
外而裊然成一家言豈不韙哉明月  
之珠夜光之璧海內咸願見焉而公



之自序且欲內之囊中是豈得而終  
閉也哉行當以偉烈夙望晉而晝接  
於

朝則夫倡陳詩之義以鳴

國家之盛其不在茲乎以是知清風之  
誦不特見於周廷太和之音益並顯  
於

昭代者矣

隆慶戊辰季秋上澣之吉

賜進士出身

南京工部尚書柳州治生徐養正頓  
首拜撰



重刻奚囊蠹餘序

巡按陝西監察御史五雲蕭廩撰

奚囊蠹餘二十卷諸體詩若文各若干首今御史大夫元洲先生張公所著其曰奚囊蠹餘則公所自署也隆慶己巳刻于蒼梧凡二編又三年左使李君敏德與其僚又請於公會粹




增訂重刻于陝西之藩司刻成謁廩  
一言以為序廩聞古今藝林談藝者  
恒曰顓精若曰顓則精不顓則不精  
也然以今所睹記要亦有未可槩論  
者公所署奚囊事非李賀乎史稱賀  
每出游必以奚奴佩一囊自隨隨所  
得輒投其中歸而玄討冥搜不詣其

極不止顓何如也乃賀竟落魄不偶  
而評其藝者亦不以廁諸盛唐名家  
公甫冠輒仕仕為南北曹郎數屬  
國家大事兩守劇郡七更藩臬六涖臺  
省撫督所在樹立談勲業者推先焉  
計其蹇蹇當職若無一時暇逸得以  
覃思肆力馳驟於藝匠之林也乃今



盡讀諸刻非由拍擢而流自腎腸不  
為牛鬼蛇神而雍容乎冠冕佩玉未  
嘗覃思肆力馳驟於藝匠之林而馳  
驟藝林者雖覃思肆力或亦不易及  
也豈業有顛門亦有神解要在得其  
神解者而後臻其極摯已乎夫經世  
事物不與物而凝者神也涉世嬰物

與物而不凝者亦神也神凝則氣定  
氣定則事達而言且如之神弗與則  
氣索氣索則事格而言且如之是故  
與神其至而忘物累者其所繫至也  
余觀張公夙興夜寐竟日無一惰容  
飲人以醇而持已不爽其介事無劇  
易迎刃立解往往踟躕滿志而其屢





更頓躓而不以易慮滑和四十年通  
顯而未嘗一日忘其山林布衣之適  
則尤其心之超乎物累其神之凝其  
氣之凝然以定也夫其神凝而氣定  
故其亮工熙績而安民和衆通利夷  
難之業隨所試而輒成則其無待肆  
力覃思而臻藝林之極擊又何怪也

夫以藝林之極擊得其解者不必顯  
門而業顯門者不得其解則其竒譎  
苦澁顧為評藝者之所不取然則為  
彼乎為此乎談藝者誠當知所以求  
其極擊也而公之所為極擊豈曰奚  
囊且於異日旂常占之矣或曰公夙  
負竒稟未冠而古今載籍靡不弁苞



其家世為東南桂林淵源既遠而其  
出當

世皇朝禮樂明盛之會其所交游又盡  
一時文學之儒夫威鳳產於丹穴翔  
於高岡狎諸文鶴靈鷲共鳴於朝陽  
之候則其九苞五采燁然瑞世厥有  
以哉厥有以哉

隆慶六年四月朔日



刻元洲先生雜文序

今海內名公卿德業文章予知有古  
杭元洲張公義矣頃者公以少司馬  
兼中丞開府蒼梧兼節制西廣諸軍  
事而祐以職事承下風叅謔謀厥亦  
幸哉歲戊辰冬祐至蒼梧獲睹公奏  
疏及諸吟咏各一冊伏而讀之忠嘉



之猷大雅之什燦乎章矣顧論議叙  
述紀載諸體闕焉獨不備祐乃奏記  
公曰夫文猶樂也樂有一音不備不  
足為大成惟明公其終教之公自案  
牘間揭以示焉則近所製沖霄山記  
吳文惠公集序也祐拜手曰高山仰  
之景行嚮之殆謂是乎明日祐復進

曰夫管窺者未睹衆星之麗天飲河  
者不識分量之易足顧明公盡以所  
論著者惠多士公遜謝曰予平生隨  
事酬應具有述顧散失者多矣夫文  
亦奚必富篇什哉勿已則存諸篋中  
猶十之一二其惟是耶祐受而卒讀  
焉則嘆曰婉而章近而遠廣博而有



則泯泯乎文哉竊惟公之生也光嶽  
氣淳且當

中興之運際

聖作之期故其文渾成而不雜營達而  
有條其學以聖賢為本故其文出入  
六經而不詭于道平生樹氣節履清  
修不苟徇流俗故其文穆然凝然矩

矍森嚴雖善詆者無所投其間性樂  
善所交遊盡海內名士故其文如美  
玉然更琢磨而愈益溫潤識之者皆  
以為瑚璉之器性靈洞徹神思舒閑  
絕不以世之毀譽利害動其心故其  
文沛乎其順浩乎其不可禦不觀諸  
水乎其源涓涓而大不可極其出洋



洋而深不可測微而不可得托握也  
漸進而不可止息也與萬物資生與  
天地鴻洞而不自為德也夫水所以  
能成至文於天下者以其順無累也  
公嘗作文每出好事者快先得之寸  
楮片詞悉為時所珍視而公歆然不  
自以為多傳曰江海所以異百瀆者

以其能大受也其公之謂乎雖然善  
知公者真不特詞章間爾也夫文非  
組織之為工而用世之為貴公起進  
士為郎歷官藩臬臺省卿貳凡所經  
緯百度而潤飾治道者孰非文哉行  
且佐贊

天子明堂禮樂之治以化成邦國天下



文章孰大于是旣踰月集成蒼梧郡  
陸守一鵬以公奏疏及諸吟咏俱有  
序今是不可無一言也祐曰然祐之  
欲附驥久矣竊感王褒四子講德之  
義綴一言於末簡

隆慶三年正月吉旦廣西布政使司

右叅政昌江曹天祐頓首謹序

奚囊蠹餘自題

余奔走四方三十餘年每以一囊自隨凡得  
簡札詩帖及所裁荅漫興諸草亂內其間積  
久蠹蝕殘缺不可檢閱梧鎮兵戎之間命童  
子認余手筆取字畫稍全章句可讀者錄出  
成帙賦才本拙向為俗吏豈能脩詞發藻希  
爾雅溫厚之旨望風人堂奧之末哉感於物  
發於聲出諸性情不為湊釘掇拾襲故牘以  
飾鄙陋譬之貧窶之士布衣韋帶甕牖繩樞  
使人望而知其處約則固寒士面目四體無



急若假富勢冠裳甲第泰然示人以盈不知者亦必疑於心知之者將共掩其口彼其人宜何如愧且赧邪吾知免夫閱既迨爾掩卷題曰奚囊蠹餘仍令內諸囊中時  
隆慶戊辰夏六月望虎林張瀚識

奚囊蠹餘目錄

卷之一

賦

平山賦

上達樓賦

庭柏賦

擬士不遇賦

四言古詩

自慙詩

懷舊五首



卷之二

五言古詩

雜詩十首

渡江望金焦山

初夏入濟

七月十五夜泛湖揚丹泉同賦

贈別

與張子談玄

賦雲樹圖

酬鄧元學

泛湖風雨

次韻答陳玉泉

夏日雨霽過韋氏山莊得雨字

將往廬陽別省中諸同志

夏日鎮淮樓登眺和劉侍御作

沈生桂林生瓊楊生郇王生教以應試行

各贈四韻壯其志云

霄征

靈雪篇

淮揚道中



歸鶴篇

舟中紀夢

懷高光州

貞女篇

入天台境

尋源覽勝贈錢尹

濟川贈吳子

題月桂美人圖

宿天姥山房

送陳倅巡山順德

贈李會泉封君還蜀

古曠別業

卷之三

五言古詩

西嶽宋侍御同遊

自華山趨蒲城值雨停車待霽乃發

浴溫泉

關中十首

公署對雪

秋日關城登眺客有談王官龍門之勝者



漫興見意

酬王廷尉元家

寄和野翁睢州阻雨

悼亡四首

冬日西行偶述

贈傅右使近山

贈督府公

初冬江閣觀潮以到江吳地盡隔岸越山  
多分韻余得地山二字

題秋江獨釣圖

荆門道中避雨觀音巖下

與奚憲使學山話舊

自江津放船渝州投治平寺

五丁峽

寓賓康國詩

再入潼關

三月二日東園讌集

上巳景隆池讌集

省中會錢雷叅伯以別後相思復何益分  
韻余得相字



折楊柳

日晚署中言懷

送孟省長入賀 萬壽

飲何中丞荷亭分得夏荷二字

同憲使鑑川登終南普明寺

送孫學使轉官入蜀

公署登樓述懷

滄秀亭

賦得我愛夏日長

卷之四

七言古詩

結交行

石梁篇

送白德純之廣平

馬右俠索題紅梅圖

送晏東之還廬陽

夢椿贈王尹汝和

柳亭歌贈葉中翰

天雄陳倅話別

中秋李節推官舍對月時唐丞防秋易州



李倅捧表入 賀朱倅擁兵邯鄲余子懷  
還浙大比慨然有懷各賦月字  
雪夜東王省即蔭伯

贈別陳友琴大本

闔草圖

江淮道中

漕河水

七月既望省長朱鳴霄讌集王氏第即席賦此

乙巳夏六月苦旱禱祀良久一夕獲大雨

喜而有述

蒲石

明言

暗言

登金山

春鶯歌戲東清七弟

春歸詞

驪山溫泉

種竹

閔中送孔左使之河南





江南行

出京贈陶使君

送斬左使奏績

贈田憲使夢鶴

卷之五

五言律詩

入京早朝

早春慈恩寺同年會宴座主值雪

早春東白石

聖駕謁陵還宮

南樓

和王舍人初寒秉燭集

送高文中還武林

送王廷尉元案

登雨花臺

中秋前夕泛月同周省長

龍江泛舟投弘濟寺

宿曹繩之官舍

秋野

聞歌



有所思

龍江發舟將入楚

登靈隱山和楊一汝承

日暮山行

題緣崖贈沈生

和康原中泛西湖晚登萬松山

碧溪

宿湖上

保所山登眺得峰字

晚登松臺

落星石

京師送呂鳳儀之金陵

春日南郊分得郊字

春日過姚令園

晚春真覺寺集

送友歸杭

題竹山

月湖

省中白雲樓晚眺和陳一羽伯

迎春和郭郡丞



半陽池

過萬家山訪王喬洞

巢縣道中

鳳陽恭謁 皇陵

途逢立秋

小憩香積寺

舒城遇雨

暮宿都管塘

壽春謝公祠

珍珠泉

題扇

挽葉南湖

張會稽邀飲星宿閣

玉泉亭上

明妃祠

題畫

吳門周臣作溪亭春曉圖景致幽曠筆法  
妍潤展玩殊愛之漫賦一律書盛子扇頭  
野閒隱居

湛泉贈詹廣文



過萬年寺值雨

水簾洞

過德純官舍

贈石梁琬上人

新昌道中

方塘圖贈虞士賢

卷之六

五言律詩

送高光州南歸

行縣十首用揚侍御韻

玉泉寺

歲暮玉局觀隨諸寅長同遊

見梅

覺林寺

送閩帥王君入賀 萬壽

捧表行經棧道

善繒事者作釣臺西湖海潮鴈蕩四圖皆

吾鄉佳景往時孫侍御斗城嘗招余入鴈

山未赴閩之感懷各系短章未致此意

武關懷古



草涼樓

扶風吟

題陳醫士長春圃

寄槐亭

呂克厚哀挽

贈趙州許判官

友泉

芊原別游許二省長

宿延祚寺

重經華陰

李千翔追送清源

函谷道中

老子故宅

許中翰別業彭給舍同遊

自華山移蓮花小池中花開對酒溲賦

織女詞

華陰行臺對月望西嶽作

和孫侍御臺端晚步

風夕感懷

立春

CENTRAL

國立中央圖書館

ROC

NATIONAL CENTRAL LIBRARY, TAIWAN, R.O.C.



答咎子學

登潼關山樓

守歲

元日

脩園會餞留別席上諸公

贈富陽桂令

孤山林處士

送王尉

巴東道中

夷陵渡江

野寺贈王生

偶過臬司學甫留酌

竹溪

金佛峽

問月亭

以詩代書謝四兄寄鏡時為周府教授  
次韻荅沈鴻臚

田節婦

贈馬隱君

公署新荷



歲晚七星巖能鏡湖中丞同遊四首

間報滂述二首

行經九里灣

送陳中丞

山莊即事

送狄閩師捧表行二首

新荷

贈趙奉新

題名賢冊

竹溪

曉齋

探梅

藩和柳文學枉過贈別

題鴈

烟水磯上作

送楊徵士之京

卷之七

五言排律

蟠龍洞

弘濟寺

國家圖書館 NATIONAL CENTRAL LIBRARY, TAIWAN, R.O.C.



燕子磯

有懷王徵君元宗

遊東山

登定州開元寺寶塔

張母挽詞

送張憲使之河南

送石右使之江西

哭六兒

贈別舅氏野翁

送使臣出海封琉球國王

題畫梅贈友

梧鎮閱武

夏日王凌二君招集湖南吟社

再賦得書字

弔阮中丞祠

瀛海篇

贈王醫士

世德覃恩

七言律詩

廷試即事



讀五倫書有述應制

日莫

新江閱戰艦

送蔣石菴司空

王廷尉擢少司徒贈別

省居

至日齋居

登報恩寺塔同馮應房呂鳳儀女治伯

湖上偶成

登飛來峯

丹陽道中

句容道中

西行次潘生

玄真觀蔭伯見過

送魏郡守致仕還山西

紫雲洞

贈王少府守泗州

冬日羽伯席上鏤銀杏作瓊梅花分韻得  
安字

一隅為張文憲作楚人也



天長道中

烏江謁霸王祠

早春郊行柬晏東之僚友

莫春高井晚行

疊前韻答吳參伯兼乞題卷

舟中感懷

晚投龍城寺

中秋值雨

遊蜀山同孫節推

高郵道中感懷

自盱眙山晚投火橋鎮

秋行懷郭黃州

卷之八

七言律詩

客瓜州江樓

登金山

答王元案

移山潭作

送程于民南還

白水公署



青柯坪

雲臺觀

荅彭隱君孔加

九日河中書院讌集

萬固寺

華州值雪

冬日登華山

莎蘿坪

潼關閱武

歲莫述懷

玉陽山房

玉女潭

眉山贈孫醫士

孫文揆同登越王臺

宜松

南明寺宋尹同遊

沈明府邀飲戒珠寺

秋夜子暘宅讌集得秋字

夜渡揚子江

蕙坡贈馬封君



九日邀仲良童侍御登濱武臺

九日偕僚友登上達樓作

孟憲使讌集紫陽山晚眺

巨石園亭讌集

贈馮憲使晉叔入楚得餘字

贈殷醫士冠帶

赴丁徵君招賦贈

丁孝芳宅讌集

送許叅伯赴京得遊字時予將入蜀

巴東見王叅伯題壁詩用韻寄懷

題像

表賀得與宴賞恭述

重經咸陽述懷

蜀府元旦

訪張中丞里第賦贈

秋夕獲麻公署書懷

聞義四兄分教松滋寄懷

何中丞荷亭

固原道中

大佛寺



和許使相祈穀陪祀值雪

淮陰荅鄧元學

大梁別張憲使

姑孰舟中

梧鎮寄謝周諫議

重過飛來寺二首

元宵觀燈分得東字

早春山樓社集分得青字

悼王思質

贈竹泉

立夏前一日晚山園亭燕集

送張倅

槐陰新霽分得遊字

送吳憲副兵備江右

贈醫士錢龍田

卷之九

五言絕句

剡溪曲

題畫

挽江處士



周墓六景為用之作

越臺春色

葉塢秋聲

高峯拱秀

雙石呈清

石膏斷雪

陳洞修真

日暮

題画

見歸鴈

植花

題画

宮詞

題画

田家嘆

題画

盛瑩八景為盛司徒作

鳳石朝陽

獅崖暮雪

古井甘泉



仙橋活水

虎跑靈跡

兔河風帆

萬家烟樹

九華雲峯

題画

山莊適意二首

卷之十

七言絕句

出塞十首

題画

華山逢道者

和茗山途中歌江南柳詞戲成口號

題画

雨夜

四時宮詞

九月梅花

湧興

兗州述懷

冬日東園讌集



宮詞

讀史雜詠十四首

待羽伯不至

渡濠梁有感

題清河傅氏民居

過歌風臺

望盱眙縣

朝楊郡丞

望真州

採蓮曲

午日餽諸生食

渡錢塘江

王母蔣氏哀詞

挽莫處士

徐邳道中

途中值雪

題林廣文卷

行經萬縣

昭君村

屈原祠



野馬荒

題松竹梅

獲嘉贈潘令

歸思

題畫

海上歌二首

贈沈封君

題樂所畫兩

小隱二首

芍藥花

李東升挽詞

咏香月樓二首

送馬生南遊二首

挽張九臯評事

仙妹詞二首

竹岩二首

卷之十一

序

贈竹川張先生序

贈沈少吳擢四川按察副使序



贈桐岡郭先生序

當陽簿謝若五十序

贈芹山陳先生序

壽外舅野亭翁六秩

同選錄後序

祝壽圖序

贈陳醫士序

刻野亭集序

贈閩帥東澣王君序

贈大中丞我渡陳公提督操江序

贈朱方岳肅菴進閩藩左轄序

贈邵侯吳菲菴擢江西按察副使序

贈饒郡丞張芝麓序

壽凌太安人八十序

卷之十二

序

贈金雙紅二守序

刻引川心秘序

刻瞿存參先生文集序

會泉雙壽序



吉郡丞十第五秩序

陳小石改官順德序

贈王省參致仕歸松江序

刻吳清惠公詩文序

贈涂郡侯心宇入 觀序

再贈郡守吳菲菴序

斲苓集序

贈朱宜人六秩序

卷之十三

記

泚亭橋記

石橋記

重建白雲茅屋記

四賢祠記

魚異記

省吾記

出師禦敵圖記

太尉楊公墓碑記

重修太平府知府端敏胡公祠堂記

冲霄山記

NATIONAL CENTRAL LIBRARY, TAIWAN, R.O.C.



卷之十四

雜著

貞女傳

跋畢子石祿命卷

跋唐居文遊卷

神龍

市虎

列祖像贊

王處士像贊

錢通政見幽像贊

野亭馬公小像贊

曹隱君像贊

白箴

養愚軒箴

盂銘

卷之十五

墓誌銘

江西南昌府通判野亭馬公墓志銘

朱近城墓志銘

陸靜泉墓志銘





顧玩川墓志銘

滑縣儒學教諭程君墓志銘

勅封孺人張氏墓志銘

鄭母吳氏墓志銘

廣東雷州府知府箕泉王公墓志銘

叅將明溪周君暨配謝氏合葬墓志銘

大理左評事少渠張公墓志銘

光州知州高穎湖墓志銘

封兵部武庫司主事東洲錢公墓志銘

胡貢士夫婦合葬墓志銘

居處士西隱暨朱氏合葬墓志銘

卷之十六

崔淑人李氏墓志銘

長姊鍾室張氏墓志銘

仲姊墓志銘

仲兄雙洲公墓志銘

明處士彬竺李君墓志銘

明文林郎廣西潯州府貴縣知縣羊村夏

公墓志銘

明杭州前衛中所正千戶陳簾泉墓志銘



明贈徵仕郎中書舍人玉泉林公暨配贈  
太孺人張氏合葬墓表

從弟太學生子益墓志銘

光祿監事風山兄暨配沈氏墓志銘

高室蔣氏墓志銘

沈母陸孺人墓志銘

卷之十七

行狀行畧

從兄東川公行狀

成都知府邵公行狀

唐府典儀正柴淳堃行狀  
高祖介然公行略  
大父質庵公行略  
先考亭山府君行略

卷之十八

祭文

祭包孝肅公

重瘞古塚

祭長姊

祭朱母



祭魏令孫允功

祭十二弟子德

祭顧方伯些賢

祭孫柳西

祭劉安人

祭張封君

祭蔣僉憲

祭周母

祭李封君

祭郭侍御

祭方室王孺人

祭郭封君

祭李封君

祭靳封君

祭周參將

卷之十九

書

寄沈廷尉

寄謝巡臺

寄劉侍御



寄韓司馬苑洛

寄翁冶山郡伯

寄張臨溪都臺

上督撫公

寄孫蜚川司寇

寄毛介川中丞

寄高南字司成

寄許茗山右使

寄王鑑川憲使

寄陸省郎小峰

卷之二十一

書

上內閣相公

寄孫侍御

寄楊中丞幼毅

寄冢宰嚴公

寄余德甫憲伯



寄郭一泉督府

寄郭東野閣老

寄冢宰揚公

卷之三 目錄終



國家圖書館, NATIONAL CENTRAL LIBRARY, TAIWAN, R.O.C.



國山書  
館印

奚囊蠹餘卷之一

賦

平山賦

覽群像於儀內兮獨神契乎茲山卑不可踰兮高  
匪危而可攀若踳躓以紆徐亦蜿蜒而迴還比衡  
斯懸兮若几斯安靡軋沕之荒忽奚鬱嶮之艱難  
頓闌闌于林麓仰穹窿於雲間既宣氣以誕秀仍  
居靜而體閑伊際天兮昆侖砥滄海兮蓬萊戴巨  
鰲以柱蒼昊兮渺靈域乎仙臺信泮泮以崔巍將  
目眩而神移夫焉藉以棲息徒延佇於無涯誠不



若茲山之夷曠兮亘中天若長陌彼坤何心兮衍  
爲丘陵唯仁能樂兮眷茲窳宅爾其覆五色之大  
雲啓蘿關於紫石長舒元亮之嘯徜徉靈運之屐  
觴飛洞庭之酒柯爛天台之奕飫神兮芝苓資身  
兮芋栗泉飛鳴兮雜鳥弄而爲音雲卷舒兮吐巒  
岫以逞色天桃燦兮春熙井梧墜兮秋瑟彼四序  
何推遷歷千齡猶一日不騫不崩匪徐匪疾鑒嗜  
險而蹈危祗樂易以取逸因自然以見性托幽貞  
以比質等萬感於均齊眇升沉於得失坦蕩蕩兮  
無偏終優游乎道術

上達樓賦

伊隆崇之飛閣奠畿輔之坤隅仰蛟螭于雕甍煥  
玄綠于層櫺榭栱壯其弘麗班輸殫其巧思眇龍  
攀其靡及肆繩趨而可踰試摳衣以循欄爰奮足  
而躡梯啓八窻之玲瓏倚曲檻而躊躕左爲魏郡  
雄鎮王都右通佛國紺殿浮屠百雉山峙於巍廓  
維億坻湧於豐庾群賢祠兮立準青衿育兮下帷  
問槐榆兮比屋蕩垣堰兮陂池爾其清衛帶淇黎  
而環繞濁漳入黃魏以洶涌蝦蟇崩決兮直下飲  
牛滉瀆兮流東太行萬壘接任浮之龍嵒高陽百



里走白馬以鬱蔥控堯冀兮納宇內分三晉兮來  
域中眺北闕兮雲擁焜日下兮雙龍俯南國兮櫛  
比靄烟際兮周墉古顛頊之開建兮姬康叔之侯  
封歷廢興之靡常兮紛創置之不同李唐魏博趙  
宋天雄金堤橫兮流水銅臺迴兮秋風牛羊放牧  
兮殘壘禾黍離披兮故宮爾其重扉晃朗四顧晶  
光摘星辰于杳眇兮羅幻象于混茫隘六合之九  
州兮小鳥兔之騰翔却坐塵於晝永兮結陰森之  
夏涼何地維之偏迴兮信天體之下降于時涼颼  
乍起寒蟬倦鳴黃雲帶沙塵之色朔鷹雜胡笳之

聲心煩憺兮月滿氣憤恨兮潦清思深兮王粲愁  
結兮張衡誕周宣之文教兮訝獫狁之內侵戒九  
邊之烽燧兮徵六郡之民兵村農賣牛以買劔學  
士投筆而請纓繫元元兮曷恃徒總總兮未寧覺  
憂增於遠覽又神竦乎高登爾乃愔然自釋浩然  
慨慷仰神禹之文德兮矧我武之惟揚申甫兮神  
降於維嶽赳赳兮羆虎之騰驤戢戈矛兮舞干羽  
走豺狼兮烹犬羊屈群策之多奇兮恃一人之有  
慶苟安攘之有賴兮余何為乎遑遑迺舒懷於寥  
闊兮思超忽於八荒眷義節之靡留兮崦嵫迫兮



斜陽申金蘭於三益兮要歲寒以相將托燕賞以  
消散兮胥浮遊以徜徉吹參差兮伐鼓按歛謳兮  
宮商莫宣情于柔翰聊寄意於兕觥

庭柏賦有序

獨處關河再經寒暑庭前四柏砌畔重陰  
退食之餘徘徊其下方春莫窺其生色入  
夏何有於潔齊當蓐收而不衰處玄冥以  
如故似君子之一致順應不遷協老氏之  
三全攝生尤要觸物有悟寓意於詞

偉閒庭之四象稟勁氣於五行敷雲葉以翳翳挺  
霜幹而錚錚俯而就之團藥兮飛蓋之影墜仰而  
望之龍蓂兮遠山之黛橫實垂垂兮孕秀華飄飄  
兮暗馨厭的爍之鬪彩守安靜以儲精未與宮閭  
之守兮秩秩聊遠斧斤之伐兮丁丁遷彼太谷賓  
我前楹選千樹於秦岳配二株於華林採摘兮效  
文賓之辟穀游息兮希赤湏之全真諒列仙非我  
徒願比德以淑身爾其青陽肇歲麗日鮮雲條風  
既達膏雨載零芬紅芳紫嫩綠柔青此方蒼蒼刺  
刺離離落落爭似龍池之柳離宮之柞已而金氣  
既騰商飈初過原隰蕭條歲聿其莫冰柯雪卉風



偃霜墮迺其矯矯穹穹鬱鬱蔥蔥何言蓬山之籀  
天陵之松辨脩短於異歲兮齊寒燠而同姿眇百  
感以無累兮越千禩而爲期暎杲杲兮翔林鳥夜  
皎皎兮挂驪珠撓颼颼兮激蒼龍之噴吼潤霖霖  
兮降翠鳳之葳蕤被巖穴兮亭亭自足登廊廟兮  
蹇蹇有餘不茹不吐匪䟽匪腴抗天德以肅肅順  
坤載而于于允矣百木之長卓哉大壯之需爾迺  
睇盼昕夕徙倚躊躇媿樸檉兮峭直又樗櫟兮迂  
愚思致用之非才竊感物而起予繫炎景之易邁  
慨秋風之旋移苟根柢之未固何枝葉之紛披試

擬士不遇賦

昔衡門之高蹈悵明盛之不逢踰垣迫以終匿閉  
戶聞其靡通髡首狂歌於衰鳳羸程混跡乎夷戎  
箕山穎水藉枕嗽以恬漠采薇茹秀並偃蹇以恢  
閔摠遺世以耽寂匪道大而莫容若迺鼎俎于商  
熊羆釣渭牛角商聲羊皮眇說湖城之三鱣不登



臨邛之駟馬未遂雖小畜而大亨終乘機以邁會  
方豹隱龍屈乍失勢而憂違已颺舉雲蒸率羽翔  
與鱗沛曾憤懣之幾何紛崢嶸以滲漚豈若洙泗  
之徒游夏之侶耻自比兮仲嬰竊夢寐兮臯禹旣  
際世兮虞唐亦致身兮青紫祗怵惕兮凌兢每紛  
輪兮鉏鋤塊扈蕙以紉蘭兮等芬芳於猶薰更駕  
騏以驟驥兮厭駑鈍之伶仃豨膏棘軸兮運方穿  
以砰磕紈素鮮潔兮值秋風之淒清挾墳典之策  
兮躑躅羸秦之肆工雲和之瑟兮於邑齊王之庭  
方茂齡志闊達兮薄驕揚不可任逮垂晚習愿謹

兮憎媮謾無脩能淬太阿以操百鍊兮使割雞於  
武城飾俎豆以脩五禮兮庸克詰乎戎兵廣出塞  
胡弗獲兮唐易邁而無成均內美招叢嫉兮誼達  
體而見傾前曳後掣進尺退咫方藉譽聞忽罹訕  
訾窮智殫力比於嵒窳瑰瑋卓犖命之譎異馬牛  
任其呼嘲涇渭無分渾泚何周流以盤桓恒故罔  
以謬戾傷烏驚棲莫知所止神龍泥塗畏彼穴螳  
已焉哉不見知以無悶君子之貞也不背世以滅  
勳人臣之經也砥節礪行匪獵榮也據德游藝耻  
自鳴也疾尼如虎無加于聖妒夷為跖不減于清



也敦素履兮自適樂天命兮奚疑眇富貴兮非願  
俟功烈兮何期寧循繩兮守墨堅夙志兮桑榆豈  
蒼蒼兮昭明竟遺鑒兮悃愚

四言古詩

自慙詩有序

余生眇小性復迂踈非高爵重祿之器命  
既蹇薄又嗜恬淡無輕裘肥馬之需四任  
散郎服役已越九年兩典鉅郡薦章奚啻  
十上始叨司憲遞轉叅藩何意招釁秦關  
竟以左官蜀國非辜莫省欲信翻疑寧敢

他尤聊因自慙云爾

眇余謏劣夙慙偉竒中無多畜外鮮師資寧堪振  
奮而耻詭隨譬彼兒稚佩鞮與觸亦若駑駘踵武  
駟驪能不我甲奔益見疲天罔遺物登我亨達一  
試水僚三歷雲司淮淝閔旱澶淵戒師抱關嶠函  
東粵保釐方冰若履比盈在持有碑載口式祝用  
尸余曰奚勞民謂去思豈其隱隙當彼路岐萋斐  
具錦懔懔詬訾辱身褫級遠役西陲岷峨合沓山  
何險巇旋渦迅驚川何渺瀰長安天際故國海涯  
纖纖夜月九見成規熠熠春葩夏葉垂枝嗟嗟勞



人憂心如馳翳翳浮雲蒼蒼靡虧尺蠖龍蛇屈信  
有時庶乎知命勉旃勿疑

西曹舊游別來歲久不徒契濶興思間有隔  
世之感矣作懷舊各一章

沈憲伯子由

往偕文始適子之館蓬海越臺冲虛消散祿石二  
千布衣三澣黃金然諾白頭惘款既遂歸心空山  
習懶丹經几清金膏竈煖衆妙克臻萬慮咸坦猶  
懷友生塵緣未斷

陳少叅羽伯

唐文始變伯玉爲宗綿延我友克紹芳風鍾靈於  
越振譽江東宛地遺編盡省詞雄負俗寡偶道人  
莫容坎廩二紀藩屏西戎垂晚嘿嘿殷憂冲冲北  
幽蹟什長恨何窮

朱省郎汝一

雲閣委蛇法比參伍文旣相觀仁亦資輔洵美君  
予不茹不吐謹行脩詞薄視錦組信而見疑逢彼  
恚怒方福歸吳爲原沉楚淒其以風濛濛宵雨魂  
兮不來使我心苦

孫憲伯文撰



蕩漾方舟駕言適越極目蓬萊窮探禹穴石梁虹  
飛瀑布龍窰赤城食霞剡溪弄月嘯振青林歌饒  
白雪雙劍入秦遵彼艷琬明哲知幾榮名蹤脫山  
僧不來嗣音遼絕

吳中丞峻伯

中丞魁瑰淵源家學搗詞灑翰川雲磅礴蚤契聖  
股雅擅述作雲司法比東方木鐸藩垣總憲數試  
盤錯授節貴陽遐荒經略屈指升沉同歆萃拔遠  
慰渴饑忻忻勳伐

六隱詩有序

明聖兩湖中隱者六人焉皆明哲理道雅  
善著作間入余社同游賦詩一二不能致  
若冥鴻高舉何可強也私心均嚮慕焉想  
象其人各賦短篇

沈青門懋學

翩翩公子東髮遊氣凌五岳形隘九州金玉塵  
士冠裳贅疣胸中丘壑雲湧川流隱侯聲律松雪  
勁適一縑三絕洵美寡儔

李岫巖彥明

鷲嶺迢遙西磻清冷傾崖屢攀飛梁再經松篁爲



籬猿鶴在扁亭非鑿沼砥乃宜亭偈傳白馬訣受  
黃庭視彼綴詞滄溟泐澗

莫寒泉元誠

音出成文理本自然上乘既邈溺聲聞禪疇能頓  
悟不落言筌刮滌塵空索隱鈎玄既違俗習亦復  
蕃鮮豈其好事提懷槩鉛

劉望洋安國

昔稱文學蔚焉東平我友嗣興夙擅徽名探竒擷  
秀克諧性清解脫塵網麗澤豪英日研月綺垂老  
彌精豐腴自厭外視何輕

張少岳仁甫

巖巖靈峯遠宗天目羅列蒼翠侵雲孤矗秀挺斯  
傑龍宮踰伏緣山之隈臨流之澳載嘯載歌響應  
林木白眼世人生憎車服

沈蓮池涵叔

南湖崛起名齊二陸伯既鳳舉仲乃龍伏身遠芳  
華文謝金牖屏息去慧自同豕鹿鏡裏萬緣桑下  
一宿五蘊皆空本來面目



皇朝書目餘卷之一



國家圖書館, NATIONAL CENTRAL LIBRARY, TAIWAN, R.O.C.



奚囊蠹餘卷之二

五言古詩

雜詩

王胥習格熊黃公善厭虎血氣一時衰終爲黠獸  
苦安身貴明哲鷲猛奚足數魯縞本非堅猶能勝  
強弩金刀聊割鮮髓髀不如斧知雄守其雌深箴  
是良賈

鴈以善鳴生樹由擁腫全才與不才異何能兩相  
牽志道守不易尚通情屢遷時命苟有合蟠曲爲  
柝捲無因遇明盛鸞鳳遇鷹鷂行箴信非我冥默



持玄玄

燕人有流言季子飽馱馱中山亦積毀夜光投白  
圭和德氣融結上焉薄雲霓下以固金石多口何  
能睽周行本恢廓谿徑空見擠寄謝讒諛人循環  
理亦齊

湛湛方塘水洶洶接溪流榆柳交層陰鳥雀鳴相  
求徙倚曲欄上爽氣生清秋俯視形將影邈焉懷  
好仇晨風正南翔尺素不得脩馳神附雲翼及爾  
鳳池遊

草枯山坡平秋登雉兔肥馳馬攬繁弱無俟遠合

一發殪霜毫再發墜雙飛舉火聊炙鮮村酌力  
不微但令快意氣奚惜兩忘歸凌厲諸豪俠顧盼  
增光輝

大塊勞我生眇焉一暫寓朝華夕零落日晞夜  
露和轡弛不返百歲僅旦暮胡然大夢中知寐乃  
致寤爆爆困行役升沉易喜怒操舟泛洪濤身險  
情逾怖何如遵坦途悠悠縱高步

休沐委簿領消散恣神娛游睎夏木陰悠然自成  
趣下枝虬龍盤上枝丹榮吐嚶嚶鳴文禽參差復  
迴屢獨鶴唳庭除徘徊不忍顧豈無霄漢心于焉



振其羽

丹山下威鳳鳴臬或見螭螻遇神龍矍踴恣毀  
夷驅驥入牛阜芻秣氣詎移姬旦蒙流言處聖不  
兔疑超然覽玄始矢心三無私

腹育生枯株脫殼爲玄蟬本與稿壤俱一朝憑化  
遷吐納月露中擲木風雨前微形竊伏匿何意聲  
日宣螳螂枉見撲稟質非甘鮮

青銅百煉餘範出菱花鏡燦燦金薄光盈盈水心  
淨不獨辨妍媸亦照心邪正塵埃一蔽虧玉壺無  
掩映何當拂羅袖常明本來性

渡江望金焦山

解纜發江南掛帆遵遠道微風泝層波凝矚見二  
島潮從海口未驚濤簸天藻晴雨撼蛟螭流沙沃  
樹草飛閣罩雙峰金刹麗三寶神鰲秉坤軸浮玉  
架蒼昊回巖本西亘狂瀾障東倒延佇欲凌空飄  
飄爽余抱

初夏入濟

我昔駕征航芳華媚初景淺綠曳垂楊輕紅發朱  
杏忽焉幾千里始涉齊魯境春風度去陌夏雲薄  
前嶺花落樹陰繁鶯鳴晝逾永戀士厭薄遊懷人



復心耿天闕五雲中蓬窻日延頸

七月十五夜泛湖楊舟泉同賦

西風逐炎埃零雨生新秋煩襟久沉鬱良朋結清  
遊薄暮枉輶車花港遵蘭舟涼月忽澄景波落珠  
光流幽林有驚鵲平沙亦翔鷗金荷漾遠浦明滅  
互沉浮飛觴無留飲雅歌旋相酬物外信昭曠明  
發成淹留

贈別

駕檝將何適把袂亦斯須銷魂惟惜別况乃別心  
知夙有冰雪操久瞻金玉儀陟遠自雍秦使節照

江湄舳艫通萬里惠澤浩無涯不逐時人好雅與  
福性宜西湖山水間登覽頻招攜春風桃柳穠秋  
水芙蓉姿從茲渺焉隔良晤不可期長安見花發  
千里勞相思

與張子談玄

夙尚規中理晚晤守玄人玉簡非真訣金符亦漫  
陳弱水着逾渺三山空嶙峋入海勞方士嗟嗟漢  
與秦留侯從赤松聊以托隱淪一聞上乘言萬化  
通元神弱水自可筏殮桃信有因重離逢習坎虛  
實隨屈伸九還成一粒形外無足珍二五陶鎔物



逍遙宇宙身俛仰廖廓間翱翔極無垠

賦雲樹圖

山陰雪夜舟中散駕千里昔賢信高曠遺形若敝  
蹤同心眇不作三鬣風日靡曾是合歡者等瑟調  
宮徵相逢故復新誰云遠猶邇浙水通閩江多情  
念之子夙以金蘭姿共結雲霞軌躡阜春樹繁瀕  
流暮雲起因之寄所思瑤函以雙鯉

酬鄧元學

嗟余夙謫戾迪德慙前脩經籍寡論討金蘭失其  
儔徒然鷓鴣質邈企鴻鵠遊伊人振清藻含芳誕

徽猷冰玉君子儀忼慨廊廟憂晤言已神契重茲  
瑤華投伯琴愧知音郢曲難為酬中情一以洽願  
言永綢繆申章在敦義道遠相為謀

泛湖風雨

東風蕩湖水白浪湧金沙巖巒互隱見林樹忽傾  
斜寶塔倚天末虹橋雲半遮頓失艤舟處回望城  
郭遐舟師力不任隨流泛無涯平生萍梗跡只尺  
千里賒經綸在四方嗤彼繫匏瓜但令遠塵俗何  
地非吾家

次韻答陳玉泉



夙齡愛丘壑雅志深巖棲偶逐青雲出遂與故山  
違富貴非我有衣馬慙輕肥十年守郎署三尺欽  
皇威堯天溢惠露草莽霑春暉省躬靡一善荷子  
忘百非眷彼萬里翼終奮鷗鵬飛伊余江海心時  
懷鷗鷺磯長鳴顧儔侶翺翔力益微枳棘既已安  
卑棲甘世譏側聞昭曠音清風振塵衣連章不可  
繼調絕和人稀

夏日雨霽過韋氏山莊得雨字

朝曦盪餘靄原隰滋  
無無結客竦輕轡駢筵駐深  
塢白楊敷層陰綠蔭被長浦  
遠影出岫雲新香濯  
枝雨靈石交名花的皪媚簷宇游鱗與飛翰參差  
相狎侮人同集金谷地擬臨玄圃清醞湛飛觴懸  
河落談麈林風披素襟紅塵避錦組日晚忘歸途  
適性即吾土

將往廬陽別省中諸同志

朝辭丹鳳闕夕駕青雀航我往豈不遑躊躇苟所  
望眷彼二三子燦燦珪與璋休德溢膏潤興言吐  
蘭芬芳潤藉自飾永懷不可忘  
忘形恣歡洽所貴心相知不聞昔人言對面生九  
疑白首猶按劔結綬終睽攜永言鑒前轍同德爲



師資瞻彼清秋月千里見情私

私心戀京洛君亦念遠征我守一郡牧君刑天下  
平林莽棲鷓鴣上苑集鳴鶯嬰組恪脩程聯琚翊  
盛明踈戚任所處去任非殊情

情深願易違會促離苦多秋風折高柳霖潦瀰江  
河行矣各自勵乘時莫蹉跎漢世重循良

明廷殿催科何當報知己民物阜且和

夏日鎮淮樓登眺和劉侍御作

仲夏景氣佳憑虛一延睇飛閣亘中天幽遐紛無  
際蜀山鎮坤隅南巢旋溶滴崇岡出斗躔淮淝淼

東逝川原界吳楚聲教雜荆衛峻堞何逶迤井邑  
煙火翳駢闐集四方帆鼓互飄輦沃土夙宜稼雲  
疇靡留藝崔巍較弩臺遺墟敞初地散兵亦有灣  
喟焉感興替解愠招遠風怡顏值新霽心慙竹使  
符適因眇塵世

沈生桂林生瓊揚生郇王生教以應試行各  
贈四韻杜其志云

南州有桂樹托根在巖壑陰陽儲其精日月相迴  
薄天邊挺雲幹燦爛敷卅萼採之及清爍竒芬月  
中落



林生真瓊瑤瑤殊卓犖燦彼珪璋姿明瑩不加  
琢太潔易成汚至道闇以遵行矣薦清廟慎哉守  
其璞

談經揚子雲秉心淵以粹說詩解人顧稿文同舍  
避久戢霄漢羽雅有鴻鵠志無嗟日月逝歲晚成  
大器

我愛文中子沈默本天賦尚書探聖猷不襲漢儒  
誤真心在羲皇希聲等韶護登崇及昌期餞子青  
雲路

宵征

肅肅戒宵征駕言返我疆遵彼淮與泗河山阻且  
長盱嶺盤巖嶇沿流以徜徉虛邑指招信帝里踰  
明光盈盈照寒月皚皚飛清霜攬衣落木下膏車  
古道傍孤鵠摩蒼天野田鳧鴈翔俯仰何遼邈所  
志各一方夜央不遑息我馬玄以黃慚彼秣中廐  
何如御驩驩駑力豈不騁聊以及周行

靈雪篇

大化度群生陰陽禪相司闔闢調四氣品物蕃以  
熙旃蒙大荒落仍饑下民咨玄冬屆臘月恒暘失  
常期三農望欲絕百卉不得滋眇余廩恫鰥懼懼



省所私矢我髦若索彼神與祇鬱結上冲霄散  
爲雲彌彌俄而微霰零隨風舞離披白渠啓瑤甸  
玉宇標瓊枝萬有一何夥混然皓無涯消螻逐沴  
癘豐亨兆於斯因之悟往訓居高而聽卑頽仰喜  
懼并永言慎所綏

淮揚道中

我行無幾何炎景忽載涼一驅環滁間再涉泗水  
湯醮彼淮之陰輕風泛孤航帆檣帶暮雨雲飄度  
維揚去留不自意心跡成兩忘居人悠悠爾祗役  
奚遑遑昔云丈夫志桑蓬在四方墨突不待黔周  
流聖所臧勞生誠順適勉旃娛景光

歸鶴篇

皎皎雲間鶴不受氛塵侵幽人一以贈馴爲階下  
禽春風舞翩翩秋月唳清音瘦影愧爾似野性偕  
余忱經年托儔侶欲別意難任念非夙所隨還歸  
嘉樹陰客旣眷故鄉鳥亦適故林去矣物無累懷  
哉誼已深願比雲霄翼常同萬里心

舟中紀夢

丙午秋正中癸卯日之暮舟橫江浦橋浴迴以東  
鷺澄心靡所思清夢恍神遇遂有三達人邀我青



雲路華裾珮鏗鏘承明趣共赴金殿九重開天香  
散紫霧瑤階降至尊怡顏親寵顧忽若宣余言直  
指披衷素情通願不違魚水欣相附大賚隕自天  
玉爵金莖露至寶出上方靈液瀉玄圃河飲較量  
狹持盈將自喻再拜捧歸廬相看驕且懼數聲江  
鶴鳴子夜蓬窻寤起視月當空銀河一槎渡

懷高光州

憶昔送高適沽酒長安市相思何處邊燕山與湘  
水萍蓬互飄忽三秋阻雙鯉猶聞多苦辛兵戈日  
填委角聲淒斷雲蠻煙蔽殘壘余亦淹簿領萬里

同延企頃傳天上音知是賢聲起五載花封郎超  
遷漢刺史中州本名都習俗信淳美江漢及汝瀆  
均爲聖化被地異民不殊心平政自理願言崇令  
圖仁明表終始努力夙所期休戚互相倚

貞女篇

南國有貞女粲粲冰雪姿展如邦之媛膏沐不屑  
施幽蘭擷文佩蓮葉紉素衣耻言求庶士深閨潛  
自疑媿彼桃李顏嗟此日月馳春風上柳色水荇  
亦參差轉盼忽異態標梅辭故枝頃筐堅其實能  
不生酸悲誰無室家願我命合歸遲



入天台境

仙邑閎精爽巖壑信幽巖一望赤城霞遂與人境  
絕靈石羅萬象礪底流泉咽猿樹靄蒼蒼鳥道經  
百折仰瞻星漢垂側駭蛟龍穴是時春欲徂景物  
正齊潔木秀芝亦肥雨餘芬可啜身躡劉阮途心  
叅茅氏訣登頓豈不險玄襟自娛悅

尋源覽勝贈錢尹

王孫三山來云出勳貴里高標信自別柔翰亦何  
綺雙躋天目峯直遡茗溪水討跡桑梓間遊心烟  
霞裏醉著漉酒巾吟振飛雲履尚想方外仙風塵

久脫屣

濟川贈吳子

川源浩無極茫茫接滄瀛日月互吞吐出沒鯢將  
鯨天吳吹浪花秋濤撼雷鳴長年避不發漁叢亦  
屏營何人理方舟揚帆迅孤征衣袂夙有戒濟險  
良匪輕中流一鼓柁萬里期澄清

題月桂美人圖

朱顏何燁燁腕弱倚芳樹華裾飄彩雲玄鬢凝香  
霧虛疑洛川神謾想巫山遇應竊長生丹飛伴輪  
中兔



宿天姥山房

朝躋千仞峯暮向峯頭宿仰睇猶萬重翻疑在山  
麓夜靜聞猿猱庭空走麋鹿纖月掛孤松飛瀑下  
深竹中天一燈明鍾梵出層谷飄飄凌雲霞頓覺  
清心目明發攀崎嶇九仙相追逐隨地飯黃精遠  
碎人間穀

送陳倅巡山順德

歲晚北風寒郊原饒積雪砂白路漫漫于焉送君  
別平生報國心文雄武允烈每憤犬羊群奔騰未  
卽滅胸臆數萬兵手提三尺鐵慨慷發邢臺西望

何崑嶸重鎮接三關十隘紛九折雲屯六郡樹人  
和地險設旅振宣皇威天驕避漢節折衝尊俎間  
萬里烽煙絕

贈李會泉封君還蜀

西蜀猶龍翁入關輕萬里經秦復踰魏戾止漳之  
溪吊古迴銷憂觀風色靡喜官舍澹無營怡怡適  
倫理天雄股肱郡仙郎司法比甘棠陰正繁芳風  
颯然起組綬舞衣鮮鼎俎榮祿侈兩載樂委蛇一  
朝憶桑梓相送臨河梁離端自茲始

其二



始離一水間遙望萬里橋悠悠蜀道難旦晚馳星  
軺新霜落木初南征鴈嘹嘹豈不厭行役到處成  
遊遨清齋會泉上山靈時見招猿鶴苟無怨松菊  
亦未凋峽雲涼可攬江月紛相邀但飲郢筒酒而  
斲黃精苗鳳誥一何煒遮莫來丹霄

其三

丹霄接畿甸榮祿何煒煌甲第擁輪蹄信美非我  
鄉懷哉天彭居峽險江流長危棧飛鳥道曲坂盤  
羊腸微茫在天際寤寐勞相望親戚悅情話畎畝  
便稻粱賣卜身可資守玄道所臧浣花丹景下濯

錦青城傍逍遙快意志遊子任翱翔

其四

翱翔遊子心豈不眷恃怙經營在四方王事正靡  
盥盟鷗一以狎萊雛不得舞行矣戀滄洲懸思陟  
岷岵烟霜薄遠林涼風淨秋宇日晚急驪歌把袂  
清漳潞故鄉亦云邁自昔稱天府岷峨有遺傳仙  
人號彭祖咲傲洞天幽遐齡不可數

古曠別業

在昔遼金時芳林駐飛輦繁華一朝歇郊圻自平  
町高士梁園歸名勝此中選朝市夢已非萊蕪手



親剪黃花近籬栽綠疇當戶衍丹竈藥丸還東華  
經一卷翻嫌長者車驚起村莊犬

奚囊蠹餘卷之二



奚囊蠹餘卷之三

五言古詩

西嶽宋侍御同遊

偶從乘驄使登攀  
陟千仞秦城越斷隄  
漢時歷平嶙翠柏儼分行  
紺宇紛前引行披谷口雲  
坐沾巖頂潤群山漸覺低  
百道飛泉噴信是巨靈  
壁中流亦何迅石鼓靜來聞  
天池湛清醞棋坪若有人  
青鳥傳芳訊恍惚毛女迎  
因偕叔卿進一餐千葉英  
頓失三峯峻世網未可辭  
塵衣聊此振

自華山趨蒲城值雨停車待霽乃發



華嶺雨欲來，群峯忽變色。突兀平復低，蒼翠黯然黑。近樹影猶歆，遠澗鳴漸亟。雷駭蛟龍飛，風驅燕雀匿。停車未能發，煩囂暫屏息。少焉見新霽，晴光在楹側。萬象眼中明，爽氣散幽臆。回瞻仙掌遙，前旌颺渭北。

浴溫泉

白靄薄青林，遙望驪山趾。沿洄紫邏深，勝槩一何侈。紺殿挂懸崖，繡嶺侵雲起。池亭接上流，湯湯漾溫水。蓮臺噴雪花，瑩然絕塵滓。坐石膩於膏，嗽泉甘若醴。洗心滌骸垢，澄映徹表裏。我行愜幽賞，誰

謂宦遊鄙，勿問舊離宮。華清久傾圮。

關中十首

古渡餘荒塚，何年風雨崩。曾將天補缺，不禁地移陵。神聖猶如此，而人安所能。

夫子關西傑，脫迹湖城隈。四知心不負，三疏禍成胎。譖言君未悟，大鳥空遺哀。

魏武爭關日，西兵先據秦。中流幾没矢，一蹶在蒲津。當時不自奮，鼎足是何人。

崔巍重關下，猶說姚鸞屯。全軍併心刀，勝筭得聲援。悲號風雨夜，惟有陣亡魂。



左丞能料敵趨利不攻堅魏將馳錐壁蕭軍走華  
川祗今馮翊路烽火夜猶然

逶迤涇渭水引入廣通渠疏鑿驅民力舟航利國  
儲河流自清淺無地覓隋墟

黎陽本孤旅鼓譟薄弘農將軍行奮迅郡守計從  
容誰信登陴詈真能折虜衝

萬騎出關東稠桑一戰空失律哥舒翰遺謀楊國  
忠此時唐天子行幸華清宮

元和多寇盜飛書動京師關津有內應主將詎能  
知始信金帛貴頓使人心移

黃巢陷河洛全師屬令孜壯心猶感奮枵腹不勝  
疲禁吭一失守國破徒傷悲

### 公署對雪

高齋盡日雪稍稍蔽青山遂令蒼莽色眇在混沌  
間同雲垂滿地微月忽臨關庭柯墜不折棲鳥驚  
復還撫景豁幽矚杜門謝塵鞅悠然坐清曠寒夜  
開愁顏

秋日關城登眺客有談王官龍門之勝者漫  
賦見意

秦關靄秋霽潼津正奔流北指中條麓想見王官



丘背郭渺烟渡雲樹蒼蒼浮爲問首陽塚崎嶇猶  
阻脩斷壁挂猿狖激浪騰龍蚪空懷鑿山蹟未遂  
禹門遊逸矣非吾土淒其生遠愁翻然眷東鷺湖  
上棹漁舟

酬王廷尉元案

往昔都門別惆悵平生親宰邑臨離水分符出衛  
濱爲徇五斗祿同是折腰人雲樹眇相失蹉跎經  
幾春葉令子齊名再績騰 楓宸君游豈予似亦  
復免沉淪徵書赴南省授節入西秦彙進胡不憚  
遼邈增苦辛客從東方來貽之雙錦鱗烹魚讀尺

青雲侶功成歸比鄰  
亦有言何諄諄紅顏俱白髮又要寧足論憂心正  
亦毒秋思到鱸尊雅志在丘園荷衣垂角巾申章

寄和野翁睢州阻雨

東歸匡毫開登涉念脩途周秦猶在望漸近楚與  
吳一夕飄風發陰雲滿四隅驟雨竟三日橫潦漲  
通衢將留廩不繼欲去愁僕夫郵亭坐嘆息巡簷  
鳥雀呼湏臾覩新霽鬱結成歡娛輕車已夙駕驚  
馬爭前驅世事亦如此顯晦同榮枯達人自有悟  
幻迹安得拘



悼亡四首

蒼蒼蔽重陰雷霆何太烈階前瓊樹枝芬芳一朝  
折福鍾信非邇禍倚孰為孽余慙省莫追爾善朗  
焉滅皇鑒猶遺形悲末五情執  
十載攻詩書文思飛縱橫先達皆歛衽同輩一時  
傾希聖迴不惑芥視世上榮朝聞徒為耳夕死空  
令名誰云天帝側無人賦樓成  
楚壁瑩無瑕隋珠夜光炫墮地寧復完沉淵不可  
見嗟余老無聞屬爾揚聖彥爾猶厭勞生余留復  
何羨終恐歸化時無復生眷戀

回也天喪予伯魚亦先逝自古皆如然才賢不永  
世造化彼何心脩短同歸斃暫拭涕流離聊且從  
禮制不及東門吳怡然無累繫

冬日西行偶述

海珠初騁望茫茫路已迷三水適西邁雲靄蔽端  
谿入峽忽欲暝旣出聞村雞炎荒無嚴霜芳林草  
萋萋秋虫振羽鳴春禽呼雌啼寒暑有代謝此地  
良不齊戒心南山猿亦警滄溟鯢俯數經世謨祗  
役空栖栖

贈傅右使近山



八閩信嘉麗到海勢偏雄五華盤蜿蜒三秀迴浮  
空云是飛僊人結室當其中芙蓉散青靄座上搖  
蔥籠時沾躡履露或御振衣風名籍注寶錄雅與  
金閨通俛仰廊廟心寤寐巖壑同餘潤宇宙間膏  
澤垂無窮

贈督府公

澤國東連海逋逃結島夷腥風吹急浪出沒恣剽  
推承平厭戈鋌束手徒傷悲 皇心眷南顧爰命  
丈人師上公自神授謨烈夙兼資登壇揮五兵威  
聲凜四馳乘秋橫殺氣甲士騰熊羆一鼓誅鯨鯢  
鳳閣上賞沐鴻私許 園身猶壯報 恩心靡移  
勳名載青史組豆贖民思

初冬江閣觀潮以到江吳地盡隔岸越山多  
分韻余得地山二字

冬入北風生驚濤一何駛危樓倚江千潮信正堪  
伺海門初轟雷白練中天墜恍惚陰山移還聞奔  
萬騎云是忠義鬼憑茲雪遺憶旦夕再來還傷心  
故英地

我有同心人日夕相娛開江閣渺竒觀因之一登



攀雄風壯怒潮隱隱江上山層雲排雪浪噴薄穹  
隆間帆檣互出沒魚鳥驚復還消長不可窮聊爾  
舒心顏

題秋江獨釣圖

幽人遠塵囂浪跡俯寥廓茫茫烟水間虛舟任飄  
泊投餌本無心得魚非所樂長吟秋風生木葉紛  
紛落

荆門道中避雨觀音巖下

恒暘正炎鬱一雨忽滂沱征徒促徂兩避止山之  
阿青林結野館懸崖立嵯峨幽洞趺大士五色上

森羅百尺掛螭首噴沫成龍渦更攀雲中臺神怖  
不得過坼地迸雷電傾天注銀河流沙灑霖霖恠  
石隨其波我生嗜探討歷覽豈不多偶憇邁竒絕  
欲去仍留歌

與奚憲使學山話舊

在昔附驥日相將皆茂年君直西掖垣我備將作  
員屈指青雲上致身良易然蹉跎能幾何素標忽  
乘顛蠶叢萬里國一官同迤邐豈不厭苦辛有懷  
不得宣正御無十獲力耕逢石田扶搖渺鵬程倦  
翻慙飛騫飛騫信無期悠哉歸來篇三吳不殊俗



五湖雲水連訪我猿鶴廬遲君書畫船初服信自  
媚寧獨文繡妍尊羨與鱸膾願及秋風前

自江津放船渝州投治平寺

鳴撓下夔溪水駛舟如箭銅鐘乍經過漁洞忽不  
見道上有逢迎遽走渝州椽傾灘但轟雷激石陡  
飄霰丹壁罔凝睇青林祇心戀乘傳入城邑小憇  
空王院悠哉一無營向來何萬變

五丁峽

飛瀑下澄潭磷磷嗽白石清風灑層巖冷冷生兩  
腋靈鳥及幽花附耳忽沾幘蘿篠迷前途雲靄蔽

後陌流覽乍躊躇凌空陟峯脊曠然小人寰恍如  
生羽翮云是五丁峽信有神工闢樂土易銷沉巖  
壑饒仙籍嚴程不可留虛擬脫塵迹

寓兵康國詩

海郡逢多難鯨鯢颺烈風逋逃成部落島嶼出艫  
艫千里桑麻地頻年荆棘中給兵徒自匱命將乏  
全功誰遣閭閻秀未膺虎豹雄魚龍纔置陣尊俎  
卽臨戎勝筭惟居重先聲足遠攻庶幾康泰日歌  
咏四民同

再入潼關



十載抱關吏塵鞅復嶠函浮湛處其賤籠繫亦身  
耽朝躋畏嶇歎夕涉戒濡淹盤桓貴行正往訓夙  
所諳覲懷拂衣思弃繻彌可慙枯萎而雨露忍忘  
天澤覃候鴈隨北風河流下江南無由寄心曲使  
我兩情含

三月二日東園讌集

青門三月初春光燦如綺楚楚耀路衢聯裾復方  
軌言訪仲長園爰出冠蓋里會心信非遠翳然得  
林水珍禽迭成響竒葩雜紅紫擷芳入尊俎茹鮮  
酒逾旨耽樂共忘疲坐隱忽移晷灞澹指顧間祓

除先上巳

上巳景隆池讌集

上巳信佳辰光風媚林薄纖柳颺絲絲衆芳紛灼  
灼曲水引龍渠舊苑分花萼蘭朋欣盍簪選勝諧  
宿約忘形雜嘲戲有酒任斟酌得句或微吟探釣  
忽大噓矯志在青雲何心眷丘壑爲言厭甘肥無  
如快藜藿

省中會餞雷叅伯以別後相思復何益分韻

余得相字

長安麗春日薇省盛芬芳光風暢和氣燕好同樂



康臨觴曷不御離思結中腸我友慎明德洵美金  
玉相綢繆曾未幾緬隔參與商眷彼垂白人倚闥  
遙相望歸與釋百憂萊舞娛高堂翳萱適所好叢  
桂儼成行處豹澤深霧爲鵠摩窮蒼揮手謝塵瑤  
勞者何遑遑

折楊柳

垂楊怯風吹飄搖不自持攀贈遠遊人寧誇物態  
奇柔腸同縷縷聊以繫相思倘念凋零易遄歸藉  
一枝

日晚署中言懷

春風蕩晴靄遠見南山碧庭樹攬餘暉烟霏日將  
夕散吏步虛曠委蛇斲時適歸鳥駭林端乍止復  
揚翮所志在飛騫卑枝苦逼窄而我繫樊籠何能  
忘跼踖

送孟省長入賀萬壽

西曹文會罷緬隔幾春秋世路悲青眼年光咲白  
頭重來陪省署一見解離憂永夜蘭言洽娛情芳  
醕酬忘形成莫逆同道得相謀頃奉金閨使遙添  
海屋籌徂東聊畫錦直北近宸旒晉接鸞鸞並  
恩私雨露優躋華君已後處賤我何尤比德懷貽



致臨風脫佩鈞悠悠歲寒意終以結綢繆

飲何中丞荷亭分得夏荷二字

玉井十丈蓮托根從太華歸與謝麒麟甄此娛耕  
稼池閣隱城隅南薰扇長夏參差綠遊敷的歷紅  
芳亞著雨薄脂鮮披雲輕縠藉良辰侈嘉會招遊  
適休暇蔭樹晚涼生舉醖寒漿瀉豈有物外心暫  
稅塵中駕延想西湖曲能忘三畝舍映日復接天  
不聞昔人詫

雨後芳園潤庭陰上綠莎  
槿籬低粉堞竹逕冒清  
波碧散牽風荇紅凝  
挹露荷林喧求友鳥池狎換

書鸞佳麗西都舊人文甲第多遠山分太乙曲水  
入天河詎意談經地能容問字過折花慙髮素照  
酒覺顏酡簿領淹簪紱幽期洽薜蘿同遊總陶謝  
共和采蓮歌

同藩臬諸公登終南普明寺

聞道終南勝時時望碧岑同聲欣我友于野共相  
尋控馬樂遊原樞衣曲江潯渴想天池液乘風珠  
樹林初旭表金輪兩塔銷層陰下方旣空曠上界  
尤崎嶇龍宮信云險虎逕何其深松檜偃雲蓋交  
飛喚珍禽紅藻出綠波奇芬襲塵襟俯見城市眇



霏煙但浮沉四荒紆壯思清梵豁幽忱從茲依福地常持不二心

送孫學使轉官入蜀

渭水東悠悠逝者無時息歡會何可長一別不再得君昔下鳳池西京典文墨門牆桃李花芳菲徧春色人娛倚玉心自耽稽古力貽我雲錦章天袍爛如織雲錦豈不貴永懷在明德懷德不忍分離緒填胸臆夙秉文翁化仍被蚕叢國岷峨杳難攀巴渝深不測猿嘯饒悲風鴈問鮮迴翼歷歷想舊遊經過莫相憶

公署登樓述懷

高樓坐長夏四望盡蒼山窮荒復愁緒溽暑增鬱煩紛余自雲省秉鉞瘴海間徒然抱忠義何以格冥頑鄉心驚逝日壯志損顏顏眷彼林中鳥向晚倦飛還

飡秀亭

孤亭矗巖際下見雙江流南山擁青翠雨霽煙嵐收蘿鳥盤磴曲桄榔藹雲浮旌幢搖渡口絃管喧枝頭釀泉供獨酌採秀芬可羞無端鬱余思北望天悠悠



賦得我愛夏日長

方春眷遲日東皇奄然謝陽烏薄鼎參大庭御朱  
夏鳴鷓翔茂林玄蟬羽初化暫屏城市煩林泉聊  
稅駕流連小艇中箕踞垂楊下一身藉安舒萬累  
莫虛詫澄心不知暑咏物饒餘暇常恐逼秋節晝  
短苦長夜



奚裴壺餘卷之四

七言古詩

結文行

在昔侈彈冠亦聞誇結綬同升雅見椎竊位終貽  
詭雖難韶濩八音諧大廈經營集衆材不然阿衡  
才美亦足矣吐哺握髮何爲哉君不見三亭謁者  
載范叔蔡澤翻能代張祿狗監微言奏子虛常何  
有客誰推轂連衡合從秦將儀片言出口成雄雌  
入關舌在不得逞邂逅舍人傾高貲古來名行施  
後世青雲之士遙相麗當途不解引同心運命難



逢偏易替君不見漢相封侯得意時奉給盡克開  
閣資故人布被飯脫粟安用平津富貴爲

### 石梁篇

我昔耽浪遊竭來興何劇笑振千仞衣醉著登山  
寂春日幽心成饑渴大江東畔尋仙迹剡溪經幾  
曲輕輶轉層谷躡水穿雲億萬重此地洞天標蓋  
竹蒼壁斜懸百尺梁中天龍舞神龜伏銀河迸出  
石罅泉噴雪飛瓊成霖霖曇花金碧俯潺湲方廣  
瓊臺縹緲間寒巖桐栢竦雙闕赤城霞起相迴還  
青蛇蜿蜒護聖瓜澗邊香飯漂胡麻已聞天帝開

爲府復道空王闢作家蓬壺方丈眇難遇此去地  
源應有路莓苔翠鎖石橋危神怡不覺超然度凌  
虛頓使萬緣輕潭底空明心共清帝猿唳鶴遠相  
應瑞草竒花亦有情情縈景會去逡巡人間甲子  
應千春歸途遍識經行處莫遣他時雲樹湮

### 送白德純之廣平

憶昔與君游結綬承明裏意氣凌雲霄功名薄朱  
紫一麾我領荒城符君持三尺越江浹南國方遺  
召伯棠監榘更試希文使蕭蕭風木正愁予頻勞  
車馬駐山廬十載飄蓬一回首青山白水聊相於



春來湖上饒花鳥六橋煙罩蘭舟小千重蒼翠隱  
樓臺十里芳菲城郭遠逋仙不負比山靈長公公  
事湖中了鷺道微書天上來三輔還資作傳事  
臘月柳枝渾可折離心且盡掌中杯君不見匣中  
雙劍會有時翩翩黃鵠亦分飛願言別後各努力  
心期夙昔無相違又不見塞上有鴻河有魚相思  
惟有尺素書

馬右使索題紅梅圖

君不見大庾之巔萬樹梅南枝北枝參差開又不  
見上苑同心將紫帶紛紛競逐上春來淡粧披佛

羅浮肆踈影橫斜孤山隈爲憐素質皎如雪却月  
凌風迴高潔誰道天桃文杏顏氤氳薰染貞心徹  
換骨非關紫府丹應將酒暈敵春寒紅霞影轉香  
偏遠玉笛聲殘色未乾我聞處世忌太潔獨醒何  
似知幾哲莫緣索笑浪相疑由來不改冰霜節薇  
垣上公調鼎臣鐵石肝膽南金身開芳懋實歲寒  
操飄飄逸思超風塵樹下看花未足娛駐却花神  
入畫圖物理天機常在眼有脚陽春到處敷

送晏東之還廬陽

燕山歲晚北風烈四牡駢駢犯冰雪年來猶自夢



淮淝因君倍憶河橋別清直堂前民事餘城南小  
艇蜀山車市有弦歌供讌賞心將憂樂寄閭閻別  
來君幾朝京國中厩駟駟雲錦色伯樂能空冀北  
群衛公秉德何淵塞爲想同遊今漸踈分符鳴珮  
振芳譽風塵荏苒憐雙鬢舊秩相逢君與余春近  
柳絲黃滿陌殷勤折贈休輕擲君還江北望江西  
我亦江南未歸客莫向清時問屈伸九天雨露萬  
方均賢勞不獨淹畿輔蚤晚卅書下 紫宸

夢椿贈王尹汝和

寶婺靈椿幾百尺畫溪之水沿東白川岳祥鍾梁

竹材貞心不讓南山栢蒼枝翠葉何陰陰幽壑層  
巖歲月深廊廟斧柯迴難及芬芳時復聞重林奄  
忽飄風侵密雨東南半壁摧天柱頻年鳳羽拂丹  
霄一夕龍鱗委黃土風木由來塵孝思瞻雲陟岵  
總堪悲豈無花滿河陽縣清夢偏歸隴上枝

柳亭歌贈葉中翰

我聞柳亭之山崔巍不可攀乃在新都之域牛斗  
間烏聊直上松蘿杪婺水遠近相迴還坤德潛滋  
五沃土帶雨和煙千萬樹柔條密葉自依依鳳伯  
攄河安足數秘書舊葉當林深爲憐世德寄遐心



聽鶯御苑勞鄉夢繫艇蘇堤思不禁御苑蘇堤雨  
牽束故山楊柳年年綠大隱何妨金馬門却笑先  
生歸去速君不見渤海公亭亭車蓋兆里中又不  
見柳下惠門巷清陰滿人世鳳池綸綍振前脩不  
負當年培植計山青青柳翳翳亭中之澤引無替

天雄陳倅話別

憶昨送君吹雪花今君送我花如霰風光回首場  
寒暄世事浮雲成萬變漳河東下一舫飛戀闕  
懷鄉願不違別後相思幾千里看花對雪雨沾衣  
中秋李節推官舍對月時唐丞防秋易州李

倅棒表入 賀朱倅擁兵邯鄲余子懷還浙

大比慨然有懷各賦月字

陰森栢影上踈簾起向中庭對玉蟾謫仙光照金  
尊裏杜老杯乾自可添良霄莫遣坐超忽醉彈長  
缺清歌發靜夜千家砧杵秋冰心一片天雄月  
燕支木落風蕭蕭黃沙捲雲嘶馬驕胡兒驅逐古  
獫狁漢將武捷今嫖姚塞下專征親受鉞千里餽  
糧隨將卒東平國士信獨賢佳節淹留易水月  
天王燕喜千秋節萬國衣冠八月來紫禁鐘聲三  
殿曉玉堦香燭九重開仙郎此際趨丹闕劍佩鏘



鏘候明發聞道清光萬里同何人共步金臺月  
六郡良家武且賢霜戈雪鎧旌旗鮮一旅當關九  
邊震胡天萬里消烽煙吳中范老富兵甲憂心點  
點侵華髮懷友應憐漳水雲娛情賸有邯鄲月  
澤國秋深風露清天香桂子飄山城爭訝嫦娥宮  
裏見翻疑玉兔輪中生洛陽年少人中傑傳得西  
河謫仙訣百丈高枝信手拈此時千里同明月

雪夜東王省郎陰伯

同雲油油海天低踈檣皎潔晃輕闌平臨虛宇曠  
八極坐對冥茫混二儀撒監飛絮擬不定珠臺瑤

榭相參差山頭莫辨玲瓏石林落墜折瓊瑤枝寒  
郊苦憶賞心侶有羨子猷江之涯郢中白雪待誰  
就何當爲我傾玉卮夜扉不掩正相逐試聽高人  
命棹師

贈別陳友琴大本

山人浪迹天之涯皮冠芒履冰雪姿青囊賸貯長  
生藥綠綺時調白雪詞仙蹤杳眇不可托膝上枯  
桐俯寥廓坐臨流水躍潛鱗復見高山下玄鶴玄  
鶴神魚亦有知防心誰解追皇羲生平雅致足相  
契逢人莫道知音稀知音稀古來惜無那清徽湖



海隔新聲番出遠別離悵望孤帆遠江碧

鬪草圖

長安三月百花開公子玉絲結隊來青驄宛轉珊  
瑚鞞交螭雜組雲霞回尋常坐厭黃金席笑倩城  
南芳草陌陌上群芳麗且鮮嫩色柔香總堪摘盈  
盈羅袖含春姿爭誇葉葉復枝枝遠攀有餘近不  
足彼也云多此稱奇金壘玉俎行相從瓊蘇琬液  
傾千鍾花枝爲籌鳥歌艷極歡恣謔情何濃情轉  
濃樂無極可那前山日西晏年華不駐春欲歸恐  
令花草虛顏色君不見邊城白草高連天冑鏃從

軍夜不眠黑雲烽火朝朝警年去年來春自妍吁  
嗟乎長安塞北正相倚勞逸榮枯誰可憐

江淮道中

昨日淮陰城今日下邳道千里麥無秋三農去爲  
盜道傍老嫗髮如雪啼饑向人聲欲絕往歲征徭  
失所天今春濬河子歸穴東家持刃西入秦南隣  
放火村無人長安日遠不可訴官司何暇憐孤貧  
孤貧不見憐無復希生全腸斷不忍聽仰視蒼蒼  
天君不見天山草衰北風烈崑崙月午胡兒獵樓  
蘭征戍怯腥羶多少蒸黎死鞬鞞聞道邊陲今古



愁寧知征役同戈矛江淮南北稱猴舌肉食應慚  
爲國謀

漕河水

漕河水何湯湯浮汶踰濟通淮揚漕河水何屈曲  
奔洪瀉脾旋山谷東南財賦壯西北一歲千艘糧  
萬億䟽鑿神功仰昔賢惠濟元元裕邦國炎劉轉  
餉稱鄧侯唐興劉晏何多謀國脉河源與民力羸  
縮由來視邇塞古云患寡患不均富國先湏民不  
貧君不見道傍高柳皆龍鱗行人尚說平江陳

七月既望省長朱鳴霄讌集王氏第邸席賦

此

新涼洒輕颺零雨滌煩燠曠軌眷休暇良宴啟華  
屋華屋縈紆貝闕邊雕甍珠箔相新鮮玉俎鱗鱗  
錯水陸長安美酒傾十千清言纚纚渾忘倦吳兒  
艷歌尤婉變傾耳皆能快賞心急管清絲未湏展  
共言此日不常得人東西兮路南北披襟把袂誠  
湏史玄鬢俄驚霜雪色酒易醒歡欲歇短歌微吟  
當筵發五陵衣馬何續紛趙孟金張緬淪沒且湏  
游衍憑化遷到處春風與秋月

乙巳夏六月苦旱禱祀良久一夕獲大雨喜



而有述

帝炎秉節鷄火棲彤彤徂暑臨赫曦山雲不蒸礎  
欲烈陽星載月畢不離源泉涸盡井斷汲平疇生  
烟禾日萎老農荷畚悲正切萬戶咨嗟氣欲結何  
人作牧獨酸辛兩岐合穎慙先哲縣子徒塵不足  
論中山積薪還自燔怒號把劍指赤魃含水擬效  
樊英噴忽聽一聲轟霹靂陽烏寢光流電拆油雲  
四起攪陰風龍翻山谷爲川澤雲低却訝天乍頽  
困急如聞廊屋摧階下汎瀾沒瑤砌田間豐浸枯  
久回雨歇聲不止歡呼動閭里萬彙若更生何言

田峻喜憶昔分符廬子國十里荒蕪無稼穡賜租  
仰荷漢皇仁發粟柰非長孺職僅延殘息逮茲辰  
憔悴夫蘇饑游臻安得陰陽順調燮國用克盈民  
不貧熙熙六合歌同春

蒲石

青青者蒲傍白石心賞偏宜隱君宅中岳仙人不  
秘靈織女機頭誤相擲暗香和月倒金觥只尺烟  
霞座上生笑啜新英枕欹及世間何物能櫻情

明言

華燈萬點炎輝徹照乘隋珠夜光洩初霽陽烏秋



半月百頃澄潭千里雪未若心瑩潔遍燭群情明  
不滅

暗言

橫潦衝泥谷無際古鑿蒙塵深院夕重靄沉山月  
不出黑霧崇朝蔽東白未若心暗塞幽隱無形莫  
探索

登金山

長江自昔雄百川萬里縱橫競東走噴薄日月馳  
風雷妖霾變幻蛟龍吼茫茫元氣相迴合中流一  
柱標坤厚斜衝直搗迴不移部領群峯鎮京口乍

登恍入蓬萊宮紛紛人境亦何有石壇寶殿盤七  
層飛旌挂席臨四牖松間午梵落中天絕頂孤亭  
摘星斗生平幽意既自慙塵心翻覺歸依後坐看  
寒暄墜晚霞扣舷欲去仍延首

春鶯歌戲東清七弟

翩翩好鳥出幽谷音吐簫韶衣金縠江南三月正  
繁華恰恰飛鳴向喬木枝頭一轉銷人魂絲竹喧  
喧祇足論百舌無聲鸚鵡死鸚鵡含羞不敢言多  
情少年禁不得張羅挾彈欣相值花塢時拋織錦  
梭草堂新展窺簾翼小山低戶水明樓顧影聞歌



勸復酬人生幾何行樂耳眼前富貴雲同浮緘書  
撩我中心好自憐浪跡牽高抱春風苦憶石湖西  
歸來莫遣鶯啼老

春歸詞

憶昨驅車入函谷東風乍轉寒厓燠桃林隱隱未  
舒紅鼎湖渺渺初浮綠二月長安不見花九衢煙  
樹飛塵砂長樂門前見青草却訝今年春信早灞  
橋驛路出新豐驪山渭水秦關通太華只尺不可  
上三峯仙掌紛從龍日日東郊復西陌臺臣亦有  
逢迎責嘗聞此地可長生媿殺道傍名利客關河  
回首綠陰稠欲覓殘紅逐水流啼鶯老去不堪聽  
出簾小燕聲啁啁懷春擬向春留戀到得春來忙  
裏見荏苒春光應笑人莫怨春歸疾於箭

驪山溫泉

驪山高出雲溫泉煖欲沸草樹蒙茸藹不分似烟  
非霧浮陰氣老君祠古寶臺空惟道周褒與唐貴  
漁陽鼙鼓大戎兵山鳴泉咽同歎歎

種竹

川上青青竹移來植山麓陡覺風敲鐘磬音何必  
鍾龍生嶰谷踈秀嫵媚盡可人傾蓋相從意態真

樸而美簡  
而茂絕非  
凡若



風霜閱歷歲復歲玉質水姿愛出塵

關中送孔左使之河南

憶昔星臨浙水湄開閣殷勤坐翠虬  
人桃李盈欄檻四壁輝光圖與書  
相逢詎意投心賞馨歎紛紛振清響  
猶聞於越注行思瓊瑤貽我桐江上新  
豐斗酒青門樓十年笑共三秦遊  
傳經未遂關尹願驪歌已促離人  
憂悵離憂兮駐仙憶悠悠我思  
隨君遠漳津河畔柳新青太華峯  
山日云晚黃河東去出三門縈迴  
伊洛到梁園水底鯉魚應唯唯  
尺素傳來是晤言

江南行

江南東接滄溟杳海上逋逃恣椎剽  
鯨鯢鼓浪吹醒風巨艦輕舸疾於鳥  
雲間姑孰鞠作窩蒼溪震澤連嘉禾  
窮搜席卷不盡意厭弃絲枲輕綺羅  
黃金映日珠照夜青趺白粲何其多  
老稚紛紛轉溝壑壯者髡跣稱真倭  
南粵從征誇毒弩長竿短劍來齊魯  
烏合魚麗如雲屯吳越隸同編伍陸  
斷浮梁水繫舟里社分營接江滸  
幃幄將軍計萬全通夕烽煙盡殍虜  
吁嗟乎古來樂地翻成苦城郭春生  
鼓角哀鄉村夜泣精魂雨紅塵一騎  
捷書飛



歸來三錫頌天府

出京贈陶使君

使君家世稽山下，余亦悠然湖上社。不肯狂吟山水間，同爲遷客淹邱雅。錦江春色亦紛紛，塵囂雜還無朝昏。鳥啼猿嘯兩愁絕，相逢祇憶林中園。高山無雲水無滓，與君懷抱元如此。年來未敢向人開，結綬長安見天子。西經蜀道古云難，萬戶千門迴復寒。何意入門仍萬里，宣室不詔空長嘆。清秋白日懸高曠，共荷照臨恩浩蕩。君之百粵我七閩，蹉跎莫減初心壯。秉憲參藩總重臣，且須努力

答君新商山渭水亦皓首寧獨風塵老得人

送靳左使奏績

青門墜柳迺地陰，上有北勞遺之音。思歸已落芳春後，况乃離緒牽人心。薇垣鉅儒東魯客，茂績滂洋聲藉藉著書何意壇。文林踔行翻憎邁，今昔聊將螟螺等功名。懷恬茹素含真精，不緣獻歛探幽寂。神爽飄飄薄太清，行看奏最承明裏。雉膏終自克黃耳，和調元化飫八埏。故人在遠猶在通。

贈田憲使夢鶴

有鳥翩翩奮長翮，玄裳綉衣雙頰赤。上薄青霄碧



漢雲行樓蓬海飛仙宅乘軒祗覺厭人寰入帳虛  
疑丹九還 聖皇御曆宣和氣瑞世聊同鸞鳳班  
使君玉立何雄傑容與天衢等高潔神交忘爾復  
忘余警枕嘹嘹清唳徹

奚囊蠹餘卷之四



奚囊蠹餘卷之五

五言律詩

入京早朝

八極開昌運三辰曜太空  
鶯花上林苑鍾鼓建章宮  
禮樂百年盛衣冠萬國通  
何當紆夙抱彩筆頌神功

早春慈恩寺同年會宴座主值雪

聯轡指禪林凌寒踏玉塵  
重偕獻賦客共醉曲江春  
鏡閣香烟繞溪橋物候新  
蔥蔥瞻瑞氣一水隔楓宸



十里長安道珠林接禁城遠香聞馬首深樹隔鍾聲  
誼托龍門重班聯鷺序榮歸來迷紫陌雪霰晚  
盈盈

早春東白石

締構十年心鄉評藉藉聞彩毫飛妙墨金釵綺高  
文信遠江南鴈思深塞北雲春花未堪折那得致  
殷勤

聖駕謁陵還宮

清蹕迴仙道宸儀引日畿龍旌揚帝喜虎衛肅天  
威麗日來丹馭光風旋紫微恩覃百獸舞孝達萬

靈依

萬乘回鸞馭千官迂鳳樓綵雲團御蓋金水挹仙  
舟畦時耕人省橋陵祖事脩行聞敦曠典休擬恣  
宸遊

南樓

幽人棲木末南望盡江天飛棟雲霞合層簷日月  
懸簾垂千嶂色座擁五湖烟何獨蓬壺上樓居有  
列仙

和王舍人初寒秉燭集

鳳城清漏未霜落夜寒初讌集如蘭舊人同結綬



餘詩成摩詰句草作右軍書游藝非君事聊因一  
起予

送高文中還武林

薊北三年別金陵幾日遊心懸徐孺榻目送李膺  
舟林際野雲斷天空江水流且淹經國志暫慰倚  
門愁

送王廷尉元宗

蚤有花封譽尤宜棘署清同心方合劍岐路倦聽  
鶯天闕風雲思江淮烟霧旌山川極萬里徙倚不  
勝情

東風喧別館春色遍天涯一見王孫草翻思上苑  
花斜暉移祖席新月在仙槎驚問如能托無令怨  
路賒

登雨花臺

憑崖攀法座躋磴出雲林往事成銷歇高臺無古  
今放歌啼鳥喚舉醞落花侵隔樹來清梵何言絲  
竹音

中秋前夕泛月同周省長

山郭烟初歛江邨秋正中一分光未滿子夜影當  
空冷滴梧桐露香飄丹桂風曠懷并藻思延賞故



人同

弄月石城西輕風故故遲偏憐向盈際不似易虧  
時一鶴橫空下千山倒影移清輝隨地滿翹首隔  
心期

龍江泛舟投弘濟寺

名都尋勝槩仙侶眷同情北去青山遠東來白浪  
平花光搖桂楫王氣遠金城杳靄空香裊微聞鍾  
磬聲

宿曹繩之官舍

竹欄迴砌曲花塢襲衣香向晚移文几臨溪卧石

床金波連太液玉漏轉明光始信秋霄短無如久  
語長

秋野

曲水遠江分清颺揚細文石橋紅作架蘭舫鷁聯  
群淮湧巖秦月城流吳冶雲寧知紆組客兼得遠  
塵紛

清秋澄碧宇徙倚向江涯杳眇環山色徘徊蕩月  
華空林歸鳥雀野水淨蕪葭何處勞相憶迢迢博  
望槎

聞歌



飄渺中筋  
青目石

嬌歌試一聽能令四座驚松間初唳鶴柳外即鳴  
鶯。不。畏。周。郎。顧。應。傳。韓。女。聲。曲。終。餘。響。在。花。落。晚  
風清。

有所思

綠酒空金卮因君不自持瓊瑤傳麗藻冰雪想清  
姿明月同千里鳴鶯各一枝江村正無賴延佇欲  
移時

龍江發舟將入楚

疊鼓促行船斜陽攪暮煙柳低風宛轉洲曲水縈  
旋雲起含吳樹江平接楚天星河搖動處疑在斗

牛邊

登靈隱山和楊一汝承

芳徑接金沙旣遊路不賒緣溪饒鹿草入谷遍鶯  
花古洞歸雲滿高山落照斜空香何處發渺渺白  
牛車

出郭見雲霞依依望轉賒蘭舟十里掉柳陌萬叢  
花石裏泉逾冷山中日易斜何由恣歡賞暫得駐  
天車

日暮山行

矯首白雲中蒼茫處處同乍驚千障阻忽向一蹊



通古洞明殘雪踈林激暮風窮探猶未返孤月已  
腫朦

題綠崖贈沈生

蒼崖盤九仞危磴轉叢林一室當峰小千花繞徑  
深雲霞飛麗藻風月靜塵襟寶匣看龍劍青霄萬  
里心

和康原中泛西湖晚登萬松山

冠蓋洽清遊澄湖靜不流涵虛雙鏡合搖落萬山  
秋磬發雲中寺鴻翔林外洲幸逢瀛島客共上木  
蘭舟

聯轡轉龍嵒幽懷晚更濃頓超青巘上回望白雲  
重友是今三益山猶古萬松興亡昔年事此地惜  
遺蹤

碧溪

青山高萬疊百道瀉潺湲震澤爲歸壑茗溪是本  
源煙波依桂檝魚鳥娛芳尊試聽滄浪曲無忘尼  
父言

宿湖上

卜築枕溪流空山夜更幽涼雲侵短榻明月照高  
樓長嘯驚靈鶴忘機狎野鷗何方尋九鼎此地即



三丘

荆扉當麓敞迤邐接孤城門屏青山暮窗虛綠水  
平長尊月下泛小艇鏡中行萬籟此俱寂南天參  
已橫

保所山登眺得峰字

杳靄入天境崖巍中子峰下臨雙鏡合西望六橋  
重幽尚聊時適仙蹤恨莫從南屏十里隔遮莫度  
踈鍾

晚登松臺

青松挺雲幹蔭滿寺巖龕仰見月出海翻疑龍

珠城隅千樹暝水上一山孤欲去不盡意湖邊問  
酒壚

落星石

隕石散星光纍纍中子岡化遷天有意容納地無  
疆射處渾疑虎鞭來定作羊欲因新雨後試向覓  
金章

京師送呂鳳儀之金陵

一罷龍江宴頻瞻鍾阜雲握蘭憐夙契折柳念離  
群澤國春帆遠燕臺落日分翻思舊遊處清夢遠  
從君



春日南郊分得郊字

春水溢河橋春風拂柳稍一尊偕上客聯騎出南  
郊寶樂卅霄隆穹臺碧樹交歸心厭城市忽憶舊  
衡茅

春日過姚令園

夙整東山屐因過陶令園平臺孤嶼湧空谷五雲  
心嘉樹香浮醕春鶯靜對言自憐簪組客暫得避  
塵喧

晚春真覺寺集

郭外春猶在花邊坐落暉柳深鶯細細桑密鶯飛

飛映水搖金刹穿林抱翠微徘徊香徑裏信馬得  
遲歸

送友歸杭

命服初承寵銓衡早辨才行辭漢帝闕言返越王  
臺野竹開新徑春山剪舊萊南中信多美歸思渺  
難裁

題竹山

吳山迂鬱處脩竹復緹葳小築開三徑清陰滿四  
圍有時聞鳳吹隨意坐魚磯會得林中意生平願  
不違



月湖

滿月淨娟娟平湖一鏡懸晚風清蕩影秋水碧連  
天却理任公釣而浮范蠡船願言從所好塵累莫  
相牽

省中白雲樓晚眺和陳一羽伯

淒淒黃菊秋徙倚白雲樓山遠月乍吐天低星共  
流鳳城通禁漏鴈陣入鄉愁爲軫同心念彌令戀  
帝州

迎春和郭郡丞

和氣繞城闈芳辰物候新衣冠紛作隊歌舞雜前

陳勇力非吳俗嵒竄尚楚人有懷無與慰一曲是  
陽春

半陽池

暢谷潛通氣寒山瀉沸泉石中聲似咽水上煖浮  
烟澡德殷湯訓濯纓孺子篇靈源不可遡聊復弄  
潺湲

過萬家山訪王喬洞

紛軋復龍嵒躋攀不可窮當溪仙洞杳入谷幻緣  
空玉種畬田碧丹遺石鼎紅冥探向深寂清吹落  
雲中



巢縣道中

深秋行下縣省歛歷村村政簡逢迎少年登鷄犬  
繁霜黃踈柘影雲白遠山痕且共謀耕鑿征徭不  
忍言

鳳陽恭謁 皇陵

山靈飛彩鳳地軸鎖盤龍寢殿雲霞滿周墉苔蘚  
封千年餘王氣百世衍 神宗來往瞻依處衣冠  
儼肅雍

皇堂鍾磬裏薦享即生平少典開軒后居幽柘鎬  
京禮崇天下養功等四時行讀罷窮碑製貽謀仰

聖明

途逢立秋

煩劇薄專城驚時不自寧江聲向晚急木葉見秋  
零林有迴翔鳥池多點綴螢懷人不成寐坐看起  
明星

小憇香積寺

治浦通香阜陰陰瑞霧間鐘鳴僧出寺苔破客臨  
關坐久天人失緣空去住間征夫莫相促門外即  
塵寰

舒城遇雨



行縣入舒城經秋暑未清谿雲林際合山雨隴頭  
平鷗鷺飛相狎魚龍逝不驚村農莫愁思蟬竦已  
東橫

暮宿都管塘

駐馬村中館門臨百頃塘幾家烟火集一片水雲  
鄉樹點斑斑色禾吹細細香夜涼渾不寐虛牖月  
流光

壽春謝公祠

未識淮南勝今來登八公猶傳神禹蹟不見漢王  
宮談笑胡沙淨勸晉室功薦蘋遺廟下千古意

相通

珍珠泉

有時幽興發盡日白雲阿仄徑捫蘿上名泉載酒  
過蚌胎星彩散驪頰夜光多時出應無息投入柰  
暗何

何處覓淵源幽亭石鏤邊山空泉響細珠散水紋  
圓照月光逾迴含星影共聯從知久沈醕一酌已  
醒然

題扇

逕轉山村曲江涵草樹低殘霞孤艇上落日小橋



西傲世看漁釣驚時有鳥啼悠然天宇外莫是武陵溪

挽葉南湖

不見湖南隱誰開湖上尊雲霄餘劍氣門逕有苔痕化鶴何年返明星此夜昏深秋風雨急落木蔽高原

張會稽邀飲星宿閣

潘令盛賓筵幽人引興偏涼雲輕迥地空谷細通泉樓閣層霄起星辰四壁懸心知在城市翻憶到諸天

玉泉亭上

路轉雲爲蓋亭開石作門青天白鳥下碧水錦鱗翻湖上芙蓉逸山中芳桂繁幽襟隨處洽况有酒盈尊

明妃詞

一被椒庭選流光祗自憐素心明月解春恨落花傳薄命悲顏色長門惜畫錢君王宰相顧不復怨胡天

題畫

流雲紅葉岸零雨白蘋洲水淨魚龍見天空鴻鴈



秋微茫三島路飄泊五湖舟頗有乘桴意相將學浪遊

吳門周臣作溪亭春曉圖景致幽曠筆法妍潤展玩殊愛之漫賦一律書盛子扇頭

春水沒芳堤林端百嶂齊松筠渾逸舍桃李自成蹊雲起知龍卧門閉無馬蹄非關厭軒冕心遠得幽棲

野間隱居

出郭尋高隱澄湖曲抱明盧邊和靖竹窓底富春山採藥凌風去乘槎釣月還從知龍卧處亦復傍

人窠

湛泉贈詹廣文

別業烟雲裏流泉曲檻通雨餘珠散影月滿鏡浮空映竹參差碧飛花澹澹蕩紅沾濡本無意草木自爲功

過萬年寺值雨

爲訪飛仙跡來投竹院間萬年經幾劫寶剎尚青山喬樹深開徑鳴泉曲到關石梁風雨暗只尺滯登攀

水簾洞



青山不可極來往翠薇中古洞時聞雨飛泉自作  
風石林孤磬香烟寺小堂空此路多靈異仙人何  
處逢

過德純官舍

公府非無事幽心欲避喧竹深開小徑花密隱層  
軒江月邀朋好山鶯娛酒尊知君羈思少到處即  
家園

都運新官舍淹留司馬郎著書搖彩筆抗疏薄銅  
章吏散鳥鳴樹簾疎月到牀憐余久耽寂相對兩  
形忘

贈石梁琥上人

吾師飛錫杳遠自終南巖欲覓寒山穴來聽瀑布  
泉焚香翻貝葉呪鉢吐青蓮靈境已忘世還因參  
上禪

新昌道中

登頓未云疲舟車總自宜尋泉時見鹿坐石忽聞  
芝漁父能殮栗樵人解奕棋吾生奚後汝空此憶  
幽期

方塘圖贈虞士賢

一徑樹千章孤亭十畝塘捲簾魚鳥影隱几菱荷



香取醉邀山簡怡情效辟疆  
井關避塵市桑梓本  
吾鄉

奚囊蠹餘卷之五



奚囊蠹餘卷之六

五言律詩

送高光州南歸

日落燕山北帆飛潞水東一尊離思滿萬里客心  
同豹隱氤氳秉龍蟠鬣隸中應憐倚閭望湖海謝  
飄蓬

蓬飛春水邊垂楊帶野烟人歸結駟後思發拂衣  
前馴鶴依君復燒丹學稚川此中多舊隱遲爾賁  
林泉

行縣十首用楊侍御韻



大名

近郊初攬轡長堰轉迂迴衛水浮梁渡沙丘背郭  
臺炊烟連郡起山色隔林來聲教應先及絃歌莫  
浪猜

內黃

古邑黃河內沙平樹亦稠燒醴資白壤封堰障洪  
流柳色依輕蓋谿雲護曲輶江湖猶滿地不忍縱  
雙眸

濬縣

大任神禹蹟今日水猶紅沃土渾宜黍高城半倚

隴女崑青壁斷賢塚綠蘿叢忽有林泉興因之夢  
欲東

東明

式暮損城垣懷人姜照村流風魯衛境巨浸水雲  
門白叟呼童飲青萍抱特蹲入疆逢候吏為報古  
東昏

清豐

東未瞻泰嶽南臨江瀆泉頓立仍王氣繁水幾千  
年羽檄愁何劇風波涕欲漣望中皆夏潦何處有  
秋田



魏縣

官道騁飛鞚障陰今再經霜林初綴紫秋草尚餘  
青落鴈沙痕亂遊魚水氣腥為憐逢歎歲不憚歷  
荒垆

開州

澶水清堪濯洪洋高可梯當年交誓約此地擁輪  
蹄漢將鳴刁斗胡兵避蒺藜由來征戰地殘壘暮  
雲低

滑縣

黎津通白馬村落隱茅柝城市烟雲際菑畬隴樹

巔漢堤龍作道唐井聖名泉莫遣驚烽燧衣冠此  
地偏

南樂

樹轉馳沙徑孤城隔隴雲龍窠今不見昌樂古耒  
聞地潦無耕穫林踈渙鳥群憂心厭行役馬首尚  
餘曛

長垣

畿南古蒲邑沃壤不愁貧難治今何易風醇俗自  
親城闔森雉堞比屋耀魚鱗征調年來急恫瘝柰  
切身



李干翔追送清源

漳水接清源寒林薄晚烟孤帆歸客意遠道故人  
憐看劍風生匣持觴月在船飛鴻正南向尺素數  
相傳

函谷道中

阨陘峻函險盤旋更崛崎黃河行處遶紫氣望中  
移獲牧投戈日鷄鳴出客特崩城與敗壁千載使  
人悲獲牧靈寶里名

路迷巖谷裏村舍傍山稀有日陰常合無風塵自  
飛林踈周甸遠苔沒漢關非令尹今誰是青牛望

不歸

老子故宅

柱下辭朝隱西遊避世寰龍光初度洛瑞氣已臨  
關大道原無我金丹豈駐顏玄玄一授簡真訣在  
人間

許中翰別業彭給舍同遊

性偏泉石好名勝得追攀花發桃林野雲低號畧  
山鏡中浮雀舫天上憶鷓斑向晚同仙侶風塵開  
笑顏

省郎新別業相國舊開基疊榭紛依岫孤亭迴在



池禽魚如有意花柳亦多秋隔水聞吳詠停盃繫  
遠思

自華山移蓮花小池中花開對酒漫賦

照日娟娟淨含風冉冉新葉輕搖翠羽花密映頰  
鱗不見若耶女虛疑洛浦神分根自靈嶽標格信  
無倫

官舍枕高岡南山對鬱蒼地偏人習靜政簡日餘  
長泉引天池液花分玉井香醉來狂較甚烏帽狎  
紅妝

織女詞

悵望頻經歲娛情屬此霄七襄雲作幔午夜鵲填  
橋解珮歡逾舊支機恨未消殘星猶在戶天路警  
晨驍

華陰行臺對月望西嶽作

踈樹暮烟輕岩峩山近城蓮花向晚碧桂魄麗空  
明仙掌猶東握天河自北橫何當驟鹿去華頂坐  
秋清

和孫侍御臺端晚步

停驄眈眈聽飛藻貴巖阿月滿三秦路冰開九曲  
河出關瞻闕近隔水望雲多翻媿巴人和空聞白



雪歌

風夕感懷

歲晚風聲烈霜林與雪濤  
棲鳥隨木下叫鴈出雲  
高世事看殘奕閒愁破濁醪  
壯懷知漸減有夢到江皋

立春

特際貞元會陽回秦地寒  
春風夜堂入臘雪曉山  
殘折栢浮新醕裁花插敝冠  
鬢顏驚歲改引鏡避人看

答曾子學

大雅久離群交遊罷論文  
嵯峨瞻曉霽涇渭隔春  
雲乍見驚衰鬢相將戀落曛  
同心幾人在別後倍思君

地結重關險河迴九曲文人烟  
低傍水雉堞上侵雲中語  
通佳氣西峯倒夕曛登臨  
春正好著屐擬同君

來詩云欲縱登臨日何人可共君

登潼關山樓

欲覽三秦勝先登百尺樓  
雲低依華頂水落見河  
洲漢業衣冠盡唐墟禾黍秋  
英雄不平氣風乳象山頭



河出龍門駛山連華嶽雄風塵關月暗搖落塞雲  
空三省封疆會殊方驛使通客心馳萬里渾欲附  
鷓鴻

守歲

吳地家千里秦關歲再除寒更催臘盡和氣襲春  
初思逐梅花遠顏酖柏葉餘年年慙建立默默念  
居諸

元日

律轉三元日人逢道泰年辛盤皆客味椒醕是春  
延嘉樹含芳早鳴禽得氣先關中攜都會雨露若

為偏

脩園會餞留別席上諸公

靈石嗽飛泉江雲澹遠天幽心一鳥喚春色萬花  
然共適投閒趣翻驚餞別筵悠悠京洛路挾策愧  
當年  
宦拙厭遨遊時違國未酬樗材寧足任疲馬欲何  
求脩竹山中社浮萍江上舟鄉心與朋好一倍攬  
離憂

贈富陽桂令

於越論繁邑富津是富春榛蕪征戰地窶瘠闕羅



人城息河陰盜簾清顧令塵佇看登拜去烏鵲擁  
車輪

孤山林處士

昔賢嘗避世棲遲湖水濱山孤雲共住市遠寺為  
隣鶴報同心侶梅傳隔歲春祇今跡影下猶憶看  
花人

送王尉

客思秋來別那堪復送人青楓袍色潤黃菊綬文  
新重器唐師德仙曹漢子貞只今猶異績莫謂等  
風塵

巴東道中

巴東百里道信馬踏江濱小隊投林麓孤亭宿水  
雲市燈星共燦客帆語相聞後夜巫山月回看楚  
蜀分

夷陵渡江

一問夷陵渡渾忘鳥道中自疑生有翼忽漫上凌  
空日日礚礚逕山山虎豹叢險難隨地有無事畏  
川東

玉泉寺

路轉聞香霧遙知竹院深望山全隱樹入寺迴依



岑澗落飄晴雨鍾鳴散午陰頻令車馬客亦有脫  
塵心

歲暮玉局觀隨諸寅長同遊

錦官城下路司馬舊題橋歲晏多休暇幽尋屏市  
囂聽猿川月暗望鴈越江遙共是同袍友風霜耻  
黑貂

叢霄新道館玉局古仙都出郭心先愜登臺景復  
殊林端清磬落江上暮雲孤舉酒當歌吹狂來識  
故吾

山勢西來遠溪流夾路迴霜空踈岸柳日煖靚江

梅絲蟻先春釀清歌向晚催盍簪同萬里笑口一  
時開

見梅

蜀國三冬暖江梅已著花溪橋停駟馬攀賞到仙  
家白處飛爲雪紅邊聚作霞孤山凡幾樹吟望隔  
天涯

覺林寺

日日紅塵裏迷途有覺林路幽蒼蘚合殿迴白雲  
侵貪佛留僧飯思歸學鳥首艱危經欲徧祇自不  
抽簪



送闡帥王君入賀 萬壽

聖壽雍熙日嵩呼岳牧同孤帆已子國萬舞大明  
宮虜避燕支北鯨潛滄海東將軍信忠義莫自念  
無功

棒表行經棧道

鷄關通鳳嶺峽裏澗尤深地僻稀人跡林空足鳥  
音疑雲歛壁斷斜日半峰陰賴有平生興勞勞無  
苦心

崖傾石欲摧樹蔭磴多苔風急虎聲厲月高猿嘯  
哀井參天象別棧閣鬼工開自昔多羈旅無端我

亦來

盤空路已迷樹杪接天梯信步氣猶壯回看意轉  
悽萬重穿紫栢百折繞青泥最是山深處陰沉日  
易低

磋砑千仞外復上七盤關驟雨忽滿地霏烟初下  
山帝猿愁莫度飛鳥倦知還飽歷危途客翛然意  
自閒

一步一瀕危危多心轉夷路從雲外落影任鳥邊  
移玉帛千秋使衣冠萬國時趨朝亦隨例敢謂竊  
恩私



善繪事者作釣臺西湖海潮鴈蕩四圖皆吾  
鄉佳景往時孫侍御斗城嘗招余入鴈山未  
赴閱之感懷各系短章未致此意

爲憶投於越行瞻舊隱居臺空雲澹蕩秋晚木蕭  
疎鼎繫綸竿上星占帝座餘掛帆湖正駛風浪却  
慙余

十里重湖映千山曲袍城樓臺雲外影簫鼓月中  
聲酒喚當壚婦朋呼出谷鶯分明圖畫裏自棹小  
舟行

江盡遙連海東來白浪生雪移天際色雷撼地中

聲射弩功非偶倅鷁恨未平風波一過眼徒有濟  
川情

時憶孫登語能傳鴈蕩奇峰連碧天淨泉與白雲  
垂招隱勞朋舊追遊寄夢思浮生本無定莫謂負  
心期

武關懷古

沛公初王漢此地失淮陰共是人中傑能勞月下  
尋樊橋溪作限馬道石爲林不改當年舊懷哉將  
相心

草涼樓



深峽開仍闔飛橋斷復連  
崔嵬千嶂下掩映一樓  
懸長夏風生樹晴空雪噴泉  
客行方苦愠暫解竹  
窻前

扶風吟

一入扶風境慙為豪士吟  
擒王馳漠北射虎獵山  
陰往歲平蠻績年來躍馬心  
明君終自念蒼艾莫  
教侵

題陳醫士長春圃

自昔仙人館今開大隱家  
碧生無意草香散有名  
花奏曲馴魚躍飛鶴狎鳥  
譚方春期數過幽徑未

云賒

寄槐亭

嘉樹本喬枝清姿照陸離  
襟期一以洽構結自相  
宜適意林中鳥關心局上  
棋別來多鬱抱長夏有  
餘思

呂克厚哀挽

信是康城夢仙遊歲在辰  
青山雙屐冷黃土一坏  
新名秩身何有芳華世所  
珍日暉風雨暗延佇欲  
沾巾

贈趙州許判官



我往投三晉君遊亦晉墟  
爾分雙闕袂同捧一除  
書結駟王畿裏行春民事餘  
嗷嗷需牧養何以慰  
閭閻

友泉

何物非吾與名泉自適情  
濟時分潤澤比德象通  
明月映穿林色風傳激石聲  
塵途多濶濶莫謂獨  
余清

芋原別游許二省長

爲是同心好能憐去意遲  
墟頭沾臘味江上探春  
枝物態已如此芳華湏及時  
蹉跎歲方晏延望有

餘思

津亭分袂促舟楫  
沂江遲柳引風生  
樹梅飄雪滿  
枝素心徒徇祿  
華髮尚憂時  
寄謝平生友  
離居幸  
見思

宿延祿寺

山迴初地湧遠梵  
落微照月投林莽  
聞香欵竹  
扉無生真慧覺  
習定幻緣非  
明發披風露  
徒嗟心  
願違

重經筆陰

三峰俄在眼古邑復經過  
猶說滄桑變相逢感慨



多潼津寒氣歛柳陌瑞烟和心賞不再得徒令勞者歌

野寺贈王生

悠緬三秦路清和四月天駟車方息駕雙樹即棲禪蚤檀金華譽時傳白雪篇風期知有托幕府正籌邊

我本江東客欣逢江畔人投瓊非宿諾傾蓋易相親摘藻愁花鳥採竒薄漢秦笑彈長鋏去何處有烟塵

偶過臬司學甫留酌

嘉樹翳華省中庭五月涼朋來乘暇豫興至引壺觴厭俗玄襟洽論文藻思狂更聆吳苑曲不道客咸陽

竹溪

龍種分淇澳蕭蕭脣石谿輕陰含水淨細浪拂枝低引與供深酌從人刻舊題秦川正羈思延睇暮雲迷

金佛峽

金佛當年峽遙瞻山鬱森今經叢樹杪古道亂流侵易識升沉理能忘險阻心勞勞倦遊地出塞一



起未古

長吟

問月亭

散步池亭上，東來月一彎。  
青天不可問，綠酒自怡顏。  
影轉蕭疎樹，光搖遠近山。  
沙場有征戍，莫遣到榆關。

以詩代書謝四兄寄鏡時爲周府教授

寶鏡金函護，名香鏤作臺。  
殷勤千里外，塵埃一特開。  
絳帳橫經後，梁園獻賦來。  
相期同不淺，莫訝鬢顏頹。

次韻答沈鴻臚

詩篇椎正始，今復見雲卿。  
錦字湖天遠，塵心淮海清。  
算鱸秋日思，猿鶴故山情。  
和靖廬邊社，因風憶友生。

田節婦

昔我垂髫友，猶懷田氏荆。  
芳華悲蚤謝，荼毒軫幽情。  
家有傳經子，恩沾表里榮。  
懸知歸化日，不負百年盟。

贈馬隱君

晚歲樂玄脩，名山每獨遊。  
朝同雲出岫，暮與月登樓。  
龍杖橫空去，砂床取醉留。  
悠悠塵壒外，何事亦



何求

公署新荷

二月見新荷田田出水多久知成老態強起試輕  
羅已射林箐隼還清海溢波感時憂思劇莫遣易  
蹉跎

歲晚七星巖熊鏡湖中丞同遊四首

出郭見青山盤迴蒼莽間牙旗檣草樹桂楫泝潺  
湲竄窺天光發崔嵬星影環塵紛暫時釋卮酒壯  
頽頽

乍入猶昏晦窮探始豁然岡臺高插漢石室煖會

煙北海留唐刻濂溪紀宋年登臨慙往躅何處覓  
飛仙

點點瓊峰峙熒熒北斗懸室中藏色象石罅俯雲  
天猿嘯煙嵐外龍吟頰洞邊良朋同勝賞自覺寄  
情偏

河嶽共風塵崧臺意轉親有星同照映無石不嶙  
峴頰作鷹揚氣尤宜豹隱身時聞氛祲息臘盡卽  
陽春

聞報漫述二首

詔解兵戎柄初闡喜欲狂頻年浮漳海計日倚慈



航細葛裁輕憤新荷葺舊裳北窻高卧處有夢到  
羲皇

寄語猿將鶴休嫌歸日遲不遑憐狗馬矢欲報恩  
私漸息陰霾氣行班海澨師老懷今弃置聊與慰  
心期

行經九里灣

九里十三灣沿迴浩渺間橫流無砥柱孤艇莫緣  
山豈學神龍逝聊同倦鳥還西湖招隱伴久矣薄  
衰顏

送陳中丞

督府銜恩去江城遺後思暗潮隨畫舫晴日動牙  
旗北斗清朝望南臺執法司雲山今隔絕何處更  
相期

山莊即事

歸老厭塵緣幽棲湖水邊竹深滋藥壠山翠落賓  
筵遲日穿雲屐涼宵載月船緬懷箕穎意歌咏樂  
堯年

送狄閫帥捧表行二首

淮右昔臨戎多君意氣雄六鈞緣肘上三略在胸  
中貔虎今吳越金湯舊鎬豐 聖皇方拊髀何處



奏膚功

衣冠馳萬國 聖壽及時康  
驛路梅花發 都門春日長  
擁麾過里第 把劍指封疆  
白髮湖山老 離心祇自傷

新荷

點點初浮水 亭亭夏出塵  
葳蕤宜承湛 露華不闕芳  
春本以若耶 種移來麴院  
新幽襟厭紈 綺裁取稱  
漁中

贈趙奉新

仕國已云暮 辭官何太輕  
柴桑耽酒德 單父罷琴

聲身與山同壽 心將水共清  
猶聞多著述 早晚子虛成

題名賢冊

愛看循吏傳 豈有澤民情  
却訝徐聞令 能齊王掾  
名蒸嘗洛陽 廟月旦汝南  
評萬里分吳粵 悠悠同頌聲

竹溪

種竹清溪上 水竹自相憐  
素志存三略 投閒等七賢  
猶懸北闕夢 早悟南華篇  
更有娛心處 簪纓舞筵

出語久典雅  
詩家最忌



曉齋

扶桑開曉霽五色爛雲霞煖送疑寒日光生大隱  
家 覃恩需祿養為壽駐仙車何用還丹術逍遙  
正未涯

採梅

點檢幽居事梅花信較遲孤山頻憶望東閣費吟  
思瘦影月中見寒香雪後知煖風今夜發卒卒到  
南枝

藩相柳文學枉過贈別

雲同歲方晏言別整淹留昔日淮南客今從梁苑

上洲  
連冰霜鄉國傳花鳥舊京樓賦就能相憶幽居海

題鴈

木落湘江晚逢天過鴈聲信風何處宿見月自初  
驚奮迅冲霄意喧呼顧侶情去來非不厭寒燠柰  
頻更

烟水磯上作

小築僅三楹門臨千頃平扶衰化龍杖未日爛柯  
枰盡識風波態能諧鷗鷺盟幾年塵鞅息無復颺  
心旌



送楊徵士之京

卧河湖上月避俗寡相憐有客來千里論交記十年  
玉標慙我穢清藻定誰先佇看長安道春風躍  
錦鞞

奚囊蠹餘卷之六



奚囊蠹餘卷之七

五言排律

蟠龍洞

何代生神物存身信許深繡崖懸洞口練瀑掛峰  
陰繚以剗利石封將松竹林飛騰餘化跡行旅得  
幽尋列炬參差見樞衣窈窕臨蓋浮香霧綴榻響  
暗泉侵驚繞千年蝟迴翔五色禽筍根穿突瓦乳  
竇下浸淫漸覺諸天近渾疑萬象森慙從消暑鬱  
輒有契冲襟媿以塵中駕而搜世外心終思蟠屈  
意亦是起為霖



弘濟寺

危巖懸寶閣煙樹隔孤村只尺凌霄漢千尋瞰水  
源海雲流淡影山雨散微痕谷靜春啼鳥湖平晝  
鼓龜估帆來遠浦漁榜送歸輪戀賞欲忘世棲遲  
授法門

鷺子磯

山上霏霏雨磯頭冉冉雲萬帆天際出雙鳥浪中  
分寶閣神工建仙壇異代聞迴洲繁樹色激石亂  
湍文竒立魚龍避差池燕燕群東南王業存宜鎮  
此江濱

有懷王徵君元案

洞房何窈窕深逕復逶迤直取書克棟偏將竹作  
籬高談揮玉塵清賞對金卮幾下陳蕃榻時臨逸  
少池如何千里隔尚負十年期逢子五雲表連鑣  
騁九達

遊東山

江上問幽蹤東山一逕通烟濤孤島外樓閣翠微  
中古洞薇香發清池屐齒空雲飛賢相塚月落梵  
王宮勲業蒼生望文章奕世雄千年遺像在彷彿  
見高風



登定州開元寺寶塔

十層天半塔卓錫自開元  
曲磴雲霞滿飛毫鳥雀喧  
中山低接市盧水澹縈村  
超忽皆空境皈依不二門  
風塵雙闕近漢達五兵屯  
徒倚成孤嘯幽懷誰與論

張母挽詞

霜委北堂萱堂空殊可憐  
褒書猶未逮鶉養竟難延  
就月雲霞窟騷鸞瀛海天  
途喧唯薤露山靜有啼鶻  
舊德庭前訓新封湖上阡  
遺將五丹住永以慰重泉

送張憲使之河南

使君憐意氣古道見于今  
結宜膠投漆同心別斷金  
憂時頻看劍對月共披襟  
標格殊懸照詞華上振首  
甲兵雄范略匡弼蘊周忱  
召命移梁苑交親祖華陰  
冰霜開憲節草木動春林  
泮水一千里關門百二岑  
因風思晤語何地更招尋  
鳴鳥牽情易踈麻別緒深  
青雲應自致白髮柰予侵  
幾望當津要能忘慰陸沉

送石右使之江西

行省移江右東南扼上游  
寒雲開峽谷春草徧汀



洲疆域雄吳楚輝光燦斗牛陽和無遠近惠澤有  
歌謳意氣投艱外功名交泰秋希文同後樂萬石  
是前修緣蟻淹朋好青驪攬別愁持衡埃新命旦  
晚下龍樓

哭亡兒

一自摧蘭玉徒然悔昨非生前恩遽絕身後願俱  
違名盛人應忌才高代所稀文章寧不朽猿獨竟  
何依歸思鴻先度悽心猿復啼亦知聚散理無柰  
淚沾衣

贈別舅氏野翁

平生冰玉誼臨別自酸辛共是天涯客翻為岐路  
人經年思一見兩月到三秦蹊徑愛榛莽關河惜  
滯淫日斜分袂處霜落授衣辰回首忽相失微官  
恨此身

送使臣出海封琉球國王

夏至乘風候龍旂下海濱片帆纔出澳積水已無  
垠開國三山舊恩封詔使新中郎初建節南粵故  
稱臣去憶人瞻斗行逢日在鷄禮先夷族順厚往  
睿情仁異域儀刑重遙天雨露均歸期小春月復  
此候通津



題畫梅贈友

南國多芳樹梅花冠四時靈山稱特秀度嶺復爭  
奇偃蹇虬龍幹參差冰玉姿豈無桃李艷故與竹  
松期比物懷良友留情是畫師一從圖裏見何異  
月中窺湖上林逋興江南陸凱思春來遺天素絕  
勝隴頭枝

梧鎮閱武

蒼梧秋獵處細柳漢家營四望千峯障迴瞻百雉  
城潦收江岸闊木落曙煙清雲擁旌旗色風喧鼓  
角聲虎羆皆振武征徂亦輸情無術慙三略膚切

藉五兵投醪非責報授鉞柰專征試把剗犀刃聊  
藏鼓浪鯨

夏日王凌二君招集湖南吟社

結社南山下蕭然遠世紛偶諧泉石趣得與麋麋  
群小燕窺簾語新篁遶徑芬長堤一水斷宿霧兩  
峯分國士吳公績詩豪晉右軍持觴夸聖酒學道  
證玄文笑傲娛長日聲歌煥綺雲回看郎陳迹延  
賞坐餘曛

再賦得書字

社集耆英舊人增衰朽初績文皆錦綺畜德是瓊



居諸晴晝重湖映遙天小閣虛竹陰迷淺逕草色  
蔽前除柳轉呼名鳥荷翻聽樂魚玄真宜釣艇廣  
德侈懸車春水平堤後梅風送雨餘留歡寄觴咏  
永日戀郊墟多病常資藥忘筌亦效漁年光渾易  
邁良晤莫教踈

弔阮中丞祠

兵戈十年事悽惻尚堪論海湧鯨鯢浪城號將士  
魂煩言方訛訛廟勝亦喧喧幃幄擒王冊閭閻按  
首恩勲勞新史載俎豆故民存何處尤遺澤萊公

守北門

瀛海篇

瀛海神靈窟瑤池秘錄仙幢飄金母駕霞拂王妃  
筵貸氣成玄妙怡真合自然草香皆五色桃熟正  
千年錦組能雛戲絲綸有鳳傳耆齡渾未艾方至  
比長川

贈王醫士

松下聽鳴泉仁淳世澤延囊收五藥滿技擅六微  
專姓與名都舊聲將奇效傳十全歸上術濟美屬  
丁年悟得醫中意還叅玄復玄無因酬德誼授贈



愧瑤篇

世德覃恩

江上多名勝桐陂本 帝畿人文遵道藝簪紱擅  
芳菲纘緒功何偉開先志不違賢聲碑載後丹誥  
鳳將歸種德元非偶重光代所稀佇看登昂鉉世  
世渥恩輝

七言律詩

廷試即事

金鑰傳呼出禁城銅龍乍啓五雲明香飄合殿趨  
鶴列樂奏鈞天協鳳鳴溫詔正需匡世策腐儒亦

飫大官烹漢庭敷對今誰似擬效天人媿未成

讀五倫書有述應制

聖主乘乾惜寸陰石渠經籍娛宸襟五倫時閱  
唐虞典一敬潛孚克舜心已沛江河通要道更揮  
星斗寄高吟賡歌忝竊夔龍後愧乏雄詞動士林

日暮

旅館無聊自掩扉踈櫺新月坐依依誰家鼓吹隨  
風入小徑車塵向晚稀作字無奇慙救篋病心方  
渴憶初衣萬年枝上珍禽滿獨鶴西飛何處歸

新江閱戰艦



颯颯西風薄霧收晴光遙映五城樓隄喧鼓吹黃  
龍舳樹隱旌旗白鷺洲六代繁華遺事杳兩朝勲  
業故宮秋貽謀尚習昆明戰萬里無波江自流

送蔣石庵司空

東吳自昔擅鄉評誰復維揚循吏名白簡星臨南  
國頌黑貂風振北臺聲素絲到處傳清節畫省由  
來仗老成江上飛蓬瞻不極三台高擁五雲明

王廷尉擢少司徒贈別

石頭城下晚風清潮落秦淮畫舫行帳別無由紆  
繾綣懷人空復念瑤瓊釋之德已孚廷尉平叔才

堪二地鄉此日度支方告匱誕章何以答承明

省居

清修曾是淪幽寂人境由來可避喧山擁蟠龍依  
秀色水通朱雀是靈源守玄自擬揚雄閣抱甕誰  
同漢叟園九鼎三元應頓悟草堂白晝坐忘言

至日齋居

水部清齋三宿同八能調律代天工葭灰已見陽  
爻復荔挺先將春信通地近紫庭宮漏永月涵畫  
省篆煙籠遙瞻北極依南斗搔首風前雙鬢蓬

登報恩寺塔同馮應房呂鳳儀艾治伯



南陵何處堪乘興，絳宇琳臺愜浪遊。危磴九層臨絕巘，飛甍千仞出長楸。洞門高度秋聲壯，天末遙看江水流。便覺六塵消釋盡，為偕三盃故淹留。

湖上偶成

明湖一別遠，江天望入雙峯興。已偏病足未妨攀，嶄嶄幽懷自合傍。雲烟松陰滿地懸，斜日雪霽空山響。細泉安得水邊三畝宅，門前垂柳繫漁船。

登飛來峯

長松十里晝陰重，引入飛來第一峯。洞裏紫霞明日月，天邊青靄插芙蓉。小橋不斷橫溪路，古寺猶

聞隔樹鍾。戀賞頓忘城市遠，歸途幾處暮雲封。重湖曉日淡春烟，萬頃平連浩蕩天。擬放蘭舟沿曲港，行投竹院俯危顛。綠陰密隱新鶯嫩，紅雨飛沾細草妍。處處青帘村釀熟，已拚沉醉藉花眠。

丹陽道中

西湖漫擬恣春遊，南國仍浮萍水舟。千里煙雲延迴眺，孤村風雨攪離憂。香隨去馬花全落，浪閃前旌麥向秋。何處淒清三弄笛，殘霞樹杪映山樓。

句容道中

日落丹崖倚桂橈，星軺忽是轉蘭臯。空山縱馬無



荆棘岐路聞鶯有鬱陶紫闕聯雲搖鳳影清溪流  
水和松濤芳菲欲盡春多少驅逐年年感二毛

西行述懷

雲開遙望石頭城虎踞龍蟠擁舊京落日千山新  
雨霽春帆一片晚潮生才非何遜淹將作功乏平  
當愧水衡十載為郎虛舊社相逢空自說勲名

玄真觀蔭伯見過

中和橋下水濺濺玄真觀裏春可憐斷腸柳色青  
始足照眼花枝紅欲然羽客殷勤識玄度仙槎飄  
忽訝張騫忘年更遇王摩詰衆妙門中有宿緣

送魏郡守致仕還山西

茗溪新綠泛歸舟故國迢迢汾水流榮祿不堪淹  
五馬羊神自昔卜三丘一隨玄豹真豚隱萬里飛  
鴻汗漫遊風雨滿帆君莫訝山川猶爾解相留

紫雲洞

梯雲躡水費攀躋萬仞斜懸石壁危貝闕銀宮飛  
掩映紫芝玉髓照參差中天鶴唳開丹室子夜龍  
光發劔池此地分明隔塵世何人方外覓希夷

贈王少府守泗州

白蘋紅樹慘霜辰離思經秋倍損神泗水兒童迎



使節吳山風雨泥征輪懸知去後思何武為惜無  
緣借寇恂莫遣私懷重鄉邑江南江北總斯民

冬日羽伯席上鏤銀杏作蠟梅花分韻得安  
字

華堂良宴恣清歡素果雕花取醉看浪喜寄春逢  
驛使虛疑先煖是長安氤氳蠟色和尊泛宛藉丹  
心入夜寒試把一枝登上苑紛紛剪綵不堪觀

一隅為張文憲作楚人也

蜀國長辭供奉班城隅深掩薜蘿關林中曲引沅  
湘水窻裏平臨岫嶠山白雪吟成江鶴唳滄州情

狎野鷗閒猶聞此地連星漢看爾乘槎牛斗還

天長道中

氤氳宿霧引星旄烈烈雄風攬客袍何處烏鳶勞  
隼擊專城操宰媿牛刀林中望氣知豐鎬水上聞  
聲見桔槔總是 高皇根本地雍熙民物荷鈞陶

烏江謁霸王祠

野雲飛盡楚江頭萬木森森蔽古丘廟貌于今猶  
叱咤英雄自昔恨鴻溝陰銷霸氣非亡范天啓弘  
圖故屬劉興廢本來成幻迹青山黃土總悠悠

早春郊行東宴東之僚友



郊原斲試行春騎野色平分出郭橋南陌柳條黃  
露杪東風麥壠綠舒苗蜀山隱隱朋心切泗水悠  
悠客路遙寄語高情晏平仲一尊逢爾醉花朝

暮春高井晚行

春來常日惜花飛馬上驚看綠已齊草裏鳴泉新  
雨後林中歸鳥夕陽西柘皋月出鐘初靜滯塢雲  
深路不迷自喜民淳安拙政何妨輪蓋數沾泥

壘前韻答吳叅伯兼乞題卷

森森平湖綠遠墩陰陰花柳蔽高軒幽心自愛濡  
須塢壯歲歸從金馬門夜月玄真棠木檝秋風元

亮菊花尊定知有曲流金石塵吏猶能乞贈言

遊蜀山同孫節推

郡城西接蜀山頭夏木千章蒼翠浮蜃起南巢疑  
貝闕水環神姥即青丘勝遊不負三年約塵事聊  
從一醉休旋闢荆榛攀絕頂望中雲日迴關愁

舟中感懷

幾從期會戀重遊淮甸孤帆及早秋積雨平湖侵  
遠岸暮蟬衰柳滿滄洲廣陵城下隋宮杳漂母祠  
前楚水流風景依依思無限夜深涼月送歸舟

晚投龍城寺



晚煙低護林中寺，微月初臨陌上旌。  
千頃平田圍法界，一灣流水入龍城。  
疎鐘聲裏僧相逐，小隊行邊犬不驚。  
笑倩山家問生計，漫誇耕耨得秋成。

中秋值雨

領邵何方散積憂，擬邀白月注黃流。  
霏微轉覺增蕭颯，河漢無緣望斗牛。  
雲裏蟾蜍應不滅，天邊蠅蝮竟誰收。  
從知顯晦非人意，空憶當年庾亮樓。

高郵道中感懷

遠天秋水共蒼茫，地憶頻遊似故鄉。  
近海人煙隨草沒，信風帆影帶雲揚。  
農家網罟鮮為食，女伴提

攜笠作裳旱，勞年年非感慨一聲新。  
鴈落寒塘

自盱眙山晚投火橋鎮

山程盡日遠嶙峋，山下孤村半水煙。  
投止乍驚離犬吠，如歸莫得野人嗔。  
潮侵古道迷行騎，禾沒平畦隱釣綸。  
滄海桑田等閒事，憐予亦自久沈淪。

秋行懷郭黃州

隔歲不逢梁苑客，時驚蕭颯倍離思。  
廬江水冷楓全落，衡岳雲深鴈較遲。  
摩詰遺情唯妙墨，休文多病廢新詩。  
應同禹服趨周典，攜手龍墀定有期。



三才圖會餘卷之七



國家圖書館, NATIONAL CENTRAL LIBRARY, TAIWAN, R.O.C.



奚囊蠹餘卷之八

七言律詩

客瓜州江樓

高閣瀕流四望開  
魚龍噴雪自東來  
風帆欲送千山雨  
鼙鼓驚聞十月雷  
歲晚江鄉人事絕  
天空雲樹客心摧  
還將愁眼窺三尺  
猶有晶晶燭上台  
十日江干遇亦奇  
萍踪飄泊本難期  
海門潮落龍游淺  
鄉國雲遮鴈度遲  
多病著書成底事  
登樓作賦更堪悲  
三峯只尺風濤外  
擬上輕舸縱所之

登金山



長江浩浩接滄溟砥柱中流擁地靈風捲夜潮千  
丈白曉涵晴曙一峯青中冷汲水僧遺鉢古洞尋  
仙雲滿扃塵世浮沉何足問纔登彼岸已遺形  
頻過江上望龍游忽漫乘風散暮愁金鰲倒吸水  
不斷銀漢斜傾石欲流雲樹高低天上下帆檣隱  
見地沉浮三吳只隔煙濤外徙倚重登絕巘樓

答王元采

芝房荷沼重登臨入座如聞太古音蔭滿綠槐迂  
反徑聲傳黃鳥恰芳林三秋雲樹他鄉夢廿載金  
蘭此日心投贈未將桃李意瓊瑰翻愧郢中吟

移山潭作

逶迤石徑遶林坳回合峯巒面面青地劈半山當  
四塞天開一鏡引飛亭長安日遠紅塵靜少華風  
微翠靄停獨往自憐幽興劇何人先此載春醺

送程于民南還

十載還家未是遲鏡中霜鬢欲絲絲青山舊社林  
逋宅白馬新鑄杜預碑野水帆檣風自穩故園松  
菊晚偏宜秋來亦有尊鱸思三徑憑君蚤見期

白水公署

泠泠白水舊彭衙粉蝶山樓仄徑除蒼頡塚荒惟



鳥跡雷公丹化憶仙家西來羽檄驚霜月南望鄉  
心逐晚霞涼夜有懷渾不寐柏臺曙色喚棲鴉

青柯坪

華山谷口晝陰陰危磴盤空草樹深倚杖何緣攀  
鶴馭尋泉時忽聽龍吟炊煙縹緲雲連郭仙路高  
寒風滿林緩步三台依石室翛然悟得子微心

雲臺觀

雲臺直上接三峯古柏森森夾路濃碧斂晴分華  
頂色飛泉曲度水簾淙鳳簫遠引清虛裏鹿駕渾  
疑幼眇逢日落輕陰生洞口青山回首失歸蹤

答彭隱君孔加

驅馳魏博復秦疆百二山河控晉陽猶憶澶淵虛  
鎖鑰頻過馮翊媿循良百年道誼心期舊千里蘭  
言尺素香便欲歸來尋舊侶五湖鷗鷺共飛翔  
萍跡浮沉三十秋衰遲却憶少年游空山夜雨同  
僧室野水煙雲放釣舟皎皎白駒終自賁嚶嚶黃  
鳥故相求海波未息鯨鯢在避地今棲何處洲

九日河中書院讌集

西風搖落已堪哀更上天涯百尺臺歲序自驚黃  
菊候淹留不厭白衣來三河遠接秦關險二華平



分晉旬開盡日登臨未能賦叨陪直忝大夫才

### 萬固寺

首陽西下見河流萬固禪林山際幽飛澗遠從秋  
殿落野雲低接暮煙浮塵中幻跡渾無定方外心  
期且自留徙倚遙空聞過鴈蛾眉新月照人愁

### 華州值雪

山城飛雪凜生寒客思悠悠怯歲殘花滿踈林凝  
瑞色漸流巨壑壅驚湍散棗不厭尊中酒短髮猶  
彈陌上冠却憶故園梅正發何因寄向隴頭看

### 冬日登華山

三峯壁立與天齊雪滿空山信步躋玉井吐花明  
碧漢石門飛瀑洒丹梯近人猿鶴調絲竹出岫烟  
霞擁杖藜擬向仙靈問真訣珠幢絳節望中迷  
路入青柯挹紫氛西玄深處覓裴君從知軒冕非  
身計已覺仙凡此地分峪裏寒光生積雪林端清  
吹住流雲持觴正對龍潭月山郭踈鐘不柰聞

### 莎蘿坪

羅繞嶢岵莎映川寒山蒼翠晚猶鮮黃雲影落三  
河水青靄光搖十丈蓮御道草荒餘漢跡宮娥仙  
化憶秦年紅顏羽翰尋常有醉把金盃漫自憐



潼關閱武

較武來登大將壇請纓已覺媿衰顏  
貔隊擁風塵裏鷹隼心飛霄漢間  
鼓角喧嘶秦士馬旌旗披拂晉河山  
九邊烽火三秋急細柳何時金甲閒

歲暮述懷

間庭退食獨踟躇雨雪霏霏逼歲除  
江海烽煙遮故國關河魚雁滯鄉書  
病餘引鏡顏非舊愁裏開尊意未舒  
自是無心戀榮祿不因官拙憶吾廬

玉陽山房

虬鬣峽裏望逾深一徑平分萬竹林  
雲護丹爐春

自煖山園草閣晝常陰池邊淬劍沾龍沫  
洞裏吹簫協鳳音信有仙靈會人意故開巖壑寄幽心

玉女潭

選勝言尋方外蹤迢迢石遠隱杉松  
清秋峽裏仙槎渡夜月樓中帝女逢  
風動水紋通絕壑雲連樹色擁危峰  
飛騰應藉神靈境面壁他年倘見容

眉山贈孫醫士

蛾眉影轉鬱蒼蒼見說仙人構草堂  
夜雨青苔生石磴秋風黃葉到山林  
薜衣常帶煙雲氣蔬食能兼藥餌香  
鴻術本來堪濟世非關思邈舊遺方



孫文揆同登越王臺

越臺脩聳費躋攀隱隱峯巒臺下環烟火萬家城  
郭繞畝田千頃水雲間林端佳氣東連海郡裏高  
齋半在山為憶霸圖勞夢寐壯心聊與共怡顏

宜松

徂徠分植地偏宜高蓋亭亭貫四時春入詎同桃  
李色歲寒無柰雪霜姿採苓磧底開靈窟放鶴山  
中識舊枝何用還丹尋秘術伏脂佳實並仙資

南明寺末戶同遊

南明仙梵隔山聞石棧逶迤雙澗分巖洞何年開

色相花宮鎮日坐烟雲松篁古峽啣新月燈火猴  
城帶夕曛莫恠淹留勞地主下方塵幻正紛紛

沈明府邀飲戒珠寺

為政心閑興亦賒招尋遙指石林斜涅槃空訝牟  
尼像題扇猶傳逸少家貝闕未忘同劍佩山城共  
是惜年華深杯莫厭留殘月明發離懷江上沙

秋夜子賜宅讌集得秋字

江城新月照清秋結客聊為長夜遊玉漏聲中聞  
鴈過丹楓影裏見螢流彈棋奏曲涼颼入漬酒沾  
衣湛露留萍跡自慚猶宦海鷗盟何日共滄洲



夜渡楊子江

寒江渺渺暮烟橫  
簫鼓喧喧戒遠征  
出浦帆飛風亦起  
中流潮湧月初明  
漁燈遠引鼉鼉見  
梵宇遙連島嶼平  
自媿機心尚塵網  
強將身比海鷗輕

蕙坡贈馬封君

九畹幽香聞楚澤  
尤憐芳蕙在山阿  
參差翠葉牽風細  
灼爍丹心向日多  
杖履常迷花密處  
琴尊不厭客頻過  
野梅籬菊猶搖落  
得似青青百畝坡

九日邀仲良童侍御登演武臺

佳節重逢菊正開  
朋來邂逅一登台  
猿城水引漳

洪遠千騎雲屯燕  
趙材南國尊鱸秋  
入思西山鼓角晚  
生哀明年此日知  
何處待月非緣戀  
酒杯兩峯高映水中  
洲昔我相尋洲上樓  
黃菊紫萸堪採摘  
沙鷗野鶴共悠悠  
虎符畿甸耽幽思  
驄馬長安憶舊遊  
同在異鄉君又別  
廟堂逢爾壯皇猷

九日偕僚友登上達樓作

郡庭無地遠紛譁  
一上高樓四望賒  
檻外丹楓凡幾樹  
籬邊黃菊已三花  
著書衡岳非江總  
落帽龍山想孟嘉  
暫遣殷憂忘局束  
莫將尊酒問天涯

孟憲使讌集紫陽山晚眺



朱欄絳閣白雲邊  
羅磴盤紆接洞天  
山外江明涵夜月  
城隅樹暝薄炊烟  
曠懷夙有探竒癖  
勝賞慙同命世賢  
擬謝塵緣希靜悟  
石壇遺蛻訪飛仙

巨石園亭讌集

寶石西來秀色繁  
到門烟水是湖源  
倚山亭榭圖書滿  
入座芳菲風日喧  
張具每勞騶從過  
彈絃時雜鳥聲喧  
投瓊勿枉陽春曲  
為憶霜臺玉樹溫

贈馮憲使晉叔入楚得餘字

登高疑望共躊躇  
尊酒仍留把袂餘  
踈樹影搖楓落後  
遠天聲送鴈來初  
胥江月白浮蘭舸  
楚澤秋

清照鷺車定有鴻勳副

當宁不勞魚素慰離居

贈殷醫士冠帶

名山採藥市闌君  
却訝城中兒女知  
豈有聲華聞魏闕  
謾勞冠冕賁江涯  
禁方早出長桑授  
秦俗時從稚子醫  
更習玄文探衆妙  
擬排塵累托師資

赴丁徵君招賦贈

操舟北郭見朝暎  
倚棹西林暮色昏  
家起垣薇傳舊閱  
庭開叢桂識芳村  
何因誤下陳蕃榻  
乘興來過安道門  
笑語不知寒漏永  
管絃燈火夜堂溫

丁孝芳宅讌集



畫棟朱簾瞰綠波故家喬木上簾蘿乍驚越客懸  
河論暫醉吳兒子夜歌世路浮沉何足問舊游零  
落已無多良宵樂事應同惜斜月西軒容易過

送許叅伯赴京得遊字時予將入蜀

使旌二月覲龍樓余向三巴鳥道悠岸草津花迷  
遠望巫山巫峽記曾遊中朝香舊多同學藝苑芳  
華信莫儔此去盛明良得遇題書先慰錦江頭

巴東見王叅伯題壁詩用韻寄懷

仄徑盤迴崖半開行邊燈火見樓臺綠江雲樹楚  
天盡下峽風濤巴水來已歷危途猶信步欲忘時

事但持盃故人應是傷遲暮我亦霜華入鬢催

昔蘇子由再寫真記容貌之變題詩兄意予

三十出守時京師李生為寫一幅今年以按

察副使入賀復遇李生因命再寫相隔十餘

年容貌之變可知矣偶同蘇事用韻漫題

再度生綃點畫新妍媸何似昔年身易凋容鬢星  
霜改不涅風塵意氣真瞋目定憎撻俗累冥心聊  
自葆元神笑看信是無魁岸那得聲華動世人

表賀得與宴賞恭述

璫函親捧建章宮拜舞繽紛望六龍曙色漸移三



殿上爐烟不散五雲中大官錫宴賓儀肅內鐘傳  
頌 帝澤濃自辛衰遲猶在列君門今有姓名通  
重經咸陽述懷

西來萬百見南山東望三峯縹緲問往事祇今同  
水逝舊道別後幾人還機心遠憶沙邊侶倦翼仍  
趨天上班猶自節旄稱漢使不因零落媿秦關

蜀府元旦

重城曙色靄陽和身曳長裾習委蛇碧殿王孫天  
保頌素絲藩采萬年歌春先蜀國梅風煖禮洽梁  
園栢酒醅遷客獨慚頭漸白九霄雙闕想鳴珂

訪張中丞里第賦贈

梁園一別願多違節鉞何年塞上歸楚壁墜珠空  
按劍青山白社自高扉曾驅貔虎摧堅陣暫解韜  
鈴狎舞衣聞道天驕問司馬丹書遮莫到漁磯

秋夕獲鹿公署書懷

麗譙鍾鼓送黃昏市罷山城夜不喧鴻雁西風鳴  
客枕芙蓉秋水憶家園喜逢 皇極標金殿更息  
邊烽敞玉門起視星河搔短鬢紫微光映五雲繁  
間義四兄分教松滋寄懷

荆南博士領新除白首青氈計未踈匡鼎說詩猶



拓落張顛妙墨近何如  
蜚聲共惜行分鴈  
彈鋏今知食有魚  
擬效場師養梧櫝  
莫因松菊戀鄉廬

何中丞荷亭

炎涼何地迴難同  
暫避喧囂草樹叢  
檻外池光侵篔簹  
綠掌中花氣溢  
杯紅林扉影落西山月  
絃管聲傳別院風  
莫訝荒蕪稀結構  
不將人巧奪天工

固原道中

俠節橫戈值素秋  
撻金伐鼓震邊州  
烽煙慘淡通沙漠  
山郭威夷見戍樓  
榆塞雄風嘶漢馬  
蕭關新月照吳鈎  
書生夙抱平胡志  
幃幄今慙運一籌

大佛寺

涇河曲裏轉崔嵬  
巖洞陰陰水上開  
地湧十尋雲外影  
身遺二世石為胎  
然燈自照禪心寂  
聞梵翻驚妄念回  
為祝西方皆樂國  
清秋風淨息氛埃

和許使相新穀陪祀值雪

禁城飛雪媚春光  
應瑞先占百穀穰  
玉槭兵差迷輦道  
壁門照耀引宮廊  
輕沾委珮暉暉潤  
暗逐爐烟點點香  
始覺高寒依北極  
鳳池鷓鴣忝班行

淮陰答鄧元學

白鹿幽棲夙有聞  
玉堂賡和更超群  
結廬擬效孤



山隱理釣還期渭水勳吳苑天高江漠漠淮堧秋  
晚月紛紛懸知不減冲霄氣肯向雙峯老一雲

大梁別張憲使

炎日炎方萬百行祇將萍梗嘆浮生華峰燈火成  
前事梁苑殷勤是舊盟局趣塵途慚老馬翺翔雲  
路聽遷鶯清尊不惜臨岐醉回首茫茫空復情

姑孰舟中

蘆荻風生五月秋解鞍暫試水鄉遊珠簾畫舫蛟  
龍窟逐客歸心杜若洲多難擬將身避世老懷猶  
有劔冲牛年來悟得浮漚意一任江湖深淺流

梧鎮寄謝周諫議

淮甸兵戈暫解符銅魚再縮鎮蒼梧王師未報滄  
溟捷郡國空聞憔悴蘇老去青雲驚幻夢憂添白  
髮媿訐謨久拚初服調猿鶴猶自戎衣聽鷓鴣

重過飛來寺二首

凝碧灣頭一繫舟峽雲江雨晚初收猶聞延祚神  
功運無復軒轅帝子魯萬里塵踪惟抱病十年華  
髮憶重遊閑身乞得憂心在笑殺空山老比丘  
飛來古寺水雲中仙子樓臺梵帝宮畫棟參差珠  
樹遶翠屏羅列碧流通猿歸煙霧山堂靜屣去滄



滇潭影空我欲棲禪倚孤棹馳心猶在五湖東

元宵觀燈分得東字

春宵瑞靄蕩和風樓閣聲歌處處同寶炬光搖銀  
漢閨星橋影落紫衢通紛紛舞隊誇新態熠熠飛  
花媚遠空共喜兆豐逢不夜玉輪遮莫照城東

早春山樓社集分得青字

湖上高樓聚德星樓頭楊柳正舒青窻涵千頃銀  
為鏡座擁雙峯翠作屏歸老自慚耆德會移文無  
俟北山靈晚來擬泛輕舟去明月滿天煙水真

悼王思質

出塞天驕避漢兵擁麾東指海波清湯陰何意生  
鵬舉西蜀猶聞泣孔明 恩詔輝輝新澤懋封章  
烈烈大編成勲名終白歸麟閣莫動湘江弔屈情

贈竹泉

奕葉簪纓代所稀猶聞畫錦戀東歸青囊駐世資  
仙藥白髮還山息道機竹色泉聲供眺聽 紫宸  
丹篆渥恩輝興來倘憶當年侶好向湖頭共釣磯

立夏前一日曉山園亭燕集

花光草色映芳筵坐隱何當競一先盡日盤餐供  
笑語暮年朋舊洽林泉卷舒萬軸轉家遠蔽芾三



槐世澤偏明發春歸留不住暫時歡賞更堪憐

送張倅

東遊蹙與鳳池違西去津亭柳色微為政心同江水淨尋仙人向石梁歸三農共沐隨車雨五袴爭傳來暮衣聞道征驂湖上過莫將軒冕溷魚磯

槐陰新霽分得遊字

梅雨江南卒未休朝來茵閣厭鳴鳩西風鍾鼓傳僧院曉日簾櫳見社樓湖上馬蹄堪蹀躞槐陰人影正夷猶故園景物同袍友何處山川足勝遊

送吳憲副兵備江右

九重玉節新銜重千里瞻依袞頌違煙雨蘇堤輕蓋別雲霞滕閣使星輝風搏隼翻清江徼月滿漁簑靜釣磯出處不殊憂國念臨岐莫遣淚沾衣

贈醫士錢龍田

金錢詔賜尚依然不獨方書世世傳開府簾明馳譽早納言藝業渥恩偏飲池口授長桑訣調息心通內景篇莫道卧龍無潤澤江風吹雨滿山田



亥天中裝畫餘卷之八



國家圖書館, NATIONAL CENTRAL LIBRARY, TAIWAN, R.O.C.



奚囊蠹餘卷之九

五言絕句

剡溪曲

人  
方舟迴曲渚樹草蔽前津  
忽漫聞鷄犬何年避世  
秋  
百折桃花水水湧沙亦流  
猿啼千樹暝清冷四月  
世  
長年習水程遙指遠林際  
到來烟霧迷不是人間

題畫



杖履芳菲逕琴書薜荔闕空聞能避世此地亦人

間

黃鳥綠陰中鳧鷖點碧空正歡新釀熟窻底落飛

蓬

倚石復瀕流村深事事幽開門驚客至掃盡一庭

秋

雪色瓊林映梅風素幔開詩成有餘興春自隔溪

來

挽江處士

市闌今寂寞松檜掩泉臺萬事隨花落千年化鶴

來

周墓六景為用之作

越臺春色

千仞越王臺蒼蒼露林杪春風杜鵑花鶯聲出華  
表

葉塢秋聲

爽籟振丹楓空谷散清響昔賢有遺芳茲山高可  
仰

高峯拱秀

天目走神龍危峯矗湖洩翁夢映潛臺陰陰瑞烟



裏

雙石呈清

群山開翠障雙石峙青螺一自開靈窟千秋迴不磨

石膏斲雪

鬼工剗石竇和氣結瓊脂何異陰山雪凝寒無四時

陳洞脩真

斷崖蒼蘚合古洞白雲封希夷有真訣此地憶仙踪

日暮

九陌靜飛塵上林群動息鷓鴣何啾啾一枝棲未得

題畫

朱實薦瓊枝文禽表佳瑞寧知造化心丹青得先寄

見歸鴈

塞北家仍在江南路幾千羈人曾似爾花草見新年

植花



白日東方來，隆景觸花杪。陡然掣清風，柔含舞晴  
曉。綠葉日蓁蓁，蒼枝風嫋嫋。香散競遊蜂，林疎不棲  
鳥。

題畫

叢林春色滿，列岫曉烟浮。路入雲中斷，山居雲外  
頭。隱鱗藏踈雨，清冷漾淺波。度橋城市隔，入谷水雲  
多。澄江幾萬里，清秋素練開。一覩飛帆落，渾疑天上

來

北風摧萬木，窮陰雪霰濃。亭亭色不變，惟有大火  
松。

宮詞

明鏡照芳顏，纖腰怯華飾。不洽魚水歡，自憐嬌艷  
色。

當年傾上國，六宮多見妬。長門恩幸踈，無人惜衰  
暮。

朝從九柞遊，暮入長楊宿。柞枝心未舒，柳葉眉先  
蹙。



題畫

終南列翠屏招提族雲樹溪橋引杖藜莫是來玄  
度

日麗五雲表下照信無垠高岡一鳴羽聲亦徹蒼  
旻

田家嘆

禾實苦秋霖浪喧隄不茸雲沉水底黃腰鑣隴頭  
立

雨浸禾不登水深魚自長耰鋤妨我生買絲遠結  
網

題畫

踈樹攬秋風浮舟漾碧空本無垂釣意長嘯送飛  
鴻

萬木散秋陰一江分曉色有琴不忍彈同心苦相  
憶

盛莖八景為盛司徒作

鳳石朝陽

炎精孕丹穴翩翩披五采化石鎮東方正當日出  
海

獅崖暮雪



懸崖俯群峯雪花蔽蒼翠何異神虬蹲百邪不得肆

古井甘泉

石欄廻古甃瓦甕汲寒漿莫以甘先竭人閒忌澤長

仙橋活水

潺湲山下水水上架飛虹寄語山翁道仙源此處通

虎跑靈跡

靈獸留奇跡玄泉迸石鐸往昔飛僊人于焉托蟬

化

兎河風帆

森沉迷草徑肅穆闕宮別有青冥路帆檣烟霧中

萬家煙樹

高丘接層巘日落風淒淒回看春樹裏萬井暮烟低

九華雲峯

合沓九華峯蒼蒼插天表倒影落潛臺青霞結林杪



題畫

梅護逋仙館桃開蘇子隄芳菲行處是何必小橋  
西  
湖上夏涼多微風揚素波流連煙樹裏何處採  
歌  
木葉下紛紛蒼山冑白雲坐深風景換流水蕩  
矐  
密雪颺寒輝孤村白板扉詩腸正枯結抱甕小  
歸

山莊適意二首

自把甘棠檝流連十二橋磯頭新月出尊酒任相  
邀  
五柳拂磯雲萬竹篩庭月小醉上逍遙湖山坐超  
忽







奚囊遺餘卷之十

七言絕句

出塞十首

涇原北望塞門秋  
漠漠沙塵暗戍樓  
羽檄不來瓊帳遠  
前軍夜獵海西頭  
套裏強酋誰著稱  
秋高月滿盡騎騰  
天弧正射貪狼首  
已報中宵走吉能  
邊城夜月聽胡笳  
戍卒寒眠萬里沙  
征馬驕嘶飛將出  
晶晶劔甲凜霜花

被甲鞬鞞控驪驩  
霓旌羽葆奮干將  
分麾白道蕭



關下何處飛來赤白囊

賀蘭山下騎如雲接地風塵慘不分  
腐巢聲隨征鴈過烏氏獨夜夢中聞

已散胡群赤木灣秦雲漢月滿  
關山翩翩羽騎歡聲近帳下偏裨校獵還

胡兒控馬復鞭駝虎視應耽禾黍多  
霹靂聲隨天將下盡驅渾脫渡西河

車騎將軍出朔方合圍正值右賢王  
犬羊夜潰驚烏盤鹵獲朝來獻白狼

樓蘭邀濮未成擒已見渾邪并深陰  
聖主威加

漢元符無勞衛霍快雄心

時有降胡授官

黃鬚燕頰並超群試排昆吾動斗文  
日媿書生非一范聊將肝膽誓三軍

題畫

為憶西湖深復深蒼山迴合樹陰陰  
落花點地穠於錦坐對飛泉抱膝吟

蒼松碧梧高十尋千岩萬壑澹晴陰  
偶來避暑長林下賸有清風披素襟

日日風塵攬蔽裘蕭蕭霜鬢縮閑愁  
忘機羨爾山中老倦倚耒耨看水流



朔風烈烈雲隨馬瑞雪紛紛花撲衣已歷游塵清  
玉宇更交新月映寒輝

華山逢道者

尋仙時上望仙臺十載玄關扣不開今日初成親  
授訣靜看離坎結嬰孩  
何須辟穀飯胡麻笑向天池弄藕花旋製錦囊盛  
栢露更鞭白鹿駕雲車

和茗山途中歌江南柳詞戲成口號

絲絲新綠褪輕黃披拂春陰官道長馬上同聲歌  
折柳好隨風絮到江鄉

紅杏花殘柳欲飛天涯無日不思歸道傍亦有芳  
菲處何似蘇堤襯馬蹄

題畫

野鼠參差競拾芳也知金粟自天香從教飫却飛  
仙餌不向空山三吐腸

雨夜

江南二月花如雨薊北三春雨作花深夜一聲思  
渚鴈隔林無數競棲鴉  
積雨凝陰二月寒長宵寂寂坐來殘獨醒應有張  
平子賦得閒愁祇自看



四時宮詞

淺紅深紫闌芳辰隊隊歡呼放賞春誰向後庭辭  
帝輦可憐含涕眇清塵  
積草池中競採蓮夜深烽火照甘泉鸞輿只隔池  
亭外何處歌聲落九天  
貪看牛女坐開襟斜月猶穿七孔鍼紫殿玉牀雲  
帳合昭陽惟有漏沉沉  
玉樓飛霰不禁風繡幙低垂鴛被重共說昭儀渾  
耐得綠熊深擁煖香籠

九月梅花

常年雪裏尋芳樹不信梅開九月中為避當春先  
百卉故將玉色向秋風  
秋風摧落不勝哀絕訝梅花向晚開商氣應隨萬  
木盡陽和見爾一枝回  
珠離玉綴狎霜辰月下風前更可人折寄隴頭君  
莫訝江南秋盡暖于春

漫興

子夜涼生魂夢清天風吹送繞蓬瀛忽驚月落催  
寒漏錯認長安鍾鼓聲  
桂院蘭房綺席開金尊玉姐艷歌催花陰弄月窺



簷下香燭和雲入座來

克州述懷

楊花零落嘆春歸輕逐殘紅小燕飛西發三吳東  
到魯朋心物色總成非

冬日東園燕集

蓮花峯下石嶙峋一派寒泉繞綠筠猶有紅香凌  
白雪山中疑是四時春

盡日寒郊遠市塵醉來吾自愛吾真機心唯有禽  
先會到處飛鳴不避人

雲中翠巘插丹霄竹裏朱欄鎖畫橋桑落酒傾清

玉璫霓裳曲度紫鸞簫

曲徑飛泉百道冷層林掩映萬峯青分明認得西  
湖路第六橋邊指北屏

宮詞

自分才非班婕妤知文寧讓六尚書君王偏惜司  
花女慙態由來太不如

曾將玉臂繫紅紗跳脫輕羅映彩霞一段恩私常  
著體笑他插竹引羊車

讀史雜詠十四首

竇灌田



繩引根批念薄情藍田潁水共縱橫寧知酒禍深  
相螫巫視徒傳厲鬼名

韓長孺

雪泣數言王國固然灰一笑忿心銷如何忽忽慙  
疏斥悔却貽金入市朝

李廣

夜呵醉尉死何知八百羌人忍盡詒降胡赤族猶  
遺禍莫道無功緣數奇

楚靈土

章華臺上厭甘肥九鼎分周願遽違右尹有謀君

不用傍徨釐澤獨號饑

楚射者

隼擊鷹搏勢未降楚雄戢翼在枝江小臣弋理通  
王霸咨繳彫弓射六雙

伍子胥

忘却稽山啓霸圖石田無用苦馳驅屬餽不死將  
軍恨的的雙睛看滅吳

匡衡

九上明經未是遲說詩贏得解人願書生封侯尋  
常事十載功名一遇時



田文

風塵客邸會三君齊魯諸生總未聞丙魏只今誇  
相業何如善相一田文

劉敬

羊裘脫輅說都秦片語相投號奉春不信黠胡能  
設伏却從齊虜議和親

叔孫通

狗盜聊將秦亥詒漢廷制度亦委蛇紛紛希世逢  
君術安得儒宗習詭隨

江克

紗縠禪纜雙羽垂誰言燕趙固多竒游魂幾萬啣  
鉗灼盡逐悲風入望思

張湯

蔽芾甘棠南國思孫僑遺愛泣閭閻寧佞三公自  
為計輜輶不載載牛車

趙克國

陷陣翁孫始計非金城方畧亦何遲分明支解羗  
胡策還似逡巡老漢師

朱博

博育相將入漢關殷勤結綬動長安當權容易開



新冢垂老參差失故歡

待羽伯不至

朔雲飛雪冷胡沙  
臘盡長安不見花  
何處折梅堪對酒  
春風不到野人家

渡濠梁有感

黃河渡頭爭渡喧  
盡逐南人上北船  
為是淮徐堪就食  
可憐故里空人烟  
平野蕭條蔓草黃  
逢人不忍問饑荒  
無端夢遠廬江畔  
一夜愁添兩鬢霜

題清河傅氏民居

茅屋疎林畫橋扉  
相看魚鳥共忘機  
無端擊隼集蜚鴻  
起惟底村翁樂事稀

過欽風臺

四海威行故里遊  
臺空沛國已千秋  
驕歌亦是東歸志  
莫漫逢人笑沐猴

望盱眙縣

千山萬山何鬱盤  
遠水近水相縈旋  
翠微一簇炊烟起  
花縣門臨星漢邊

揚子希聖為廬郡丞  
官舍舊有栢柏政暇嘯  
傲其下爰作間庭四友之記  
詞旨超曠真若



與物為伍者余聞之古人云鄉無君子則與  
雲山為友里無君子則與竹木為友座無君  
子則與琴尊為友蓋亦矯志慳世云爾此地  
真無可友耶詩以嘲之

蒼雲深鎖栢森森半畝公庭一畝陰我欲就君歌  
伐木莫從物外覓知心

望真州

白蘋紅蓼點秋辰零雨飛帆淮水濱一日西風三  
白里晚烟青處是儀真

採蓮曲

碧水連天菡萏秋美人自槳木蘭舟不緣咄軋驚  
鷗起未信人從花裏誇  
偷持花艷比新粧欲採未採情內傷日晚歸來不  
盈把儘將心目擊鴛鴦

午日餽諸生食

離離朱杏出星精菰黍紫絲顆顆明知是耽經久  
忘食聊將時序報諸生

渡錢塘江

風恬氣清江水平揚帆鼓柁一葦輕青螺點點海  
門起扶桑日上紅雲生



春潮落處靜煙波十里平沙映綠莎背指吳山蕩  
輕檝渡頭忽聽採蓮歌

王母蔣氏哀詞

共憐羅綺罷魚軒松檜蕭蕭湖上原當年忍死存  
孤意歸報夫君地下魂

挽莫處士

百年塵世竟何如不將名姓著鄉閭少微夜隕秋  
光暗寥落寒原泣素車

徐邳道中

連天陂澤浪漫漫江郭江村潏潏間日落扁舟泊

何處雲邊半點蝕殘山

黃河故道沙為阜青草新陂水拍天社燕城烏渾  
不解飛鳴猶自夕陽邊

途中值雪

萬里同雲捲六花瑤川玉宇望中賒孤帆飄泊正  
愁思噉噉宿鴻傍水涯

千里波濤迷道路一宵雪霰失山城思家憂國渾  
無計華髮朝來又幾莖

題林廣文卷

鴻鴈秋風離思長天涯夜雨憶聯床年年春滿池



塘草夢遶司空綠野堂

行經萬縣

娟娟翠篠結重陰細細垂楊風滿林雲磴虹橋泉  
噴雪江南景物劔南心

昭君村

孤村寂寞草蒙茸猶說明妃入漢宮為問區區薄  
命妾何如衛霍定邊功

屈原祠

群峰合脊接梁岷萬壑西來匯巨津忠諫無裨宗  
國喪山川何意育靈均

野馬荒

荒原十里怯前呵猛虎長蛇荆棘多却憶六橋烟  
月下夜深歸路擁笙歌

題松竹梅

淇籜猗根度嶺枝移栽到處總相宜莫言生有和  
同性看取凌霜傲雪姿

獲嘉贈潘令

百里河陽接獲嘉芄芄黍稷間桑麻爭傳新令令  
潘岳不說前身一縣花

歸思



三月鳴橈泛月波薰風暑雨下漳河秋空水淨輕  
帆急久客歸心柰遠何

題畫

雨過郊園綠正肥東風吹處盡芳菲狂蜂浪蝶紛  
來往靜裏閒尋得化機

赤日當空暑氣蒸狂來無計躡層冰爭如藉草臨  
流水趺坐悠然學定僧

霜黃木落鴈南飛野水蘆葭映夕暉拉得同心共  
舒嘯峯嵐雲影坐依依

青牛緩控歷逶迤塵世滔滔總不知授簡祇須閑

令尹東來紫氣特相貽

海上歌二首

海濤轟轟撼怒濤鯨鯢吹雨暗江臯忽恠一時天  
盡赤東風烈焰火雲高

電光閃閃晝模糊艦舸縱橫戰血枯帳下何人多  
斬獲幃中吉甫定紆謨

贈沈封君

罷鎮歸來屬倦遊喜看鳳詔落滄洲 皇恩莫道  
備沾渥芳績蕪將世澤酬

氛氲惠露霑高門渙汗丹書御藻溫為問玉珂鳴



紫闕何如錦組賁青園

題藥所畫冊

幽花細草淨春暉  
隔水茅堂到客稀  
世事人情渾忘却  
翻憎清夢落漁磯

小隱二首

千尺松陰舊隱居  
不為農圃厭樵漁  
傳家仁術無勞問  
三十聲名遍里閭  
何須遺跡向深山  
悟得真機萬境間  
靈藥滿腔功滿路  
古來大隱市朝間

芍藥花

春來花信幾番風  
翠蒂飄飄襯粉紅  
何似王家舊攔裏  
一枝得與歲寒同

李東升挽詞

里中舊姓幾家存  
白首相看子復孫  
無事又隨遼鶴去  
迴天延望一銷魂

咏香月樓二首

一曲湖山擁集芳  
倚雲臺榭舊平章  
千岩萬壑依然勝  
香月新開歲月長  
林端高閣俯煙霞  
檻內湖光檻外花  
已結西隣娛歲晚  
還馳北極著芳華



送馬生南遊二首

龍蟠虎踞大江頭，王氣蔥蘢古帝州。  
把酒相看彈鋏去，知君談笑足封侯。  
寂寞文園賦子虛，無人知是病相如。  
一朝召對承明裏，萬里橋邊駟馬車。

挽張九臯評事

附驥當年聽鹿鳴，歸田正擬話平生。  
丹成一夜三山去，漢史空傳張季名。

仙姝詞

吳山佳氣逸城東，一水光含海日紅。  
佇望今天青

烏下旋移絳節白回中

青玉雕盤麟脯將，紫霞光裏泛金漿。  
蓬壺早注長生錄，歲歲薰風萱草堂。

竹岩二首

脩竹歲蕤結畫陰，蒼岩翠峯律草堂。  
深清風一榻紅塵斷，何處携來月下琴。

岩石蒼蒼青影團，常與幽人伴歲寒。  
莫道栽培總無意，春深雷雨長琅玕。



奚囊蠹餘卷之十

國家圖書館, NATIONAL CENTRAL LIBRARY, TAIWAN, R.O.C.



奚囊蠹餘卷之十一

序

贈竹川張先生序

余始受易父師聞蔡先生介甫傳易于闡于先生  
孔安傳易于越並著書膾炙人口嘗卒業焉旣爲  
諸生好涉獵漢儒同異程傳易通諸家言漸與下  
蔡之旨相遠校文者輒見黜謂非穀率幾欲弃去  
當是時學士弟子推深於易者咸謂有竹川張先  
生云歲庚寅先生來自江南遂挾所爲文拜帳下  
一見卽辱心賞至論易奧衍宏深囊括經史折衷



漢宋諸家主於朱氏而可否于蔡令人易聽洗心  
鹽齏忘疲蓋超軼舊聞悟群言實一貫爾其論文  
曰華而不實末榮而本瘁也實而不華積薄而未  
光也成章而達華實斯乎乃諸從遊擄藻敷言細  
繹䟽博會約精腴率遵軌轍光藝苑耀制科彬彬  
宣布郡國雲蒸颺起不足爲喻肆小子較劣亦得  
從諸君之後所由來宏遠矣先生方應貢上春宸  
當道憐其才令比於京闈復不偶乃赴銓曹俾司  
訓仁化秋仲屆行諸從遊餞諸郊或曰吾儕從先  
生游凡以道藝勲名爲期方今開芳振譽行道施

德以翊明盛豈非出緒餘以階進取千福澤乎先  
生顧不能蚤自奮庸竟垂老出諸生之後將治已  
治人輕重不倫抑大朴難斲大器晚成猶幾望於  
桑榆之獲也先生矍然起曰謂才必用則長沙有  
遺賢謂文必顯則治安有遺策主父偃曾不能竊  
賈生十一取功名立談間遇不遇爾子不云乎良  
農能稼不能爲穡良工能巧不能爲順故顯晦者  
文章之否泰遲速者命途之通塞不爲得喜不爲  
失悲行與世通道與變俱無終始無物我者君子  
所以自金某聞之曰敦良以大畜虛受以包蒙人



已之心同知遠知邇知微知彰終始之教同藏器  
有獲屯膏澤遠體用之道同茲其爲善用易也先  
生笑曰有是哉乃次第其言書以贈別

贈沈少吳擢四川按察副使序

嘗讀循吏傳諸所稱列大率砥節守義無有詭隨  
甚者以身徇法迹其臨事若輪轅必遵軌轍方圓  
必以規矩不失尺寸乃至法立民安 國家賴其  
便而其身亦永終脩正之譽意其溫藉持循良有  
素云我 國家博選賢雋分曹任使諸凡訟獄隸  
諸刑部持三尺以權衡天下蓋總諸曹所治一切

齊之使理鈞據微隱擬議上下日惟精習法比由  
是郎署秩滿轉遷彬彬多稱何則法非武徒嚴刻  
專以繩責齊民防心窒欲約諸繩墨之中迺其自  
律滋多已余同年沈君以秋官大夫奉 召讞獄  
全楚行郡國得寃民輒咨嗟不已必廉得其情列  
其狀上之 詔可悉如狀釋諸囚惟時全楚稱無  
寃 天子嘉其績乃晉秩按察副使提刑三川余  
竊謂沈君秉德誠厚然亦其素所諳習寔資之深  
君少以胡氏春秋爲諸生郎有聞于鄉暨先後爲  
兩都郎皆刑曹治獄明允再考書最荐歷今秩夫



春秋法律之原也兩都天下之本也法司刑名之  
總也君之蘊畜宜其深已昔爲明部使今當爲明  
監司異時爲名公鄉決大疑定大計標能擅美爲  
國柱石亦率其素習推行稽諸往哲奚足過是然  
余又嘗考諸法吏張湯少習于法任法不回竟及  
其身杜頽年飾以儒術克終顯聞夫儒術君所階  
進又博雅沉密是深於儒者也法之精微是謂道  
道之顯著是謂法徇法以拂經張湯輩之不爲儒  
也其及宜矣以儒用法則操德固而防身嚴法非  
出於儒術之外也余獨異夫世之玩法而不知廢

法不足爲儒故於沈君之行序其事而以臆說終  
焉

贈桐岡郭先生序

口歲閏逢乾徐四方大侵淮西爲劇始夏建秋恒  
曷爲外原隰陂陵千里濯濯盡廢其菑畚耜獲之  
常而民不堪命於時梁苑桐岡郭大夫爲廬郡丞  
會守缺大夫行守事首䟽蠲常賦十七平刑禁暴  
損上益下給種麥勸樹藝悉發貯積審計戶口劑  
量盈縮官無遺畜而野有遺民營營莫知所出余  
繼至適遘其會僅守畫一復相與謀貸他郡議聞



撫巡請于 上詔可証敷郡邑若家賜而人益之  
庶幾憔悴之民歡然更生矣踰歲 聖皇詔諭中  
外謂政在愛民愛民必擇守令今官匪其人肆爲  
暴虐以干天和求庶民安其田里而無愁歎之聲  
不可得已于時太宰奉揚休命凡郡邑員缺必慎  
擇以克黃郡當全楚之交爲廬江上游迺移郭大  
夫于黃爲真守蓋緩征恤困仁愛當上心云大夫  
捧檄行廬之士民不忍舍依依若赤子去慈母余  
曰任人以圖治 聖王之仁也擇賢以弘化大臣  
之智也孚心以懷惠良民之義也有三善焉皆本

仁厚孚協非可聲音笑貌爲也夫潁川渤海仁明  
之偉績也循良課最古今之美談也夷考其人則  
內寬外明忠厚有大節云爾夫寬厚以出治明節  
以持身是以教順而必政成而安所繙藉深故治  
行稱最郭大夫寔克兼之媲美前哲恢弘仁恩報  
稱知遇永懷於民無俟異政于易地而允足以底  
其績詩曰愷悌君子民之父母書曰民罔常懷懷  
于有仁大夫之謂也大夫以明經甲科爲郎理刑  
寧國晉湖郡丞所居見稱述其治謹身帥先廉平  
敦慤而經術藻思尤潤飾于吏事多可紀云



當陽簿謝君五十序

嘗謂君子懷德抱藝著令聞垂史冊無間窮達必皆卓行竒節磊落雋偉自足表見要非雷同世局踵故習非巧媚富貴者也史稱考城枳棘鸞鳳蜚聲華陰抗志風塵礙脫彼其自負雅致視世所謂浮湛毀譽誠無關於欣戚寧屑屑依違其間哉吉水達溪謝君非斯人之儔與君朴直能文章素慷慨有大志由縣博士弟子升太學數竒不獲薦乃上銓曹竟從常調爲湖廣當陽縣簿比入境值久旱君未蒞縣治輒築壇於郊齋戒禱祠天果大雨

邑賴有秋顧以不先謁令令啣之君又隋直不肯卑節下人務廉刻自檢而惠先困窮民賴以生乃至知有簿而少其令令又啣之惡之上官卒傾君君嘆曰君子之仕行其義也義不可行則已矣竟拂衣還君有弟曰潮溪君素以文藝行能相砥礪時爲吾浙監司念君有用世才坐抑鬱無聊慮無以自遣寓書於君君曰見定者不惑理得則心裕脫跡塵囂之中耕釣達溪之上優游天年奚不可者有味乎其言蓋曉然於義命之際方諸讐張高執何從軒輊假令稍徇世態循襲故常詎不能糜



爵祿固顯榮哉然特行亦何由見之卒去彼取此君所懷抱深矣今年君五秩初度潮溪君爲余道如是且屬詞爲祝余聞養生者云毋搖爾精毋勞爾形乃可長生夫窮達不亂其真則精定奔走不役其氣則形安卽君所處已爲壽徵矧壽人者本諸其德行誼如君有不駢集五福逍遙長生者耶名德歲年皆足袞顯於無疆矣是爲序云

贈芹山陳先生序

大方伯芹山陳公始以明經射策甲科爲地官卽舉最出守東昌治行爲郡國第一於時縉紳間知

不知言史事稱芹山公藉甚尋擢按察副使奉璽書督學吾浙時浙之文靡靡漸失其實公聚而較之亟賞質雅善要束者其縱橫馳騖衆所推服一二輩故黜之間進諸生面命以身帥先士迺彬彬向風知就中焉于時公之政事文章並美當世游歷叅伯總憲進左方伯提調東藩試事坐錄文不稱旨與與事諸臣咸逮繫長安上方震怒莫不恐怖銷志公獨安義受命痛自引慝略無怨尤上徐察其隱竟釋之敦道義明憂患大節凜凜不可奪於時宿望彌重云已而下司邑幕移佐



畿罷余守廬之明年公適戾止勵政勤民迨不減  
其筮仕而休休虛受歆然有吐握之風蓋師資於  
斯夕甫十旬而經略宏規華國藻思與其名世之  
績忠毅之素開示滋倍適有真定郡丞之命屆行  
某竊有請公曰古有之孟子不見諸侯而宣聖趨  
召不俟駕展禽不易介于三公其究也不卑小官  
夫官之不卑也所以明分介之不易也所以立節  
後之稱聖人者歸焉宜已是故有不見之義者有  
趨召之敬安卑小而後大節不撓夫固道之相通  
而事人之理君子之所以藏身者非邪余聞之曰

政治無良儒行之蔽也文采不飾吏習之陋也節  
義無聞持身之辱也其本在德德盛者心下尊而  
光卑不可踰君子之終操德固而順應裕奚其顯  
晦之有哉或謂世方驕晚華要視所過爲傳舍其  
在阻抑偃蹇尤甚公獨不然噫淺乎窺有道矣公  
咲而別

壽外舅野亭翁六秩

嘗聞鷗夷子皮解體世紛游神區外扁舟徜徉塵  
土軒冕豈不卓然昭曠超絕人群哉然猶屑屑于  
計然積著之理以富好行其德三致千金再給所



親宣其祛鄙吝之私而馳競之情猶未遣耶至觀  
陶靖節安道苦節貞志晦迹不以無財爲病不以  
乞食爲耻韜光遁世氣干青雲纖塵點垢誠不足  
以涅其潔世方並舉而兩高之以爲用世尚功避  
時尚志隨變易爲隆汙垂芳蹟而延令聞其揆一  
也吾外舅野亭翁夙擅文名蚤登鄉薦暫隱師儒  
小試畿邑花蒲河陽而情櫻松菊澤被黎庶而心  
賁丘園遂厭折腰果成今是棲迹數椽躬耕十畝  
庶乎屢空而怡真適性陳書摘藻欣欣忘蓋神  
於靖節而志薄乎鷓夷者也是歲丙午首夏旣

望爲翁六秩懸弧之辰余羈僻罷不及捧觴登堂  
緘辭爲祝不欲蹈世俗常情迺爲之言曰古云太  
上立德其次立言立功鳴夷子皮平吳霸越不自  
居其功而乃以其居積施與爲功不免猶牽於俗  
比諸靖節不啻涇渭顏子簞瓢陋巷泰無不足子  
顛貨殖聖人以為不受命焉以顏子之聖靖節之  
賢不能謀食吾不信也所見之大蓋超然萬物之  
上非夫塵心世慮所能測識也故余嘉翁之德以  
爲壽而其及民澤潤著作深富皆屬之菁華敷布  
而非祺壽無疆之本也乃爲之歌曰南山有松北



山有栢不若五柳之宅兮靄清蔭兮垂芳蹟泰山  
之岡嵩岳之陵不如東臯之登兮長舒嘯兮永不  
崩又歌曰月之恒兮日之升兮萬壽無疆樂繩繩  
兮碩人之寬多福載疑兮是歌也樂翁之樂契翁  
之神可以益翁之壽遂書之

同選錄後序

代作

聖皇御極廿有二年爲嘉靖癸卯銓曹集天下科  
貢士凡八十有六人論定叙官自州大夫郡佐至  
邑長貳司幕考德掄才因人量地各得分額制下  
胥慶彙征迺次第名秩與其年齒鄉貫列爲私錄

永終敦好以相觀善裴大夫已悉諸右僉謂余亦  
宜有言辭不可得輒綴諸末簡曰粵稽我明聿興  
雋乂布列贊揚弘休爰設賢良方正聰明正直孝  
弟力田通經孝廉等科雜進並用時維窮荒僻壤  
齊氓下役悉得以技能表見嘉猷偉績載在史傳  
班班可考旣迺文教日盛士爭嚮風由舉子業進  
于是諸科皆報罷科貢之外無他途可致通顯夫  
科貢誠足以盡人然而功不度越往哲才或局於  
隨時何則習不振志不立也夫脩德抱藝蘊藉經  
略所自治也而唯恐其不售兼善不失時獨樂不



失已志先定也而或役于聲華懾于卑薄黷于貨  
賄若自畫而不前無惑乎士殊世才殊途國殊用  
已是科貢宜不若選舉得人猶兼名實何得更爲  
差等使貢不得埒於科科不得埒於進士盡失  
祖宗初意而士習益衰可慨也夫窮達者天定崇  
卑者命遇得喪者時適行素其位彊立不返司牧  
者飫芻粒解牛者利芒刃官不負國行不負志樂  
天知命以趨時也奚所損益廼舍己徇外爲哉致  
遠不偏主於登涉中的無擇勁於弓弩所貴預定  
不惑卽榮辱顯晦利鈍處之一茲敦樹聲實允迪

先民克荷鈞陶而無忝此生者也易曰惟君子能  
通天下之志夫官不同階游不同方任不同事而  
有相通之志是謂大同願與諸君商之將訂證于  
他時爾

祝壽圖序

皇上御極三十有五年秋八月恭逢 聖壽五秩  
之期萬國歡呼北嚮稽首遙祝杭郡諸大夫舉行  
唯謹已而潛江郭大夫卽郡齋又西嚮稽首遙祝  
以有太孺人在堂壽筭永矣吳楚阻脩不獲捧觴  
膝下迺陟屺瞻雲之思感發於望日傾葵之候也



吳中鄉大夫士聞之知公孝違思深欲為宣其無  
已之情為繪圖曰日之升曰月之恒曰松柏之茂  
曰南山之壽或為之歌曰煦煦朝陽拂於扶桑曉  
煙飛瑞晨曦吐祥隆景煜燿曙色蒼涼繫耀靈之  
未午况母壽之未央皎皎桂魄金水之精蟾從陰  
伏兔倚陽生四時照耀萬古晶瑩信常明之不匱  
同母壽之有恒又歌曰何茲山之崔巍兮鎮南國  
曰衡岳上巖石之難攀兮下流泉之堪濯時宣氣  
以誕秀兮紛藜芝而緼璞永不騫以不崩兮信母  
壽之可較伊太谷與天陵兮挺千禩之喬株盤虬

龍之偃仰兮鬱龍從之陸離陋芬芳之易落兮傲  
霜雪而不移斯本實而未茂兮唯母壽之可齊余  
聞之竊謂日月唯明故離天而久照松柏唯實故  
安土而葆貞南山唯厚故鎮靜而發育嘗觀郭大  
夫理吾郡徧燭群情不為過察砥節礪行不為矯  
情深誼並載容保無疆而不震不擾日方躋華陟  
要永有榮祿楨幹 國家為民具瞻允有協於圖  
祝之意子德母儀槩可想見大孺人之賢詩云魯  
侯燕喜令妻壽母宜大夫庶士又曰既受多祉黃  
髮兒齒夫庶政得宜見祝於人人上逮於親獻無



壽之壽若是推賢毋之心豈徒祿養是躄宜有樂  
於嗣君庶政得民而油然燕喜不自知祺壽之彌  
增矣有以夫圖咏交作祝願無已猶魯人所爲頌  
僖公也大夫曰允若是吾將緘寄吾廬俾吾昆弟  
歌以侑觴於是大夫士益爭獻篇什具列如左方  
云

贈陳醫士序

吾杭東南一大都會山川所鍾不特士大夫敦樹  
聲實標能擅美爲今昔推重卽百家技藝亦種種  
精巧甲天下記曰天有特地有氣人有巧要得於

生稟誠異亦人爲所造非偶也女醫之良盛稱木  
扇陳氏云自宋迄今世有秘傳陳氏繁衍比肩連  
肆不啻數十餘中間靈悟超越爲衆推服者代不  
一二自余所及見有若薰齋翁余家凡內人疾輒  
延致之切脈而道其原論定而投之藥十不一失  
今觀所著醫要蓋讀書明理深於岐農越意之旨  
非特專恃其聰明而已再傳而其孫引泉君實克  
紹之今年春余姪婦得奇疾始若笑若泣旣多話  
言已廼寂不語瞑目闔口絕不飲食或曰風邪亂  
之或曰食結鬱滯相顧駭愕計莫知所出君曰此



痰症也孤鳳散主之痰隨氣升降氣逆故痰壅亟  
墜痰卽諸病自己衆又相顧駭愕莫敢是非君遽  
起調藥強病者飲一飲氣下再飲能言三飲能食  
自是日順其氣氣順理脾脾健益血但服湯三旬  
而復故余兄雙洲喜其子婦疾已屬余贈言余竊  
謂凡醫治病猶將用兵今古方書猶兵法也誦習  
醫方泥古以合今何異徒讀父書心無運用之妙  
祇取敗亡者乎引泉君得上世秘傳又精研經籍  
擴其性靈信非時輩耳目淺小之術宜攻治有定  
見效驗竒絕如是不然君家世傳非人人殊醫要

亦往往傳習君何獨擅其美哉蓋齋之業必引泉  
斯繼之矣余悲士大夫以儒術顯或不務裨益於  
世名亦泯滅無傳終負山川之靈不當以方伎少  
醫術也是爲序云

### 刻野亭集序

余舅氏野亭先生仁和人本姓馬氏先世由海昌  
出贅於陸人稱陸野亭先生先生受易父履齋先  
生夙承家學名籍籍諸生間旣領鄉薦就教祁門  
補來安令多茂績稍遷南昌府倅輒弃官歸時方  
強仕郡大夫捧檄詣先生先生辭以疾深避謝之



自是閉門靜居不答問遺不理冠裳不事家人生  
產作業遭荒罹變蕭然屢空坦如也獨耽嗜經籍  
得古書往往手抄間以已意刪訂積盈几榻興至  
登山臨水藉草拈花觴咏自適所爲詩文率意成  
章無鉅釘無蹈襲亦鮮存稿如是二十餘年垂老  
矣嗣孫亦龍私錄得若干首將入梓家藏余三復  
掩卷嘆曰言誠心之聲也感於物發於言宣洩才  
情各因其質故正士和平而莊嚴達人閒逸而疏  
鬯先生端凝長厚安道苦節齊死生忘得喪超然  
塵壒之表猶之鳳翔千仞揚聲吐氣自中律呂奚

必調弄樊籠效人掉舌爲哉今觀衍正學傳清風  
自叙諸篇莊嚴疏鬯不可想見其人余竊懼後世  
不知其人槩與談天雕龍爭妍鬪巧者較工拙則  
何異寸木岑樓失本末之辨甚已爲著於篇

贈闕帥東許王君序

余以己未歲入蜀不踰月有川北之役時東許王  
君與余俱始出新都經牟瀾停車延睇纍纍砂磧  
杳不可計君謂此八陣也近躡四正則天地定位  
風雲流形遠指四竒則龍飛虎踞鳥翔蛇結千變  
萬化運用無窮非夫震盪吳魏鼎峙天府卧龍遺



踪乎余曰詭哉已迺歷蟠龍涉嘉陵攀錦屏蜿蜒  
碗礪點點蒼翠莫辨君謂此北門也包錯萬壑  
吭三川背指棧道分漢楚之疆面行江漢思成周  
之化蠻蠻在御戎羌通譯非夫坤維都會陸海巨  
鎮乎余曰壯哉已迺回車華陽登威遠堂更詳其  
說君謂牟瀾之觀兵法也史傳猶存錦屏之眺地  
險也陵谷不改法具而心非趙括父書之智也險  
設而人非文侯魏國之寶也是故得其心則六花  
異制勝筭同功不得其人卽三分弘業僅貽一夫  
納欵之地爾余曰辯哉夫旌車招搖塵壑迷眩探

奇討古舒昭曠之襟非士林賢豪不暇及矧雍容  
指顧窮極本末使全蜀數千里形勝上下數千年  
興替若指掌上君之將略何如哉往年 國家承  
平將帥之臣徒飾文墨近以南北多事乃更專務  
弓馬夫研文騁墨誠無補於運籌至舍我智謀矜  
彼勇力亦何賴焉東滸君才兼文武又善察地勢  
審要害覽古今成敗取證得失卽如上所陳說豈  
深文無當用壯無惧者可同日語哉君又魁梧奇  
偉望見知非一人敵郭侍御聚菴素慎許可頃按  
蜀亟表君才茲當入賀 萬壽廟堂之上宜有知



君如聚菴者相與推轂登大將之壇立殊絕之勳  
永竹帛之譽竊有望焉君既與余善雅愛余言重  
以古崖河山強屬余言不得以俚拙解聊述同遊  
與期待之意如此云

贈大中丞我渡陳公提督操江序

士君子處世境有順逆其應務也亦有順逆順逆  
之變無常泛應之體不易協於義悅諸心賢聖所  
以左德行化者此也應順以順應逆以逆信攻取  
逐物感何往非逆其言順者矯誣以自文者也易  
云天地以順動日月不過四時不忒聖人以順動

刑法清而民服順動之義豈其微哉余嘗取以自  
勗取徵於世之所謂賢人君子則有若我渡陳公  
寔克由之公起家進士試令卓異徵拜柱史數奉  
使按郡國風裁赫奕進擢圉卿已又外補藩臬歷  
三省廼總憲吾土屈指仕途豈必皆順而公視之  
坦如所至砥節奉公慷慨振奮爲國家圖惟遠  
大之計始自粵入浙詢於士庶詢於諸大夫務求  
急切於民生者堅持而力行之緇黃蠱惑邪正混  
淆則有禁博奕靡宕淫縱傾圯則有禁狙詐巧詆  
黨姦伐善則有禁游行雜遝佚豫妨生則有禁狼



吏虎胥殘蝕閭閻則有禁凡以厚人倫美風俗值  
有禮覆昏暴孰非緣人情而順導之於是吳越之  
間歡然信躍然從令行禁止吏習民安一時士庶  
奚啻雨化景隨家賜而人益也無何 璽書至拜  
公御史中丞提督江洋戰艦兼飭沿江兵防位望  
通顯矣公顧逡巡退讓若不能勝夫天道惟順故  
陽舒陰慘萬物以生以育不見其迹政治惟順故  
教行化洽萬民以恩以威不有其功今言治者往  
往薄法比爲末務不知弗率其性是謂逆德君子  
脩道正以裁成歸於太順擴之則燮理寅亮孰非

順動之義孰非公之能事哉若徒觀公於進退遲  
速之間謂能忘逆守順淺乎知公矣江防舊都保  
障宣威弭盜誠重寄也以所施於吾浙者舉而措  
之卽事預立法必行起積習之敝懦驚流浪之頑  
冥衛疆圉保生靈特易爾異日者坐 廟堂之  
上不動聲色定大計建殊勲贊翊 明盛臻熙皞  
之化垂竹帛之譽必公其人公誠諒余言當不謂  
效諛悅私於公也吾郡侯吳公曰茲余所嘗睹記  
今將藉以利澤鄉土請以是爲祖道贈遂書之

贈朱方岳肅菴進閩藩左轄序



曹南肅菴朱公始拜浙省右轄之命以隆慶庚午中秋來蒞吾土甫三月進閩省左轄以行士民驚詫謂何來暮去速也 聖君賢相在上政化維新豈不欲俾斯民未有康阜恬熙之樂絕咨嗟愁嘆之聲弭山海縱橫之侮哉何遽奪其依庇我者如此余聞之曰是知荐進之速不知夙昔之淹知愛戀之情不知化道之機知鄉土之懷不知公溥之澤也公筮仕晉江三年而報政徵入爲侍御更兩都按郡國凡十有餘年計資望當得內陟卿貳竟從常調出補憲副歷藩叅憲使又數年而後有

今日頃者四方多事急於得人自侍御以上至右轄皆得超拜御史中丞開府諸鎮間亦晉補列卿以公之才何所不可迺遞轉不踰一階必升諸藩臬之長猶將需次以進是不速而更淹已公節廉自檢尤惇大渾涵廉吏多刻獨以寬得人重厚易欺顧洞朗密察相對冲虛夷坦而凜然不可撓此其操持規書當事理合人情所爲感動孳孳翕然結於上下士豈不嚮風爭附民豈不荷戴其誅其去乎然吾浙海隅一區爾卽久留終惠不出千里之外以公弘猷遠畧旦夕坐 廟堂之上施德行



義滂洋寰宇之內何遠弗屆寧獨偏私一省哉且八閩扼吾浙上游往歲黠賊縱橫大抵由南而北故定海霏衢三江五湖之門戶際門風火溫台寧紹之藩籬審度利害殆唇齒相爲依倚兵興以來垂二十年募兵括餉財力殫竭在閩省不異吾浙類非公曩時試吏之日矣休養生息安內攘外折衝尊俎之間置民衽席之上閩粵之隄防固則吳越之患害消不啻衛禦外庭而堂奧恃以安枕也豈直壤地連接沾濡餘閑而已於是士民知公去有餘庥相顧渙然釋也已而省中諸大夫祖諸浙水之上節齋劉公過余問所以贈言遂次其語歸之

贈郡侯吳菲菴擢江西按察副使序

杭郡本東南一大都會山川城郭之鉅麗林澤桑麻之肥饒衣冠文物之盛茂蓋自昔稱雄焉其中具五方之民俗雜好事業多賈趨利競奢故訟獄繁南北往來舟車之湊又以交際分日力撫按藩臬時時駐節郡中無俟遠采密察而治行習聞於耳目則甚矣斯郡之難治也數十年來膾炙人口有若司徒建業梁公御史中丞項城婁公福清陳



公皆澤被當時垂諸永久余嘗面質而心憶之非必發奸摘伏刻核武健駭人聽聞又非必獵名養譽委蛇致曲以獲上下之心皆博大敦愿推誠布公用民心爲好惡不以智巧機權斲淳龐誨姦利也今郡侯非菴吳公迨與三公同一軌轍其政寬平有執績密不苛和易可親而凜然不可犯大抵廉靖簡直與民安於無事九屬四民頌聲翕然無間三載報政

聖天子嘉乃丕績進江右按察副使行有日矣郡人旣不能留止廼相與祖詣浙水之上而以贈言

屬余公固雅善余言乃起而言曰士君子殫力四方深謀 廊廟立殊勲未令譽豈不偉然命世賢豪哉其所恢張布濩鏗錡炳耀孰非才爲之然未也譬諸草木植本固培養完則敷榮懋實根心色樹不朽之德以成不朽之功夫是以彌久彌光也若徒銜芳華亡本實將立見焦萎矣本治才者德脩德預則無擾而靜靜以應務故紛紜膠轕愈見周詳其入人深深故永懷不替由前數公觀之當其典郡區畫今已時移事改不可誦說所爲漸摩淪浹維係人心不可解者其意味深長因以想



見端本之化康又之績舉一郡之衝煩而易易爲之奚難治之有菲菴公克臻此道吾郡人自今懷思亦猶今之思昔何有窮已不然才情聞望凡蒞茲郡者孰非妙選可稱述良多何三公專美於前必菲菴公始繼美於後哉書曰民心無常惟惠之懷又曰下民秉爲歸於一德信必德惠克盈乃能季學民心如此公行矣提刑一事爾較治郡不啻十一善宦者往往遠避嫌疑遇事輒下郡邑分怨譖甚者偏聽失情使民無所措手足凡以內不足而白視不廣以公之德將坦然由之錄錄希世之

談知不足以辱大賢昭曠之聽也

贈饒郡丞張芝麓序

近世談功名者以謂紆金曳玉揚英吐華魁壘恢張蜚聲垂榮則旣快夙昔侈厚幸囂囂然擬諸侗儻卓詭之林用知能建功烈如是足矣曾不知利社稷澤生民勒鼎彝著竹帛而後爲不朽之業也史傳黃穎川龔渤海卓密魯中牟異績歷千載頌之不衰皆以守令一職之稱豈其致位通顯爲哉仙居黃令爲余道芝麓張大夫之賢倅台郡不二年凡濬堰壩鑿陂塘開自然之利發倉庾賑饑饉



起溝壑之瘠繕城垣葺庠泮急政教之本摘奸宄  
謹貯積植生民之命而尤持澹泊以畜德運明敏  
以應務蓋本體裕識趣遠非夫徇俗習希榮利者  
也大夫起家名進士歷清華入尚書爲材省郎未  
幾以踈儻寡偶復詘出佐澶州量移赤城頃稍遷  
饒郡丞盤桓於外數年不召可謂屈抑而志愈堅  
名愈茂材幹愈益老練行將服大僚快意氣猶淬  
礪干將鏑鏑之鋒而坐待剗犀削玉之試其何施  
之不利乎夫以大夫之賢向令出入禁闥委蛇卽  
畧自以養望積資馴獵崇盛快心於習俗矜夸之

計誠得必欲舒展蘊奧發其誦習孔孟之旨  
親利澤於民能使吏民懷頌有如上所稱列卽  
漢世循良不得專美所謂不朽之業不在是耶以  
此易彼孰得孰失不待智者而後能辨也又安知  
非天所篤厚而藉是以培益其大受之基乎饒郡  
境連吾浙土地人民宜無相遠移善政以終令譽  
方拭目於茲行往余傾蓋吳中嘗解劔贈大夫今  
復申惓惓之意如此唯大夫諒余言不足爲貪常  
嗜瑣者道也

壽凌太安人八十序



余嘗讀金太史貞節傳述張節婦事甚詳謂以閨  
闈柔婉之質當艱危窘逼之時其茹荼忍毒之苦  
不恤死生利害堅持節義凜然若金石不可渝豈  
不卓絕偉烈女中丈夫執積三數十年之間兢兢  
保有其身教成其子其於人倫風化非眇小裨益  
而已於是母以其節顯采風者上其事

聖天子遵古先哲王故典表揚如例以風勵臣庶  
會令子中憲君亦以明經孝廉顯射策甲科拜尚  
書比部郎秩滿奏最尤極優異下 璽書褒嘉蓋  
始以婦道終以母訓自 朝廷以及里閭莫不賢

其母之教非義方無以遠其成亦莫不重其子之  
才非通達無以顯其德誠人世之所罕覩在凌氏  
可謂兼擅其美已是歲庚午七月廿又四日爲太  
安人八十誕辰吾鄉縉紳士無遠近少長咸盛衣  
冠將幣玉尚尊俎登堂爲壽余獲與賓筵廼拜手  
颺言曰於維休哉茲豈非盡道於人獲報於天者  
哉書曰惟上帝不常作善降之百祥又曰天壽平  
格言天無私壽無私祉執德固則順應於天操行  
潔則信孚於人人心嚮慕卽天道昭格臻五福萃  
百善要皆感應自然之實理猶百川趨海其勢順



故不行而至也當太安人矢心憤厲義氣激烈已  
委置其身於非有豈謂有世間榮名卒完節以終  
志教子以顯庸容與祿養康寧耄耋蘭孫振振不  
啻庭樹備極純全綿遠不可必得之福始之玉成  
終之厚生信天道所與善人常理將來綿延之澤  
長永之筭又何待遠引曲證而後喻哉於是衆賓  
唯唯屬余論著於篇



奚囊蟲餘卷之十二

序

贈金雙虹二守序

夏書稱禹抑洪水通九道陂九澤度九山蓋八年于外而後諸夏乂安功施乎三代甚言治水之難也至漢河決瓠子武帝親臨河上湛白馬玉壁群臣從官員薪賓水然且乂勞無成至爲歌悼之今觀其詞亦云悲矣宣防旣塞二渠北道始復禹跡以寧梁楚之地自是之後決館陶決平原決入渦河漸徙東南我明以來決原武決滎澤決張秋



金龍諸處河愈南徙議者謂河源既遠奔流迅急  
數千里平行之地浮沙疏土任其遷徙固難以人  
力勝也將諉利害於河余竊謂未盡然夫就下水  
性也淤澱則勢逆疏濬所以瀹之也下壘則旁行  
隄防所以排之也然後東注順而患害消否則平  
成之功神禹何所用其智邪大名古衛魏地瓠子  
黎陽白馬金堤咸屬境內黃河故道至於大伾蓋  
禹跡猶存焉郡故置判府東昏職專防水河既漸  
遠防亦稍踈歲率督土人繕完故堤增卑倍薄捕  
狼鼠實其穴植榆柳堅其址若無事事然者然而

數百里大堤數重中間田廬塚墓得無決溢以有  
安定之利此亦人功所造國之利害豈其微乎余  
僚友建業雙虹金君始判臨江再補茲郡專領河  
堤是年以秩滿 奏最得超遷奉議大夫同知寶  
慶府以君功懋資亦深也且 命銓部以後無復  
專設蓋知河流底定保障足恃云余聞昔平當領  
河堤奏言按經義無隄防壅塞之文欲移民避河  
遵古聖以定山川之位無與水爭咫尺之地此泥  
古之論非隨時之法也夫禹之治水行所無事耳  
維時生齒未繁地多遺利中國汎濫民見其害不



見其利又何惜焉後世地闢民聚國私其民家私其業奪而爲河將反所好其孰從之必若當言水未必遵新徙之渠民將先失舊有之業啓怨讟之因滋庸人之擾其于經義悖甚孰與夫導洩壅滯固守隄防俾常循故道以消崩潰之患遠魚鱉之害而民無失所之嘆哉今金君優游堤堰間與民同無事之樂於國消隱微之患雖永賴未可期庶幾三數十年之內以恬以熙安耕鑿而享庶富其功有足多者且隨時制宜因民順治其諸不作好惡子惠元元之意將易地皆然可以覘君寶慶之

政矣於其別也聊當贈言

刻引川心秘序

嘗聞大倉公受方公孫光謂是吾少年所受妙方慎毋舉以教人爲甚哉公孫氏處心之隘也已而意得師陽慶授黃帝扁鵲脉書五色診病知人生死決嫌疑定可治及藥論甚精于是知曩昔所受方書非是卒盡得慶術審診起度量立規矩稱權衡合色脉表裏有餘不足順逆之法參人動靜與息相應而藥石之無不立應已又盡出其方徧授宋邑王齠杜信等無慮數十人何易易邪夫方不



奇而自秘與奇而公諸人人器量誠相懸矣太倉公豈不真聖儒哉近世以醫行者往往不務讀書明理又耻相師質質焉形窺意測妄投藥石雜集品類纖嗇片粒緩微其性使無殺人已已謂能攻疾無有也已病幸愈輒引以爲功自伐且禁其方不泄此以視公孫何如邪余友引川陳君得乃祖蓋齋女科心傳酌爲奇方又間以獨得之見著爲定論凡若干卷題曰引川心秘將鋟梓以傳顧其說超越流俗不悖經旨且爲方誠奇卽與昔賢授受適相脗合不可知縱爲方不必脗合所貴利病

彼其公溥一念宜與聖儒同符君誠有足多者聊爲序諸篇端

刻瞿存齋先生文集序

存齋瞿宗吉者吾杭郡知名鄉先生也生元至正間脩行績文誦習詩書百家之言避世全身晦迹海上入明應聘出兩爲邑學博士以功能升太學終周王府相當是時天下初定中國所喜好弓矢搏繫薄文墨不爲已而縱馬放牛漸脩文教迺徵岩穴之士凡負一技能有裨政治大者登三事其次備侍從領方岳皆表見一時流聲著績固



不朽盛事已先生抱輔世之才挾華國之策獨不見用卽用又不盡其長竟沉鬱下僚使天人治安經畧僅僅與膠西長沙同途轍信文章顯晦有時命途通塞有定抑居卑自歛別有意見不可測識也先生著作甚富所著若綱目重編花影集剪燈集皆梓行流傳膾炙人口曾孫廉輩復旁搜遺逸得文與詩合若干篇將併刻之有曰晴者雅善余間示所輯屬叙其事余讀之大抵根極理奧不忝醇儒篇中言必稱孔孟詞必倣經傳意執德方操行固其不希世就功明甚然以在閭局故得專意

文學若去彼取此所謂不朽盛事豈特志功名者擅其美哉歷世滋遠搜括靡遺則知儒術相仍代有人已爲序而歸之

### 會泉雙壽序

往余登天台訪石梁經沃洲天姥瓌富壯麗一大奇觀其下蓋多才賢多世家鉅姓多黃髮山川所鍾有以哉世俗所稱西蜀玉壘青城天彭丹景錦江巫峽自昔以爲天府之國坤維大都會余未獲遊遨其間睹史傳興思焉司馬王揚其彰明較著者也張南軒蘇長公虞道園豈非今古所謂賢豪



道德文章之師表與謂得於地靈是邪非邪余同  
寅有池李君自少以文雄蜀中有司選上春官尋  
射策甲科爲郎平刑魏郡余旣見其著書觀其行  
事心輒異之明年迺父會泉翁來就養龐眉瞭目  
脩然鶴立有隱君子之風知有池君學有本矣時  
翁與其配鄧孺人先後皆週一甲子有池君圖所  
以爲二人壽者屬詞於余余曰地靈人傑蓋夙昔  
聞斯語矣今觀九域八紘區以三壤五土而物生  
剛柔緩急異齊燕角荆榦妘胡之筭吳粵之金錫  
非其地則非其材非夫地氣然耶則夫名山大川

發育多才不宜有世儒興起其地如吾李翁父子  
哉翁三世儒流種學績文以弗偶循資應貢爲非  
其風雲夙志弃去築室會泉寄情山水脩身善行  
優游天年蓋知命達化者矣鄧孺人柔嘉維則寔  
克相之竟以其子顯揚四方榮壽未艾余曩見所  
謂世家黃髮才賢卽翁一門兼之梁益山川不尤  
有大焉者乎然余聞之軾之才洵啓之棫之學浚  
成之集之文沒授之儒林濟美類皆淵源有本若  
是有也君才賢得家學而蘊藉益深會泉公累世  
脩積得山川而文譽益顯光前烈未令聞有池君



將克紹三君子以承貺於山川之靈前所以壽其  
親者無疆彼耄耆期頤委蛇雙壽本諸靈氣所自  
萃者又何足多耶某不佞推原獲福之基取證先  
哲致祝望之意云

吉郡丞十第五秩序

余從父半山翁嘗倅吳郡不數月弃官歸後尚御  
史仰山按吳中廉知去狀爲書高風峻節四大字  
使吳人以禮致里第額於門孫太史文恪公擬立  
隱君子傳風世何則世方嗜利干進若飴適于口  
今將比諸荼毒遠避不暇豈人情哉唐虞盛時厥

有巢許炎漢中興雲臺雄傑奚啻風雲龍虎亟相  
從也乃桐江釣絲終以烟水自適士各有志信夫  
余弟麟洲子明先尹寧化有治行進刺濮州治行  
彌謹再進吉郡丞輒嘆曰盍歸從吾伯父嘯傲湖  
山間寧能折腰俛首逐風塵利五斗邪列狀上官  
咸留之狀再上不待報卽馳還旣還三歲當甲子  
初秋弟年五十矣半山翁時將八十葛巾野服緩  
步林泉里人望之以爲漢兩疏復出宜不爲過弟  
又喜談攝生家言從江卽周先生游會心處信宿  
不厭問及人世應酬便嗔日寒允凝然若罔聞也



其要主靜夫靜之爲言百靈之樞三全之府也唯  
動妄故紛紜襍遯擾其心心擾意馳意馳形勞形  
勞氣逆氣逆精搖精搖神耗欲與天地長久非所  
聞已吾弟祛除物累去徼羨絀聰明精神專一用  
默持慧舉攻取百塗盡置不省又引避之亦若榮  
祿荼毒吾口然所謂本虛無而用因循非邪當有  
塊然定泰然安油然樂指約而易操事半而功倍  
非夫煉服九還之丹呼吸二儀之氣徒作勞而鮮  
實用者也采儒墨之旨順天地之經出處隨時動  
靜合一祺壽無疆有不矣聊爲發其自得之趣余

將歸老庶幾共事斯

陳小石改官順

序

古今稱禦戎之策曰戰曰守曰和來則薄懲不以  
自罷去則固守不爲禪備周人已爲得策下此則  
設險者不爲戰黷武者不爲守和親者併戰守失  
之班固所言禽獸畜之制馭常道後世不可及已  
然能戰而後能守力不能支地險何時可守而後  
可和勢不能制大防易踰三者蓋相須云我 國  
家德孚重譯威讐諸夷邊圉寧謐爲歲寢久邇以  
犬羊犯順 聖皇赫怒命將出師盡簡封疆之臣



及內地兵戎諸司博選奇偉特達才勇出衆者以  
克於是部使者出按郡國亦簡所屬賢豪列其狀  
薦於朝分布要害吾僚友小石陳君寔與茲選由  
大名判府調補順德巡山詰戎兵守關隘鎖鑰之  
寄允稱 詔旨矣比其別也余告之曰常事者揆  
其策圖功者明其道在昔籌邊之臣若李牧趙克  
國豈非善事明功者哉今觀所畫策曰匈奴卽入  
盜急入收保毋捕虜曰攻不足者守有餘以逸擊  
勞行將致虜無爲所致彼其所謂素定廟勝似皆  
庸懦苟全之計然而襜褕滅林胡降單于奔潰罕

羗先零支解賓服此兩人者豈徒以守勝耶日饗  
士卒習射藝設間諜便兵弩飭鬪具蓋未嘗頃刻  
忘虜則亦未嘗頃刻忘戰故守固攻克操縱在我  
計先定也今書生談事則曰戰可易言惟守庶幾  
耳惑甚矣夫圖事揆策者視才握樞審勢者視地  
事諳而心逸者視其所歷小石君藝兼文武忠毅  
有謀往從其先中丞經畧西北目擊戰陳口授區  
畫所謂禦戎之策亦旣先定茲往巡山將有戰守  
之責士馬皆燕趙之良戎器得弓車之利形勝當  
阻隘之險芻糧無輸輓之勞而又外有重鎮扼其



衝旁有六郡翼其勢閱習控御俾兵可戰而地可  
守固安攘之大計大丈夫所以立功成名小石君  
所以克振先德不負世恩在茲行已若夫謹外厯  
之調習供騎乘於司馬砥節礪行集事宜民於士  
誠難然比於前所稱列不啻十一君固不以事事  
自多又嘗嚮慕古昔故余畧其前美而冀望於遠  
且大者如此云

贈王省齋致仕歸松江序

省齋王先生雲間人也仕爲甌寧令有善政秩滿  
奏最擢大名判府由閩經浙遇余舅氏陸野翁於

西湖之上指顧山川上下今古見長堤中亘飛虹  
隱隱瀦溪澗之流緩東注之性灌溉者資焉魚藻  
者資焉則相與思樂天東坡利民育物之仁已而  
壯望棲霞南望三台英靈之氣冲霄貫日雖隴樹  
明心龍章表枉而忠臣義士有千載不平之憤則  
相與思武穆肅愬戡亂定國之義已而問故宋之  
墟尋吳越之跡殘壘荒原黍離茅塞杳不可辨則  
又相與動盛衰興替之悲已而登放鶴亭吊處士  
墓誦所爲踈影暗香之詩顧瞻山麓古梅脩竹猶  
偃蹇蕭疎而悵斯人之不可作則又相與慷慨嘆



息飄飄然有脫塵之想時余舅氏父已弃官屏居  
省齋竊傾心焉戀戀不忍捨意其所感深矣比之  
任輒欲弃去會當防秋義不可辭勉強就列不數  
月竟投牒束裝自撫按監司及僚屬士民皆留之  
不得揖余而謝曰吾今乃得從野翁遊矣余竊嘆  
曰士君子明理脩身將以行義違道故聖如孔孟  
猶遑遑兼善何必棲遲衡門自賁丘園然後爲儒  
者之高蹈哉蘇白之治行岳于之忠貞逋仙之高  
潔其行不同其揆一也然世之人則每薄進取而  
獎恬退何居夫亦榮祿易溺而隱約不可貞也老

氏云功成名遂身退天之道又云知足不辱知止  
不殆止足之義殆天道四時之序彼偉績盛名隱  
顯興亡亦天道耳蚤知之士有不遠覽並照其間  
哉省齋對景興思性真觸發曩昔感嘆有以夫有  
以夫尚友先哲將與造物遊遨奚必心跡偶同如  
余舅氏者耶省齋行矣聊爲次第其事歌以贈之  
歌曰兩峯崢嶸兮玄豹之關重湖淼淼兮神龍之  
潭彼幽人兮此中閑棲衡茅兮考澗繫憶傾蓋兮  
衷曲宣願相將兮樂晤言五湖三泖兮雲水連春  
風秋月兮相周旋林之廬兮范之船垂張釣兮涉



陶園歸去來兮挾飛仙與松喬兮齊壽年

刻吳清惠公詩文序

吾邑胡端敏公以風節勲猷爲國名臣居常屈指同時賢豪若陽明先生孫忠烈李遜菴邵端峯霍兀崖魏莊渠吳東湖諸公時時稱說不置蓋意氣孚合道有大同不以成敗利鈍爲軒輊踪跡遠邇爲疏戚也余私心嚮慕頗求其遺編如前數公者嘗讀之大都殊塗同歸百慮一致皆有道仁人非徒以其文也近始得見莊渠集尤純粹無疵深詣道奧旣入蒼梧又得東湖詩文卒業焉氣翕然

克思悠然遠其詞則渾渾然不琢之璞不雕之幹望見知其疑瑩堅實非夫飾章繪句爭鶩滄麗以炫觀聽者也至於憂國勤民砥礪廉隅敦篤信義尤三致意焉因竊嘆曰是不可以仰見先哲芳軌哉夫文以氣爲主氣得其養至大且剛歛之不踰一身放之塞乎天地以之策勲泛應不匱以之脩辭壘壘無窮凡其感於物而形於言者要皆厚人倫美教化達於事變關乎政治協匡正之義得風人之旨其氣全其道備也因文以想見其人是所謂全其剛大而不餒者耶端敏公嘗以微言諷主



曲突徙薪之喻犯熏灼而不懾矢死不渝豈非養  
盛所致彼其居常思慕殆同氣相承奚屑屑以文  
藝追琢哉若曰詩緣情而綺靡奏平徹以閑雅詞  
貴體要論主精微公作或不盡然斯詞人墨士之  
科條不可例於有道之緒餘也公由進士三試有  
司兩爲兵憲多軍功嘗忤中貴逮繫窘辱謫戍於  
邊撫賊入巢拘留旬日皆瀕死以忠信免累官工  
部尚書曰清惠者

今上登極采 廷議褒加謚也陽明先生稱公才  
如利刃志若逝川節比松栢之堅學同林谷之邃

可謂豪傑無所待而興者也有味哉有味哉爲序  
而刻之郡中

贈涂郡侯心宇入 觀序

嘗謂古者學以爲己其實兼於爲人後世學以爲  
人其終歸於爲己夫惟爲己故行吾德以及人人  
受其利而我不病敦本尚實之化不可及也其曰  
爲人則役身以徇物獵名規利僅以自私而已惡  
用爲人爲己其本在德立德純應用裕何心於人  
己之間三代而下岐學術事功而二之漢猶近古  
人習爲吏飾以儒術唐宋以來習文墨薄吏事顧



不若漢世得人我明酌古立教政治道德彬彬稱盛然而士習無以繫服官之常躬行弗率其居身之素語游藝厭法比談仁義薄勲伐甚至馳玄驚空鄙弃民彝物理爲不屑又甚則徇物任情執已私以自文恃能疑爲明察所謂爲人者僞爲爾故必有純心篤行之君子而後持身立政裕如也吾杭衝繁劇郡不有純篤君子曷以慰遠邇後望之心哉自余束髮爲諸生迨今三五十年之間分符刺郡者屈指可得而數殊情而異政同德而殊功或顯或晦得譽得訕本乎命途通塞信不可強

總之累仁集義奉法宜民有孚惠心結於上下其理順其化光餘皆自弃於民顧對其民之弗率莫之反也亦異哉不鑒於得失之林已今年郡民以前守吳公拜憲使去懷之不能忘於時水部大夫心宇涂公以才賢至甫下車即有事棘闈繼又有事武科事竣輒隨例入覲若未遑民務然而士民愛戴之誠拳拳焉出中心不容已蓋知公有爲已之學自信其心不徇人以獵名其爲篤行君子無疑也故訟獄明辨哲矣不鉤距發摘駭人聽聞應接洵平施矣不峻厲自賢拒絕麗益上交謹恪



不援不隨平易近民不凌不激凡皆脩持堅定時  
出當可九屬四民固已信而安之方今

聖天子加志元元將復先朝久任之法必不遽  
有他擢奪民怙恃以吾郡大侵之後閭里蕭然無  
以聊生終仁明之澤以蘇困窮建不朽之績以垂  
竹帛惟公舉實心加諸民卽此三月規畫可以要  
久道之化繼吳公以永懷於民使召父陳毋不得  
擅美往昔大計之日朝廷必且褒嘉初政促駕  
東來大快喁喁之願信非遠矣所謂為已為人詎  
不兩利俱全哉諸大夫少栢吳公穀峯羅公過余

道公素養與其新政宜有頌述余得諸闔郡所稱  
亦復如是敬序其事取徵於異日云

再贈郡守吳菲菴序

郡侯菲菴吳公拜江省臺憲行郡中諸大夫以贈  
言屬余旣爲述士民永懷之意追本梁司徒而下  
三數公得民之由以歸美於靜脩之德自以事核  
無諛詞已而成吾須君復命序同寅感念之情不  
得以蕪拙解因憶漢世循良稱盛大抵皆通儒明  
習文法謹身帥先而尤寬厚廉平使民不寒而栗  
不令而行也史載河南吳公蜀守文翁黃次公召



翁卿之屬所居見稱述所去見思所謂德讓君子  
非耶本乎明天道正人倫臻至治之成法豈以鷹  
擊毛摯操急束濕密網羅織獵能名哉我 國家  
恬熙二百年乂安長治之餘風俗人情日漸澆靡  
兵興以來財耗民瘠比歲水溢穀不登閭閻之間  
朝不謀夕所賴調停節縮慰安牧養使民無轉徙  
天札之患歎息愁恨之聲分毫皆良二千石之功  
以是士民荷戴依依不忍舍可以想見去後之思  
已假令生漢世與吳公輩同列郡國以政教課殿  
最豈出河南蜀郡下耶彼在文景之世去古未遠

習俗淳漓物力虛贏較今昔之難易迨不可同日  
語吾菲菴公其猶居今之世行古之道者與於是  
少栢吳大夫曰行伍無實用余不尚虛文妄稽勾  
以滋紛擾惟公詔之穀峯羅大夫曰治水以導利  
余不奪民故業徇告訐以示彊韓惟公詔之遠溪  
陳大夫曰催科務均節余不慢令致期緩軍需而  
竭才力惟公詔之成吾須大夫曰威明以警情偽  
平恕以議刑獄不使行法之義勝好生之仁亦惟  
公詔之夫實士伍嚴衛禦廼體民隱微主河渠重  
民天顧行所無事征輸以重軍需謹貯積而取之



以時刑以平民禁姦而不爲苛細諸大夫各舉其  
職凡以子惠元元而皆菲菴公相與諮諏論議共  
成其美諸大夫旣奉法循理尤孜孜慈愛惻怛行  
公之意卽公之運用楮畫犁然偉矣是以和德行  
和惠宜其網緼交盪滲漓滂洋若此諸大夫之感  
夫亦本民彝徵化理豈以朋好私公哉方今  
聖天子游心太古銳意雍熙將舉漢廷徵拜公鄉  
故事公將首膺是選循資常調非所以待卓絕賢  
豪也謹拭目俟之

斷苓集序

談詩者每云吟弄風月摘詞振藻必出巖居川觀  
隱約不遇之士爲其悲憤悽楚有足感動人者悲  
夫旣窮豈君子所樂脩詞亦達人能事非通論已  
達人必不逮脩詞是虞夏之詠歌殷周之雅頌不  
得列於六經李唐盛時君臣倡和諸篇其孰愛而  
傳焉嚴氏評詩嘗借禪爲喻獨取上乘蓋責妙悟  
略幻跡若由外以鑠已因物以激志則奚心得之  
有哉余友三洲先生以臺憲之貴薄榮祿不居幽  
棲湖山之間著述甚繁是集其百一爾余受而卒  
業焉雋永清越言暢旨遠不雕琢而莊嚴不屬意



而通解真如空中之色有生於無悟道妙得真機  
隨寓而安故隨感而發何有於宦遊隱處而其詞  
顧將藉境界爲軒輊耶夫不局於藝是謂通才不  
滯於迹是謂妙道宜其汗漫江河輝煌星日膠轕  
寒暄陶鎔花鳥絕無家居火食之氣如此是所謂  
本性情該物理自然之音非夫探竒索異獵聲華  
亡本實也鑒賞之士得無以余爲知言哉言斲苓  
猶耽隱也爲序而傳之

贈朱宜人六秩序

嘗謂女德不外見故稱人婦於其夫稱人母於其

子皆卽其人倫物理之用以明徵漸漬感動之實  
也至誦周南召南諸篇卷耳采蘋著貞靜專一之  
心葛覃蘋藻發勤儉謹飭之行樛木小星表慈良  
逮下之德專言后妃夫人閨壺慎脩之懿何若是  
其詳盡彰明耶說詩者謂詞雖主於內行而脩身  
齊家之效歸重於聖化所率先焉則亦何嫌於稱  
述女德爲哉朱宜人者余同年友九疑公之元配  
也始毓秀於世家旣好合于名閥當隱約處之裕  
如若有所恃以相信曾不少介於衷逮宦達愈自  
損抑又若有所懼而不敢侈肆婦道有如此者桂



子蘭孫守遺經率庭訓恂恂雅飭爲時所推而不  
屑屑於富貴利達之習其母道有如此者夫窮達  
定於天本不可意必而世之號爲丈夫者方營營  
戚戚以得失遷其情宜人女質也廼安義受命處  
約而泰處泰而懼教以爲已不徇世情想見隨時  
輔翼所以致夫君惇信行德振奮其慷慨激昂之  
氣而不移不淫與陶鎔子若孫之德性溫醇恬雅  
克遵道藝之林而有翩翩千仞之志皆賢人君子  
行誼豈尋常拘局之見所能及哉今年六月十三  
日爲宜人六十設悅之辰諸縉紳儼然冠蓋登堂

爲宜人壽余以姻誼造賓筵末行因女孫獻觴迺  
致祝曰洪範衍福首曰壽康旣多受祉朱芾斯皇  
受天之祐爲樂無疆賓容旣肅昇我孫子福祿萬  
年君子偕祉純嘏萃上黃髮兒齒日躔鶉火護燁  
其葩吹笙鼓琴德音孔嘉令妻壽母晚美靡涯余  
旣反歌九疑公起而賡歌曰惟彼二南專言壺儀  
壺儀旣正寔始化基今昔興隆於傳可稽我儀圖  
之疇愛助余旣醉旣飽聽用美詞報章不穀中心  
藏之干足旣獻旣酬禮儀卒度聲鍾伐鼓以歌以  
無燕燕楚楚續紛而前逡巡而退鄙余受簡撰次



其事

奚處囊蟲餘卷之十二



國家圖書館, NATIONAL CENTRAL LIBRARY, TAIWAN, R.O.C.



奚囊蠹餘卷之十三

記

肥寧橋記

余始治廬值境內大侵發粟省耕禁糴販緩征輸  
既竭心思而澤未究乃行阡陌間見平疇千里遇  
雨卽流散莫解潴畜余嘆曰此縱其流而不知止  
者也如旱何檄州縣尉暨義民若而人使監水教  
以䟽鑿三令五申長渠廣堰稍稍遍村落是歲仍  
饑廬以小収環郡城故有濠源出李陵鷄鳴諸山  
東下入巢當夏霖雨泛溢奔騰漫汗往往沒田廬



民且病涉余周視之嘆曰此障其流而不知行者也如滂何爲之建橋於水西門外跨濠而東其勢啓水關故隄縱流入城市以東注更建小橋濠西支流以殺其衝蓋自大橋而北貫城而東各十四小橋而西北十二透迤匯于湖而水患息夫宜行而障也猶宜止而縱弃其益者納其損導其利者逆其害灌溉有資浸淫無慮治水有異術哉橋皆甃石大者爲三空廣丈有八尺高三丈長十有五丈三尺小者爲一空廣一丈有二尺高一丈有三尺長三丈有五尺工料等費總若干緡官給僅三

一官主之民自備三二民主之民穴地得石當其二之半無科擾督責之繁而事集經始於丙午春中成于冬孟鄉大夫蘇原吳公聞之曰茲水爲民患久矣至今而始寧肥民亦庶幾未寧乎題爲肥寧橋余竊謂民生未易以寧猶水故曰防民者甚于水水壅而潰傷人必多甚言不可障也夏后氏治水曰行所無事夫胼胝於外歷八載而謂無事云何率其性各適其宜可濬可排可疏可鑿以水治水而已無與焉故謂無事云爾於民亦然水之止也聚所欲其行也寔勿施其所惡好惡因民而



不與是寧民亦行所無事而已余媿得其一端之  
似而多所未及也書以告於後之君子當有諒余  
衷者同舉是事爲同知楊賢通判王儆晏若川推  
官孫慎合肥知縣歐思賢陳其樂丞聞嘉識簿李  
珮尉邢鸞監工義民王朝舉孫鎧贊襄成功合併  
書之

石橋記

許水出石寨山迤東匯于江經新喻北鄉鄉人沿  
流而居者疊石爲橋用以利涉吾僚友晏子東之  
世家焉爰自號爲石橋子請圖於郭桐岡氏而屬

余繹其義余惟石橋僻在江鄉無城市紛華可悅  
桑畦泉徑石門荆牖水居木侶群鹿雜豕老稚歡  
呼雞犬鳴吠皆村田之樂事橋居之心賞也而子  
方經營四方巖廊黼黻壯其懷冠蓋麗澤偕其好  
寧無需於解腆乃略彼而耽此何居人傑興劉世  
表圮上之遇中卽建節不忘題柱之言遡本源也  
宦迹在四方而情寄夫鄉曲心安而慮達邇可遠  
在茲所謂處市朝有山林之氣豈非士人之雅致  
哉若夫芳菲逐流蒙茸侵砌繁陰高蔭橫潦下奔  
月映波光雲根凝素霜寒入迹水壑含姿隱而虹



飛明而練曳四時之遇不同隨感皆其自得所謂  
取之無窮用之不竭又非達士之遠覽哉至於體  
靜而洞達無破應妙而順適有常則尤執德遵道  
比諸迷於利達驚於玄虛而稽之無實者清濁不  
侔矣其稱名也小而覈其取類也大而遠子於斯  
橋當並傳不朽也然余聞之道也者路也曲而蹊  
徑衍而康莊阻而崎嶇濟而河梁皆行遠以適國  
會通其義勇於進趨不退然中道自盡子知所以  
圖不朽矣作石橋記

重建白雲茅屋記

余嘗讀羔羊之詩蓋思節儉正直之風後世不可  
及云載誦衡門考槃諸篇想見賢達高舉遠引悠  
悠泌水陵阿克然自得視世所謂富貴利達何啻  
敝屣乃知委蛇安適非由意襲碩人寬廣之懷其  
施于在位猶昔也滑臺宋先生當元季衰亂掛冠  
歸隱築室瓠子堤上脩明性命之學根極天人之  
奧彼其瞻睇行雲綢繆簷宇胸襟洒洒真若與造  
物者動遊而靜俱故自題其軒曰白雲茅屋旨哉  
無心之高蹈達人昭曠之遐思也值 皇明更化  
詔詣公車負囊簪筆出入禁垣傳經下帙陶鎔胄



子高皇帝聖哲知人嘗亟稱之至擬爲尚父興周今去先生之世百有餘年茅屋已就傾圮而故址猶存余問俗至滑屬任令重建焉因竊嘆曰先生避世嘉遁蓋將終身畎畝無復志于四方考槃衡門何其適也已而際風雲之會翊文明之運開布芳華敷宣教化敦朴雅素真足以帥先士類立懦廉頑全羊素絲又何足多耶易曰樂則行之憂則違之確乎其不可拔夫必有不可拔之德而後樂行憂違裕如也彼伊尹太公望之在商周浣渭築巖居然山澤之癯丘園之貴已出則皆爲帝者

師孔明全性命于亂世南陽躬耕亦若忘情天下者而三顧之後昭烈獲嗣漢統大抵皆卧龍之功先生退不失已進不失時雖功烈未竟其確然龍德固可槩見庶幾哉伊呂孔明之流亞與則其遺踪雖與莘野渭濱草廬並名垂世奚不可哉余懼斯屋雖更新後之人或不察吾儕景行興復之意以爲侈觀而無益將任其傾圮猶昔也故爲表著其事勒諸石

四賢祠記

往年劉中丞夔倅大名建書院以正學倡率諸生



祠宋劉元城先生其間已而漸廢城東故有三賢祠廢尤甚守者奉狄梁公寇萊公韓魏公主併內元城像前若祔食然事頗不典嘉靖庚戌某承乏是郡謁祠下爲撤其像正謚號以定神位然猶祠當公署之後路從旁入堂廡不飾不稱崇奉之意明年督學山峯阮公臨謁顧某等曰祠以報功德風士民乃令不稱若是盍圖之已而巡臺方泉盛公東江揚公扣繼至皆申命如初於是謀諸僚屬屬李倅某董其役集材糾工扣地崇址闢門南向另爲一區直北爲寢四楹東西序皆六楹左右翼

以亭用覆記石南爲堂亦四楹堂前左右復繚以庖涵垣屋重門邃宇鼎建如儀東通上達樓又東通諸生號房皆增飾踰舊費凡若干緡取給公帑無所需於民間工始辛亥十月迄壬子二月某承命紀成事竊考郡乘載四公事甚略念昔僞周釀禍唐祚中移明大義以正亂世梁公以之宋勢浸弱狂胡內擾定廟勝以攘外夷萊公以之決策兩朝撤簾復辟魏公以一身任天下之重正色立朝間關遠置元城以心學衍河洛之宗裒然功德豈不膾炙人口以不皆魏事故畧據所載卽三公皆



一節及民元城僅數語合道何以繫人深思歷千載猶血食茲土邪書曰懋乃攸績康濟小民又曰民心無常惟德之懷夫惟懋績及民而後民懷其德然匪立德以淑身烏能有辭求世哉竊謂四公皆立德之士要非徒以才智殊絕違會乘時標能擅美樹偉績而求令譽者也夫制事以才制才以德才德備而成賢執德既弘致用自裕以典郡國則勤恤民隱而除其害有循良之績以臨大節則托孤捍患保世滋大有安社稷之勲以處患難則死生利害無所移易有知命達化之識雖時異勢殊其于尊王庇民之心致身殉道之行蓋易地皆然異世同神矣立可久之德建可大之業夫是以求懷于民假令僥倖一時勉強一事名實雖加於上下道德不協于民彝則四公生不同時行不同軌僅以仕于斯生于斯乃享祀一堂之上卽人無異議神其居然歎哉夫褒功德以風民監察之職也脩廢墜以飭治有司之常也勒諸貞珉紀分合之故表致一之義云

魚異記

數年來吾郡人多畜魚孟中其種鱒也大抵多赤



俗呼爲火魚其間有若鶴頂破玉紅頰白喙朱鬣  
素尾陽背陰腹稱名不一皆號爲奇品尤加意焉  
水伺其清渾食喂以鮮好時時察其饑飮審其涼  
燠盈寸以上便可盛以金玉登諸几案客至出相  
夸視以爲娛甚者一頭千錢不獨里閭少年好事  
爲之縉紳士亦往往而有吾宗問渠兄母陳畜魚  
二十餘玩弄既久母歿哀毀不忍視三月皆變爲  
白聞者爭往觀之訝其異也比及去喪又皆變爲  
赤異復異矣相訝滋甚余謂魚固善變物若火魚  
之變尤多方其始生鰲然不異諸魚畜者羅小頰

虫飼之於是漸紅稍長變爲白爲淺紅或紅白相  
半或相勝無慮數十百色始定有名稱然率變有  
常候既定不復變卽變率班駁不齊今一變皆白  
再變皆赤素縞同於居喪鮮麗逮其終制無知若  
靈人動物合豈所養之食故異抑所變之色偶齊  
卽冰冬躍聞樂出聽中孚能及豚魚理固有之余  
兄率祖宗義方孝友之言無間誠感於魚志一動  
氣不可謂偶相值也余旣以一時俗尚爲異重以  
所聞吾宗事尤異也是爲記云

省吾記



余昔業舉子味曾氏省身語僅及三事似未悉人  
理迨遊京師遇司馬郎白子純夫取省吾自號余  
扣之曰子知省之義乎省之爲言察也心之神明  
厥有存亡是曰操舍之機行之事業厥有安頗是  
曰吉凶之介人之聲實厥有聖愚是曰嚮往之岐  
是故君子貴於省也三之爲言數也日數省焉示  
不忘也謀道謀也謀國謀也安而危險而易同而  
異是非也勢交情交孚交神交上下之交交也  
言傳心傳見而知以見傳聞而知以聞傳誦其詩  
讀其書以文傳傳也忠言盡已信言盡人習言人

已之盡也盡天下之人窮古今之變通物我之故  
約而博簡而該故曰曾子之守約也則甚矣子之  
泥於章句而無悟於理也然猶有說焉省之爲言  
損也察甚傷物而不祥則智可損文勝繁苦而見  
離則禮可損志欲其堅損于銳量欲其弘損于隘  
躬不逮者損于言氣得養者損于暴以一損當百  
慮老氏之語玄也釋氏之語空也吾儒之言定靜  
而無爲也皆究極其損各得其益者也故曰爲道  
日損又曰天道猶張弓損有餘補不足省之爲義  
天道也奚其章句云云也余聞之渙然若釋知損



之愈於察也因書以自省云

出師禦敵圖記

國家承平日久兵防寢弛一夫奮臂萬衆辟易於是海寇縱橫焚劫無所忌憚而江南諸郡慘烈之禍無已矣當事者不得已招致客兵東齊之長竿百粵之毒弩非不足衝鋒禦敵迺犒饗不足飫其欲威令不能制其命烏合鼠竄會無固志何則彼以秦人視越肥瘠不關於身也於是憲使李君始建團練之議編比閭族黨之氓寓伍兩軍師之法散則相維聚則相救利害切於同舟力并而勢合

李君又身拊循之寬其約束不以無事見罷遇警一呼而集引以擊賊爭奮出赴戰賊聞爲罷去闔郡恃以無恐人謂無調遣之擾省資糧之供而坐收敵愾之功遠懾倭夷之膽李君之功於是爲大作出師禦敵之圖予爲記其本末如此

太尉楊公墓碑記

漢太尉楊公持身立朝大節載在史傳燁然偉矣至於却故人暮夜之餽尤膾炙人口千載之下能使聞風者立懦廉貪豈非慎獨之大賢振古之豪傑乎迺宋儒猶竊非之謂天固無知地安有知嗟



乎是可與俗儒道哉凡質稟天地之氣性受天地之理君子率性必事皆中理然後俯仰無愧參爲三才否則人極不立此身若無所容於覆載間是故目視手指儼若森乎吾前如鑒如臨聖賢所爲兢兢不敢忽也亦豈真有指示鑒臨者乎察乎天地之理故知天地不可欺通乎物我之義故知爾我不可欺折之有四凡言一心不可昧耳此吾儒誠意之功克其類義不可勝用矣漢世去聖人未遠所謂明經蓋皆精研其義非若後世支離章句之未彼其晦跡湖城數十年覃思竭智顧不鮮於

天人大旨廼漫作應對啓後世之多口邪史載諸所論列皆根極理奧援經證事鑿鑿有據不可槩見淵源之學邪潼亭公墓所在余守關之暇謁墓下蕪穢不治心竊傷之旣畧爲脩葺建置饗堂築垣墻禁樵牧樹石立碑使過者知所瞻仰重有感於宋儒之說漫論其事表其學術之大者云

重脩太平府知府端敏胡公祠堂記

有明太子太保兵部尚書謚端敏胡公浙之仁和人倣儻瑰瑋精研道腴蚤有志於經濟起家進士正德間由南部郎出守太平以治行卓異進江西



按察副使蕩平東鄉諸盜時宸濠陰蓄異志公上  
疏發其隱謂禮樂政令漸不出自朝廷江右大  
可虞不在諸盜濠怒誣公離間親王逮繫京師  
榜掠玷死言官交章論救得戍遼陽濠反伏誅值  
世廟繼統召起行間拜按察使存歷臺省列鄉  
左都御史改兵部尚書加宮保公以十事要說大  
意欲簡閱團營宿勁兵京師謹防壯虜又勸  
上親賢講學遠媚疾絕嬖幸憂深慮遠顧以切直  
犯忌諱不盡用尋謝病乞骸骨章數上迺許馳驛  
來幾復召起適無疾卒於家儼然衣冠危坐不

仆余時爲諸生每望見顏色聆論議所聞平生經  
歷皆卒卒未究其志惟太平最久無負于民死而  
有知猶依棲麗江百粵間也頃余承乏蒼梧亟訪  
郡中果建有詞歲時蒸嘗不失問政蹟則故老相  
傳謂爲廉明博大在郡勸學興禮築城壺關綏柔  
上夷功德不可殫紀乃作而嘆曰嗟乎士君子所  
至策立勲業行德濟世豈希冀聲聞當時報酬身  
後哉天地萬物本吾一體分誼當爲時勢不可已  
凡以盡其心事其事吾何得而與焉惟澤在生民  
功施社稷維繫人心自不可解則報祀之典所由



義起而非其立德立功之初心也公昔有言殆亦自歎未竟撝謙無已豈意民心歷久不忘洋洋俎豆之存適契其依依故民之戀非夫精誠上下感應孚孳無俟勉彊若是耶今江右有祠吾浙有祠公所謂不足人愈多之稱頌勲伐尤彰明較著至所自信若太平郡治能無想見循良偉績入人深遺思遠哉茲郡之祠信不容已矣夫表先哲以勸官師存遺惠以惇風教固憲臣奉揚明命之職亦一時共事同心乃檄郡脩飾棟宇嚴潔祠事仍記憶大畧勒諸貞珉俾瞻拜祠下者知所愛慕垂

世無窮云

冲霄山記

蒼梧鎮城北枕大雲通星東聳金石西峙朝臺南俯大江江上諸峰巒嵒羅列如屏如案舊名火山謂其上夜光燭天相傳水有明珠又云南越王佗埋劍山阿莫可考證居民往往戒火十日不雨問閩祈禳獻賽金鼓相聞問之曰火山相對故多火災不禳疑有害夫山川興雲注雨利潤民物故曰說萬物者澤終始萬物者山奚不察夫山本有利無害而徒稱名之惑也山本無名由人始名稱名




自我乃妄意詫山惑甚矣龍劔在地則劔光生蚪  
珠在淵則珠光生闇然彰明若錐處囊中其末立  
見賢才處世亦復如是邇年栢郡人才幾於不振  
顧茲萬山盤紆兩江榮帶當五嶺之中挹九疑之  
勝山高水深分野在牛女河漢間謂非渾融佳麗  
闊達宣朗不可也其所疑結會萃於人者豈不然  
哉今學宮坐對此山尤近余竊於斯有深意焉改  
題其山曰冲霄冲傍從水霄上從雨皆以制火且  
不失夜光之義旣以解愚氓之惑重爲士人祝繼  
自今賢豪奮庸雲蒸川涌用匡弼我國家以道

德文章豐功偉烈掀揭宇宙不啻山川之光芒上  
燭卽靈鍾秀孕焯爍霄漢不在珠劔而在人賢夫  
旣手書三大字勒石仍識諸碑陰俾生育斯地者  
永以慰且勗云



吳震齋餘卷之十三

國家圖書館, NATIONAL CENTRAL LIBRARY, TAIWAN, R.O.C.





吳襄蠹餘卷之十四

雜著

貞女傳

大詩首關雎重化始也孰謂閭閻微賤閭閻柔婉  
非有詩書禮義薰陶母儀傳訓爲之桀黠而能矢  
心從一金石不渝非夫天理良彝率性爲道者哉  
陝以西周召所嘗過化遺風宜爾矣作貞女傳曰  
楊貞女者華陰通洛里人也年十六父稚納潼關  
郭恒聘許以爲妻潼華之俗婚嫁論財恒以不足  
於費不得娶將牟利商販間遂去入楚居楚又不





能卒致羸益留滯楚當是時人謂但已更娶楚女  
潼華富貴人又爭致之雄於是謀改適女女不可  
曰業以許女郭氏郎死不二矧但在邪已又斷髮  
自誓雄既不能奪女志訴諸縣令微諭之知持堅  
不可奪聽令自裁女迺益深晦藏謝絕鉛華見聞  
屋故傍上崖郎崖半爲營窟獨處其中垂鐵繩攀  
緣上下女既入輒引繩入窟雖家人不得仰窺端  
居不事事亦無怨慕凡歷寒暑二十六年而恒還  
自楚時女已四十三歲始成禮偕老焉  
虎林生曰語云輕諾寡信以謂已諾必誠不愛其

軀故重也延陵季子心許人劔郎死不負千古誦  
義豈非人之所謂賢豪者邪貞女巖棲穴避若將  
終身垂老必借夙約一念誠信可與昔賢比倫矣  
士君子竊許國之義貞潔之操不聞甚者猶懷二  
心雖儒衣冠乎曾不若婦人女子悲夫

跋畢子石祿命卷

夫五行之秀人得以成形性以多偏駁是故人之  
難全也迺其清濁厚薄倍蓰異齊區別於輕重毫  
釐間是所謂命而精微奧耿非夫知慮所及也夫  
子罕言之至立教亦唯卽已定之富貴貧賤夭壽



曰是卽命示不得倖致苟免則已若必一一知來  
曰回塲由厄賜溫裕瞿有嗣云云豈惟聖人不能  
卽造化亦不屑屑爾是卷畢公所推子石使君命  
理余三復之皆本所生支干與歲運相值較量生  
尅平頗著爲休咎蓋醇醇淵冰之戒其要居貞順  
應俟命樂天非日者致期取應淺鮮不經語此大  
易消長之理吾儒神知之術可易易言哉使君大  
畜撝謙處睽敦良當顯仁之時深藏用之慮有以  
夫淵源之學寧獨奉是周旋已邪媿余學易未能  
漫書嘉慕之意云

跋廣居交遊卷

右先朝諸名公翰墨遺昔文襄公子廣居者詞  
義婉變締好奚啻膠漆乃廣居明經登科兩貳州  
郡歷廿載沈鬱以歿夫文襄爲國名臣廣居象  
賢登進深結巖廊爭相推譽稍一攀援何慮通顯  
卒不爾諸公畧朋比公任使耶廣居安義命薄榮  
祿邪世多種露栽雲蘿攀驥附謂能投功名之會  
比於廣居何如耶廣居孫一書君攜卷出示妄綴  
斯言

神龍



龍神物也故善變化東海有二龍一化爲絲絃掛  
蘆葦間漁父得而竒之置諸屋壁其明日將以繳  
緹他物絃輒蜿蜒飛動手足不及措雲氣布濩已  
騰空不可見一化爲魚潛蘆葦下見者持去壘烹  
入饌客有博物者曰此龍鮓也沃以醢氣氤氳起  
一坐皆驚夫能大小之謂神善存身之謂神微如  
絲縷放之噴薄千里彌綸宇宙不物於物故神也  
見食於人則物矣鷓夷赤松用絃隱也王齊而淮  
陰非夫登俎之涸鱗乎逍遙子曰絃爲變成魚爲  
化漸變不易化莫不變化者神脫變者物玩潛

見飛躍各以時及進退存亡其正弗失聖不可  
是曰龍德

市虎

猛虎生於山林逐諸獸以爲食間出至人其性務  
食莫辯其食之人與獸也歲閏虎尤繁山行者相  
戒逾謹惡少年習知人情之畏虎也取虎皮稍加  
綴葺置身其中日西昃或昧爽游衍陰鬱之處居  
然虎矣狐旅經過偶出逐之人辟易棄所負物奔  
命虎徐就拾之以爲得計既久人咸以爲虎虎亦  
自忘其爲人虞獵踪跡之輒解裝荷革相向人猶



問虎虎又巧為誑人恨不從衆搏虎于是人畏虎  
滋甚虎威日張已而漸逼城城隅亦謹相戒一日  
忽入城城市紛紛追逐避虎其密友察知其狀把  
劍疾呼曰子人也何用作偽罔人至此利其利不  
恤其害邪虎磨牙呿爪鬚毛上指如蝟咆哮如雷  
其人亦驚走且徑且竇惟恐虎之相及父子逢諸  
途聞其故嘆曰市貞有虎邪友人誤指為人邪心  
知其人而畏心甚於虎邪必不然已萬軍之將夜  
悸於一石黔山之虎乍驚于蹇驢祇自全爾寧復  
計其非真非偽為猛為怯邪詩云旣之陰女反予

來赫

列祖像贊 并序

夫衍餘慶者本諸世積監成憲者裕乎後  
昆儀刑儼若于永思繼述允懷于克肖遺  
謀不遠垂範在茲迺擬諸形容冊青猶麗  
印稽於蘊奧琬琰難名爰命蕪詞庶存梗  
槩云爾

於赫我宗肇迹伊洛南扈宋蹕喬止雄廓眷此桑  
麻時奠耕作山川效靈一廛始拓迨我高祖介然  
磊落識悉典墳文綺金臚高軼侯王遠引巖壑玄



真志魚孤山籠鶴帳底梅花杯中荷葉七政周  
六經筭篋培我弘基啟我儒業偉曾繼志溫溫  
懿志已宜人以義制利勞矣謙謙敢焉事事齊  
隱施丘園高貴卓犖不阿允毅無愧伯祖嗣哲  
巧於拙克勤幹盡益振丕烈百忍身謀一誠心  
荆樹同春芝蘭森列命服晚榮薄楊幽節載稽  
福內德孔淑桃夭化洽頻繁禮肅朗宣四教敦  
九族歷世無間永茂雍穆昌我庶嗣而康而祿  
是開先貽燕惟穀之念本源瞻此瑤軸

王處士像贊

繫何人兮貌古神凝若先民之遺直兮非予之所  
識也是歌咏淳龐之天耕鑿沃衍之域喻邾駟之  
遲馳耿紛華于蹴屣衍丘園之容與秘巧慧于悃  
惱者耶古聞擊壤亦云抱甕匪斯人之徒與荆秦  
履于幽真覺冥蒙之幻夢者與

錢通政見齋像贊

觀衣冠之儼若挹謹愿之溫然祿既厚以心下齒  
歆邁而神全道協淳良業專名姓大德曰生比權  
司命藏慧運神以隆休慶金液涵精寶餌駐色馴  
鹿與遊靈鶴與息坦慮存誠以頤中極商山羽翼



元功茂密巧隨秦俗與衆同卹斯金門之大隱兮  
信通儒之仁術也

野亭馬公小像贊

質稟五行之純道通四聖之理宰邑倅郡時行則  
行惇倫薄祿時止則止身世流雲功名敝屣一觴  
一冰興有似乎陶潛見大心安樂不改於顏子雖  
被服如飛仙寔縉紳之高軌也

曹隱君像贊

憶故老之芳風覲儀容兮孔淑似內秀而多聞乃  
藏輝以示朴世姦利兮蠅營獨履仁兮龍伏族狐

疑兮啓嫌寧蠖屈兮終睦詩書開文藝之先禮讓  
貽家庭之穀包荒媿逋竊之心苦節破侈靡之俗  
信身潤而情逸式如金而如玉是謂隱君子兮名  
無辱

自箴

人皆有善爾獨何長自用則小取善無彊好而辟  
樂而荒辯而逞思而浪難持者志易隘者量悔生  
於哉譴氣暴於徬徨務恬淡以久要遵易簡爲周  
于正大自不屈無妄乃有常靜御動經緯章同而  
異不易方守爾防休且光



養愚軒箴 并引

大名郡齋後隙地半畝許中有小軒三楹  
四隅雜植槐柳蓊蔚幽邃不減山林歲久  
稍敞子蒞治之明年撤而新之事間即默  
坐其間時閱老子至為治非以明民將以  
愚之子愔然悟曰嗟呼凡今之治功尚精  
明績著竒偉運智據謀孰非明民而乃去  
彼取此子云民可使由不可使知唐虞之  
民耕鑿飲食志帝力於何有孰明孰知  
堯舜神化宣聖昌言允協斯道非玄虛也

因題其軒曰養愚復作箴自警云

維天降才本無聖愚長無師友蒙困則愚取善者  
聖自用者愚好仁無尚不學猶愚玄德大順去智  
以愚至人處世藏暉自愚甯武奮大節以成愚莊  
生蘊大智於若愚不徑不竇柴也固愚默識心通  
回也如愚博聞彊記聊以破愚困知勉行庶以明  
愚閑邦守默靜以養愚開誠布公動以行愚念下  
民至神而匪愚畏上帝居高而鑒愚徂詐萬端率  
我性愚喜怒千變任我情愚人謀就我畢盡其愚  
我謀就人不欺其愚坦蕩蕩兮予懷何愚閤悶悶



兮予政何愚予將效古之以直愚無寧襲今之以  
詐愚

孟銘

八閩縱橫命將徵兵臣職監儲給餉徂征鯨鯢既  
獲武功告成恭承大賚永侈恩榮  
嶺表肆征監軍會寧霾曠湔除海山廓清效有勞  
績仰辱綸音藩叅踈迯拜賜帑金  
嘉靖癸亥蕩平閩海臣始與謀微勞見采文綺輝  
輝南金皚皚三錫榮膺垂世憶載  
歲寅月酉節屆 萬壽廷尉趨朝鸞班適遙天王

燕喜慶均且厚奕葉無忘顧諟銘鏤

皇極鼎新紫宸壯建星拱微垣天開別殿臣貳司  
寇式瞻歡忭隨例頒恩無功顏覲

歲在丁卯始元隆慶䟽鑿濟沛河渠底定猥役督  
漕謬承 恩命鎡金斯兼襲衣孔覲

海洋群孽會酋稱黠戊辰冬月馬耳獲捷膚公旣  
列 寵頒金帛渠魁未滅猥慙授鉞

東夷冥頑占據平山振旅夾擊靡棘弗刪擒王俘  
叛轉危就安金綺慰勞覃恩寔繁

辛未臨邊秋清塞煙息我介士城彼裴川爲藩焉



垣以牧以田勞匪身親惠隕自天

奚囊蠹餘卷之十四



奚囊蠹餘卷之十五

墓志銘

江西南昌府通判野亭馬公墓志銘

余外舅野亭馬翁以嘉靖庚申十一月十九日歿  
先是翁自爲志曰余讀陶淵明與諸子疏云天地  
賦命生必有死自古聖賢誰能獨免逮卒自爲挽  
歌祭文謂非齊死生而委順造化者乎予生七十  
四年居林下二紀矣百齡易促歸盡有期愧以譏  
行微名曷堪昭世然前無所稽後將何述勉爲志  
之謹按世譜系出伯益春秋時趙王子奢號馬服



君子孫因以爲氏世家河南郡屬扶風吾宗實宋  
太保默之後思陵南渡扈蹕家杭繼遷海昌代有  
顯者宋萬十一宣教以功能祀于鄉始祖楷元嘉  
興路總管同知高祖昭杭州路總管府判從伯祖  
維周海道萬戶世祖用周繼同知後杞道隱處海  
門號則天真居士子昭昭生辰辰贅于陸籍芳林  
鄉實爲吾曾祖以字行曰子春生吾祖壽是先生  
考履齋公廷王蚤有文名格于時命應貢歷光澤  
教諭母郭氏成化丁未四月十六日生宗俊于福  
州學宮旣長傳家易學補郡學弟子員每督學使

者較文咸寘優等丙子舉于鄉庚辰下第以親老  
乞就祁門教諭戊子釋先人憂補弋陽尋陞直隸  
來安知縣壬辰三載考績恭遇 皇上元祥推恩  
贈吾父如子官母妻皆封孺人甲午進江西南昌  
府通判時母年八十餘遂以終養不赴配張氏政  
和主簿錢塘張浩菴女淡泊同志白首伉儷子男  
長行健早世次行陸女二長歸福建布政司右叅  
政張某封安人次鴻臚寺司賓署署丞沈董孫男  
亦龍縣學生本鳳岡族姪文奎季子爲吾兒行健  
後孫女歸滑縣教諭程近齋子淞業儒生平質任



自持不逐時好簡言寡交人罕知之始爲親祿仕  
終辭祿養親良順夙心家居讀書厭入城府角巾  
野服人稱野亭先生時有素心人萬鹿園李响嘯  
相與往來庶幾二仲或招之遊亦間往不爲絕俗  
雖兩罹回祿室廬蕩然無所動於中也此先生自  
叙云爾先生抱道守正澹泊無營宦游十餘年所  
至不私一錢在祔門以明理脩身率諸生揭紫陽  
白鹿洞規衍以經傳俾知嚮往爲今日專務德化  
不事法術盡革浮費允謹貯積適歲大侵恃有備  
得無流亡撫臺某行縣入滁過責供張至厲聲色

先生曰吏本儒素不習奢靡請伏不敏之罪某慙  
而去自是心厭折腰歸思不可遏矣曾有南昌之  
命弃官來還圖書數卷泰然自足郡大夫捧檄詣  
先生先生辭謝使者三終不肯受獨靜處一室陳  
書檮藻卽朝夕不自謀其於世俗交際炎涼毀譽  
寧有介於胸臆哉先生每自比淵明某嘗爲文壽  
先生亦謂神孚於靖節今以耳目覩記奚古今人  
不相及哉所著正學良規衍義內典要言各一卷  
經濟記要一百八卷野同集二卷鈎玄集四卷藏  
家所不存者倍是次年正月十二日葬棲霞山新



阡與張孺人合孺人別有志不述述翁自叙與其  
生平大節如右系之銘曰繫宗伯益轉徙吳越兮  
儒林世家簪纓奕葉兮疇則天真沉潛道脉兮疇  
罹播遷芳林穎脫兮光澤有教從政猶缺兮政教  
式兼云胡宦拙兮世情固多違兮過自任高潔兮  
一錢不饑五斗不屑兮手著揚玄身僵袁雪兮心  
幾息物我兮性靈徹生滅兮遠比黔婁近方靖節  
兮悠悠林壑信美以樂兮餘富餘貴不愧不忤兮

朱近城墓志銘

吾杭故宋舊都當思陵南渡時扈從多中原人故

今著姓往往系出中原有以也錢塘近城朱公其  
先亦由彰德安陽徙河南偃師已而入浙五世祖  
德貴元至正間始籍仁和我明洪武初高祖元  
亮改錢塘亮生賢累贈中憲大夫直隸廬州知府  
賢生鏞登景泰辛未進士歷官廣西右叅政鏞生  
淇淇娶廣南知府沈好禮女是生近城公公諱桓  
字司直居故傍城隅因以自號自幼穎異習父祖  
遺書通胡氏春秋值家中衰乃弃去服賈勤約謹  
守不墜先業顧自以不終夙志悉心教子嘗以已  
意微激之子竟以其父書顯發身賢科爲州刺史



先業益振公於是盡解世累日與里中二三老人  
徜徉湖山間縱飲自適刺史君又順承其意凡事  
事不以溷公唯恣所欲用爲取給公適時時得劇  
飲爲樂間就屠浮談空寂施舍不悵生平慙直寡  
偶侗儻不羈與人游雖猥賤亦得近就亢禮卽貴  
盛輒遠避若將貌之刺史君嘗爲公輸貲司農授  
散官公辭以野朴不稱取冠服深緘篋中示不再  
著曰使我正冠束帶局趣作勞孰與持杯笑傲陶  
然無營哉卒之日猶引滿如常忽就寢瞑目長逝  
是爲嘉靖辛酉正月十八日生成化辛丑九月二

十三日享年八十有一余聞往哲矯世厭俗失意  
自放多寄興於酒或遺形見性輪迴生死輒托跡  
於佛世稱陶隱君白居易豈不羸虫豪貴泡影人  
寰哉近城公宜有心嚮慕其人視世銖兩貨財愁  
居懾處孳孳無已者不可同日語也公配陳氏石  
埭司訓東滄公女先公二十一年卒子一孫炎卽  
所稱刺史君嘗知江西寧州有治行女一適龍南  
簿沈思孫男一建北克邑庠生文學世其家女三  
長適禮部儒士來棟次許龍溪丞王君子有道一  
幼曾孫男一金鼎金殿女亦二是年 月 日曆



公大慈山之原刺史君以余曩舉於鄉附君驥尾  
金鼎又聘余女孫分誼良厚當爲公作銘銘曰物  
不在羸所貴能享陶然樂生適諧心賞冠服匪榮  
招提延想既壽且康令終高朗悠悠素風永遺企  
仰

陸靜泉墓志銘

余友高光州應冕爲其舅氏靜泉公作狀曰公姓  
陸氏諱深字淵之本陸績之裔十世祖金自汴徙  
浙遂爲仁和鉅姓世多聞人澤州刺史某清河縣  
令某陝西右叅政溥其通顯較著者也曾大父安

大父俊父欽母陳氏生三男子公行二少奇穎善  
記誦尤喜諸家方伎雜言稍長奪於治生又多疾  
受方外吐納之術疾瘳顧益壯卒不獲終業舉子  
然自足善應對無市井俚俗之言進退容止非禮  
不行與人交溫溫無忤至商確古今裁度利害往  
往出人意意外家世貨殖公臨財尤廉不說譎取羸  
家稍裕輒知足益簡約無盛麗態年六十召諸  
子曰余承先業幸以節儉力行不墜茲老矣寧能  
復爲兒曹作勞其折爾居均爾資各事事以給我  
餘年自是謝世紛專意方外傳攝生益謹是歲滿



八旬忽減眠食諸子憂之公唉曰死生命也命盡歸化往余謹自攝正以俟命爾徧與所親永訣沐浴更衣而逝始公出贅於陳陳又爲徐贅壻皆絕嗣公不忘二姓廟祀于家歲率三拜墓所六十餘年不衰鄉鄰緩急相投卽昏夜不以他故爲解遇橫逆輒免首下之里人以是多公縣令文階舉國家優老之典躬致冠帶以示榮異公謹謝之卒布素終身誠非其好也生成化已亥六月四日卒嘉靖戊午七月三十日子三楷檉楫女配指揮僉事沈希渭郡守空泉公子孫男六科稷穰科穩穆

女八長適張楫次庠生朱建北次王長春次許一凌登名次周濂次崔羽蛟皆名家子餘幼曾孫男一乘龍女三楷等以年 月 日葬公法空一埠新阡公躬自卜築云余竊謂光州論篤君子所稱宜不誣不驕不奢守玄去智以完天年所謂脩道養壽非邪道家之用主於無爲故能清靜自正壽考無疆聞公勤慎不息應接周詳終不以衰慕缺望於人豈其方外之傳非夫老氏之肯庶幾哉知雄守雌深藏若虛者與易筭數語知命達天異於徇物憑生者已是用作銘銘曰利以義將死與生



忘甘心布素不辱冠裳天錫遐祉既裕且康手築斯丘樂哉永藏

顧玩川墓志銘

余往歲與今博興令介亭顧君同爲諸生從博士受易相友善迺翁玩川公又嘗與余先大夫游雅知顧氏今年玩川公以壽終介亭君還自博興持惠州君所爲狀乞銘葬公誼不得辭按狀公諱瀾字道卿自號玩川上世出洛陽扈宋蹕南來家焉其後遂爲仁和人五世祖節明經起家仕元爲翰林編脩有文名節生傑傑生臣臣生義義生鑑鑑

配金氏生公性固質直亦醞藉暢朗抗俗奢靡奢故易傾公獨不務奢靡歲時伏臘男女婚姻並視禮制豐嗇先世有遺貲田廬兢兢守之居常稍自給卽不過爲經營優游徜徉澹如也喜談世故疊疊劇說間作詼諧使人傾耳解頤卒歸雅正與人交款款各盡其意或杯酒殷勤雅歌投壺視塵世事若無介於胷臆迺所與亦人人樂就卽處踈忘其分處少忘其年尤喜揚人之美能匿人之過故里閭識不識咸樂公長厚稱爲善士終身無怨惡於人公有同母弟二皆蚤歿公痛悼無已厚恤其



孤生男子亦二量才授業伯宜賈令廢舉與時轉  
貨貨仲宜儒令業舉子竟能用其長各有成立介  
亭君既舉於鄉仕為博興令政先愷悌喜善矜不  
能於民亦鮮怨惡蓋公之隱施云晚以例授七品  
冠服以非志不綯後於交親生成化戊戌五月三  
日歿嘉靖丁巳五月六日享年八十配姚氏初有  
男子四人相楷皆先卒今存者二曰材曰楫楫卽  
介亭君女四景州知州施繼祖省祭官馮鵬姚鎰  
沈槐其壻也孫男六曰方立交京克豪交京皆口學  
官弟子女七徐立德陳素望蔣仁王體益陳甘八豆

皆孫壻一幼曾孫男一曰汝霖女三是年 月  
日葬錢塘東山街祖塋之次惠州君云我太史公  
家聲寔振起於玩川為義方克成令子於是子姓  
嚮風爭務儒業始彬彬稱盛因思公優游無營豈  
所謂急先務哉已通達世故故混跡閭閻若和同  
然所舍畜輝光以貽後嗣意念深矣惠州君公姪  
孫言舉進士荐歷郡守所稱不誣云銘曰無謂優  
游克振爾後亦若和同培積彌厚碩人之寬康以  
壽子孫繩繩繁且秀鬱鬱故阡悠以久我銘貞石  
同不朽



滑縣儒學教諭程君墓志銘

近齋程君者滑縣學諭也余嘗守大名滑爲屬邑君數謁郡治貌旣古朴著敝衣冠曳履緩步無足恭論事侃侃與商確古今必出已見卽有異同終不阿私所好余諒君質直署上考至事他上官無異狀時撫按監司多名公謂余非私亦署上考會三載黜陟余轉官西去不及行攝守事者卒以無禮惡之當路罷君官滑人士立后紀思王侍御璜重許可所爲文無諛詞蓋深惜云歸無何忽忽抱疾歿君自信誠過豈出處未達於命邪彼生死亦

命也君絕筆云乘風歸去來青天與白日則已洒然達化豈其不達於命邪君諱鑒字應物一字于民近齋其自號也先世由汴南渡世家仁和謝家塘數傳至彥亮轉徙城東忠清里彥亮生歷歷生震震奉例輸資授七品散官配柯氏以弘治庚戌六月三日生君自幼穎異解音律技藝十二喪父家漸落攻金養母輒先諸金工值數倍弃去爲商往來儲賤鬻貴與時低昂日就溫裕會當僿辦爲邑吏廷辱耻之嘆曰用貧求富農不如工工不如商迺遠耻不如儒也翻然業舉子時年已及壯人



以爲難君發憤誦習手一經作息不釋不踰年西  
蜀劉公五清董學政閱君卷竒之選克學宮弟子  
再試高等收廩餼文名藉甚自以取青紫等拾芥  
數射策至七不中迺循次應歲貢上春官謁選得  
獻縣訓導縣令每缺巡院輒檄君署縣事君首表  
翟烈婦之寃建河間獻王碑築商林堤吊死問疾  
士民感服事聞上官數與優勞五年遷滑縣教諭  
至則脩講堂立饌會建巖岩亭日與生徒遊息其  
中又榜節壽堂嘉獎孝子新白雲屋表揚先賢脩  
畫舫齋編滑臺志士民感服如獻事聞上官又數

與優勞督學使者旣雅知君能文令得與弟子員  
射策京闈又數不中以君才藝取科第真等拾芥  
然竟不一遇真命也夫君生平不習容止無城府  
信而有謀雅有口辯能解息紛爭人人樂與游事  
母孝處弟友馭僮僕有恩教人先德行敏而好學  
垂老彌篤所著有屑談八卷遇品錄四卷易經擬  
議四卷藏于家歿嘉靖丙辰二月五日春秋六十  
有七配李氏生子男淞仍業舉子女二長適同邑  
唐夔次餘杭蔣耀孫男三作梅作楫作棟余憶往  
歲經獻君伺余傳舍曰安得出君屬下少舒意氣



已而果然逮聲稱旣起幾望轉遷益舒展意氣不  
知噉者已陰乘其釁向令卑庇而前熾趨而言屈  
已苟容遇正士不好苛禮亦且心非面訾之同見  
斥耳孰與委蛇順適信其辯智以直節終身哉宜  
無憾已 年 月 日葬君 山之陽銘曰  
振蠱耻貧明經耻賤容與儒林其塞不變斯事在  
勉強沒齒無倦者也彼科第終遺功名不遠植節  
守義逢彼險陷則命途之困也又何怨哉又何怨  
哉

勅封孺人張氏墓志銘

嗟夫余於張孺人之亡重嘆夫阨窮憂鬱之難堪  
在天道固不可測云孺人錢塘人政和縣簿能之  
子南昌府通判野亭馬翁之配翁諱宗俊仁和人  
父光澤教諭諱廷玉始二姓聯姻以同宦閩中翁  
與孺人生不家食已而翁游郡庠孺人來歸無幾  
何翁以明經登高科就教祁門擢來安令孺人每  
相從官中怡然適也迨遷南昌翁母老子喪從此  
弃去蓋四十餘年始就里閨所值固已不慊然猶  
守故田廬謂能窮約終老已而家人不戒故廬燬  
則舍田結廬甫成海寇至萬戶煨燼所結廬又不



免於是孑然無朝夕計翁猶善自遣迺孺人女也  
性本嗇既不堪目前又追惟往昔坐而嘆仰而思  
潛然以泣問之顧大喙異常傷心甚矣數月而病  
病數月卒悲夫使孺人終身寧謐之地安享有家  
之樂豈遽至是翁誠達士至是欲無少介於中難  
矣悲夫悲夫歿之次年 月 日卜葬棲霞嶺之  
新阡翁命之銘意內行不外見惟兒女輩能悉也  
志曰孺人諱某父政和公治行節廉別於流俗母  
方氏以弘治癸丑二月十六日生其稱孺人以翁  
為縣令任滿奏最得封生平寡言語摶內聲不外

聞無故足不及摶外即出見內親唯諾之外無他  
語亦鮮笑容深居唯女紅是事刺繡精巧人人自  
以不及翁甘布素孺人亦布素數浣數補綴晨昏  
針線不離指馬固著姓在仁和無繁支翁同行四  
五人歿皆無後翁又中歲喪子一姓累傳將斬然  
絕祀可為寒心孺人迺亟為置妾不孕輒易之又  
擇海昌遠宗子立為子後授以遺書今已為儒生  
克承世業所易妾果孕子人謂翁德厚宜然寔孺  
人容畜贊翼所成云撫群下嚴而有恩歿之日無  
少長咸歎歔流涕誠有所以感之是為嘉靖戊午



正月二十有一歷春秋六十有六所生子女二長  
歸某以嘗在郎署 封安人次適沈董鴻臚寺司  
賓署丞男曰行健次男曰行陸健早夭遺孫女一  
適儒生程淞所立嗣孫曰亦龍曾孫曰紹源某竊  
悲孺人於馬氏繼絕之功良偉不食其報而重以  
憂鬱亡也蒼蒼豈有意乎銘曰人亦有言入門見  
妬豈不而妬嗟嗟衰祚既孕而孽亦繼而絕如綫  
如飀以延世業已貴不驕甘與素守廉吏之子廉  
吏之偶胡畀窮疚蒼蒼不謬棲霞迴秀振振爾後

鄭母吳氏墓志銘

歲丁未二月七日鄭母吳氏卒先是鄭母疾篤其  
子布請禱曰吾自幼迄今備歷艱辛寒燠初不謂  
禱祠神佛可免疾苦矧脩短有命吾老且耄寧復  
求不死邪乃勸之進樂曰吾亦素不習藥餌竟不  
嘗已而出其自製歛具次第言治喪之儀一如禮  
蓋迨死不亂云嗚呼世人諂瀆鬼神徼福澤採煉  
服食希長生賢知者所不能免死者人之大閑也  
若鄭母者雖達人何以加諸吳本吾杭士族父某  
從父瓚舉進士爲州刺史起家母楊氏寔生鄭母  
年二十八歸于鄭鄭處士孟紳先娶於王天無出



以吳繼焉處士出自南京太常少卿環始太常歿於官囊無遺貲而家被燬時處士方貨殖江湖間災且亟鄭母地奉其先世木主以避不恤其他里人以是莫不賢知鄭母旣而相處士克勤內政擁全旣盡之緒乃堂乃構繩繩而栗栗焉誨二子習舉子常曰爾儒家子也母令先業自爾輩斬遇夜讀爲事女工相其急宵分不輟於是二子苦心勵行咸補學官弟子卓有文譽處士家世禮誼凡事先睦族及昏喪宴會諸事事大略遵倣古制不襲世俗鄙瑣鄭母實周旋其中俾疏戚豐約一當於

法處士旣歿其長子又歿凡歷憂苦惵惵終鄭母之身其先世遺風不衰余於鄭同里習聞鄉人言如此子布復謂余曰母素稟剛方不苟笑語遇下嚴而不厲稔不理於紛華不惑於施捨無遊惰積怒故終身無隱疾則其平生始有君子之行宜臨絕不可亂也詎生天順甲申十月二十三日享年八十有四處士以嘉靖辛卯卒先母十有六年其行在司馬卽吳君所爲志中子男二曰存曰布存亦先卒孫男四曰蒙亨謙亨存出復亨震亨孫女二長許傅某次幼俱布出布等將以是年 月



日合葬于處士墓墓在石壁山原祖塋之次銘曰  
終始天其運乎修短命其殊乎曷斷其真而任其  
愚疇女質而行儒達哉令終素心靡渝石壁高原  
君子是俱於其永安以娛

廣東雷州府知府箕泉王公墓志銘

雷郡太守箕泉王公諱子卿字元案上世籍錢塘  
後更仁和今爲仁和人由邑博士弟子員以通毛  
詩舉于鄉卒業成均授靈璧令擢南京大理評事  
進右寺正值母喪還起補大理左寺正尋出知雷  
州居歲餘勞瘁疾劇解官歸歸四月卒夙賦清令

爲文雋永精思髣髴年卽名聲籍甚與余爲金石交  
當是時余弟中丞濂許方伯應元童憲使漢臣方  
郡守九叙高光州應冕朱寧州孫炎咸號才子奇  
特振奮浮英華湛道德同爲諸生相交善已皆仕  
有祿秩公凡五上春官喟然曰丈夫表見當世豈  
必盡出甲科哉遂試吏靈璧境故多豪右宿猾爲  
鈎稽剔劓義厲而仁柔之令行化洽卽專意拊綏  
又被飾文墨隣境寇猝至邑素無兵人情洶洶公  
募士馳騎往來蹂躪城下飛塵蔽野賊望見疑備  
嚴引去因襲擊賊賊潰事聞拜帑金之賜部使



者廉其實數上章列公治行卓異宜召拜清華於  
是有廷評之擢舊都事簡公暇偕同志尋幽吊古  
篇什日富在雷首却供億之費期以節儉導民黠  
寇羅漢鄉吳平剽掠海上公旣繕城郭嚴保甲捕  
得賊嚮導寘之法民以無恐乃間招吳使圖羅自  
贖羅果成擒寘陰剪吳翼將併雍州無難也功未  
就而寢疾彼其意志所注概可想見郡民今爲建  
祠奉嘗非夫保民捍患之功有當於人心哉公天  
性孝友事父槐庄公至刲股療疾供奉後母不異  
所自出每推羸周急甚者依之居食歲久不厭尤

善交人嘉善矜不能所與遊遠近厚薄莫不意滿  
摘詞染翰秀麗可傳所著秣陵稿鼓檝浪言山中  
集旅寄冗談棘臺雜咏已梓行在篋者尚不止是  
公生正德庚午六月二十日歿隆慶丁卯三月十  
八日春秋五十有八槐庄公諱浩贈文林郎大理  
寺評事母羅氏繼蔣氏贈封皆太孺人並以公貴  
祖輔曾祖惠高祖橋皆隱德弗耀豁達慷慨振家  
聲啓儒術實自槐庄始云配沈氏封孺人生子男  
三長紹科太學生蚤天次紹名邑學生次紹賢女  
二長適鄭斯麟次張杞皆邑學生孫男二錫胤錫



詐孺人先公十年卒繼亦沈氏將以 年 月  
日葬赤山埠之新阡憲副臯亭姚公以公仲子為  
子壻狀行甚詳余憶附公驥尾締交三十餘年無  
纖介抵牾往歲待次銓曹公方下第就選人有招  
公謁政府當得美除予聞亟勸止之公毅然曰何  
往非自效地敢徇時局妄希冀乎竟得令邑後余  
役西鄙橫被口語公時在棘寺孜孜為余述平生  
辨詆挫不啻身躓而自解也嗟乎世情言逆耳不  
相入懷忌嫉相機陷往往而是公篤信不惑白首  
不渝所謂金石之交非耶昔蘇文忠哭文與可謂

不疾不除不可得而親踈文雅縕藉公奚忝於斯  
言媿無文忠之詞表公貞珉然奚忍以蕪拙解也  
為之銘曰溫溫儒宗力不勝折衝何南金之純而  
利干將之鋒綴文馮馮耻行不逮躬何屬詞之麗  
而執德之弘開芳懋實敬事膚功怙恃情深金蘭  
永終河陽頌岳渤海思龔輞川風雅逸少精工媿  
美兼資垂世何窮豈直一節之士一藝之雄已耶  
參將明溪周君暨配謝氏合葬墓誌銘

余蚤歲與兄風山光祿弟子清中丞同受經鄉塾  
一時皆英特士而參將明溪在焉已各駸駸貴顯



明溪獨偃蹇不偶 世廟庚戌後四方稱兵加意武備往往起閭閻韋布之雉立致將帥於是明溪走都下當是時同宗容齋京已仕爲錦衣都指揮使因隸籍登武科尋以騎射鞞畧舉會試第一名動京師例授錦衣副千戶未幾進指揮僉事守備贛州以功能再進都指揮僉書吾浙專困東省拜鹽城叅將再奉 璽書移守嶺西高肇等處不數載累官三品不啻貴顯崇盛矣豈非遇時而命也哉何前嗇後豐也迨余督兩廣諸軍明溪爲裨帥一見輒稱病余察知病狀方圖請易會有被逮之

報覈之頗不得實心跡旣白而明溪卒抱憂憤以歿悲夫功而得過信廼見疑古今聖賢豪傑所不免獨一明溪哉明溪姓周氏名整字嶸伯世仁和人曾祖全祖信父傑母毛氏正德乙丑七月三日生賦質清粹通朱氏周易義善詩文作真草書道勁有法性孝友事兄平溪巒終始無間爲將多機警馭下恩威並用孚心士卒故屢有平定功在贛日威行諸山寇不入境浙中酌議屯政切中時宜鹽城弭盜防倭保障允賴嶺西平尖嘴等巢搗黠酋全仕侈等寨著績殊偉紀功者聞于 朝兩有



白金文綺之 賜督撫巡臺廉其才咸薦獎之若  
御史大夫南珉王公司空鎮山朱公司馬自湖吳  
公推引尤亟陽春之役余猶勉以力疾終事而疾  
劇見不可強不知者方以避難引疾疑之彼叙功  
受賞彰明較著如此顧云罪浮於功會不知中於  
嗛者之口欲以服將士之心作遠臣之氣豈不難  
哉元配謝氏詩人可山惠之女婉慧貞靜主中饋  
旁及書算技藝靡不通解始可山本奇其女一見  
明溪輒又奇之竟以女托焉處窮約以勤儉濟其  
無遇拂抑以命數寬其憂當遠遊以振奮鼓其氣

迨利達以患害惕其衷至於謹祀事端困儀相夫  
子匡不逮馭臧獲均慈惠教胤子用義方凡此可  
謂克全婦道矣嘉靖丙寅十一月十四日卒於家  
距生正德庚午春秋五十有七隆慶己巳十一月  
十八日明溪卒南雄道中春秋六十有五嗚呼明  
溪挾儒術以待聘卒不售而以武功顯誠命矣其  
不遂首丘之願與淑人敦篤懿範而皆不享壽祺  
孰非命運夫定豈必憂怨能傷人哉子男沂隨征  
有功劄授冠帶武生女適順昌唐令子佐孫男某  
女二沂聞訃奔粵奉旅視來還併舉淑人樞合窆



焉因風山兄來乞銘且跽而泣曰遵遺命也余不忍辭爲之銘曰困維心亨豈不偶不知其人視其友錦組輝煌絢當晝蕩滌氛稜勲伐茂煩言爍金內何疚我生不有命途邁武功旣寃文亦售婉懿同封世相守巖壑迴環洵明秀堅貞不磨銘不謬

大理左評事少渠張公墓誌銘

大理左評事少渠張公以隆慶己巳秋七月二日卒里第其明年冬十二月嗣子嘉穀子壻徐嘉成奉沈孺人之命將卜葬西山之陽乃持五橋徐公所爲狀詣余徵銘余拙且病辭至再終以同榜故

不容已廼按狀爲志曰公諱鳴鶴字九臯先世由汴徙浙隸籍錢塘高祖信當我明太宗朝以明經起家歷吏部考功郎中曾祖璘以子貴贈刑部員外郎祖銓由進士歷廣西布政司左叅議父一源通陰陽五行家言例授徵仕郎娶陸刺史女生五丈夫子公季子也賦質穎異不類群兒授之書卽成誦屬對句語意諧徵仕公謂能繼家聲乃收先世遺書悉畀之未幾失怙家益貧蓋累世雖宦達皆不黷利治生無以貽其後故至是窘迫無聊昆仲稍稍去爲商販自給公獨枕籍簡冊間誓死



不渝當是時楊水部南泉亦貧士妻公女弟共治  
易相與砥礪游揚齊名里中先後補邑庠弟子員  
小試輒高等廩食甲午歲公舉于鄉南泉亦應貢  
舉京兆一時爭羨此兩人同志善相成也數上春  
官不弟至癸丑廼喟然嘆曰丈夫樹立勳名豈必  
自科甲出哉吾兩人文不相下而彼信我誦命也  
於時謁選銓部授定遠令邑東接廬江連楚粵北  
走徐方達京畿當通道盜賊充斥豪右梗化公宰  
制有術令行禁止四境乂安值倭寇犯淮甸將窺  
豪郡守以邑城堅且有才令悉載貯積歸邑公密

藏之陽取所盛器實他物遣還示不納狀賊兩相  
疑懼去郡邑俱賴保全居三歲餘諸臺多獎薦乃  
有廷平之擢旣去攝邑者故嘗有釁惡之當路得  
調外令曹在曹政行不異定遠郡丞某方恣橫他  
屬咸順承不給公獨與之抗故為裁抑某深啣之  
又惡之上官竟罷歸已而某卽攝曹多方媒孽不  
得漫坐私取贖金移檄逮問公往自白實無私取  
事明某亦罷去卒以是橫被口語甚者謂嘗侵河  
渠公帑同宗一二輩不察事理亦呶呶相侵公雖  
置不辨終鬱悒不樂抱病數月歿生平高自許手



儀整飭見人冠不正衣不潔若將浼焉持論率出  
已見不面從後言以此寡諧喜吟咏晚歲與鄉大  
夫結社倡酬研求彌工親族緩急相投輒為蠲資  
殫力不恡知厚以此多之距生正德丁卯閏正月  
二十三日春秋六十有三配卽沈孺人子一卽嘉  
穀本弟鳴鷲次子以倫序相承女二一贅嘉成卽  
五橋徐大叅子五橋亦同舉于鄉雅相厚善一幼  
未聘於乎委蛇諛悅巧慧獵榮紛紛欺世之術何  
可勝道顧直任其性甘犯訛怒不顧豈所謂經德  
不回抑質稟所近多剛毅寡柔克耶卽其宦跡行

事亦旣快壯心起衰祚矣余獨悼少渠才有餘而  
惜其用未盡也銘曰孰阿儻兮巧媚獨強力而任  
質務賤人兮貴已祗峭峻以自適豈拂世兮摩俗  
甘俞訛其何恤紛坎窞兮躓予懸輪轆而不飾嗣  
猶予兮靡獨振清聲乎雅什斧林壑兮穹封賁斯  
文于玄室

光州知州高穎湖墓誌銘

詩自三百篇後歷漢魏六朝至於盛唐而體備詩  
之變極矣下迨宋元寢至卑薄我明承平以來  
學士大夫力追古雅彬彬治世之音自朝廷達



於里巷莫不稱盛吾郡固多作者以余所及見吳  
藩叅江翰林楊僉憲許水部及其弟比部童侍御  
方郡伯皆以詩鳴者也與余厚善又有王郡守高  
光州王以吏事顯余爲作志以治行掩其詩光州  
之亡也余誼亦當銘其墓序之曰高光州者諱應  
冕字文忠自號穎湖其先由汴徙浙居山陰轉徙  
仁和始榮生德芳德芳生諒諒生鎧鎧生來以明  
習毛詩應貢爲邵武訓導配陸氏生穎湖幼承家  
學爲諸生有才名方弱冠便喜吟咏郡博士建業  
趙先生聚諸生善古文詞者時與登臨賦詩皆英

雋士而穎湖在選中甲午舉于鄉三上春官不遇  
試吏綏寧節冗費禁豪猾嚴捕緝興文教以能稱  
秩滿進刺光州爲政不異綏寧時惟捕緝得劇盜  
與文獲名士尤爲稱快大都以寬平得民亦以是  
爲刻核者所短歲當大計上官多不協迺解綬歸  
放情湖山結廬傍林處士故墟榜曰白雲山房讀  
書其中興至豪飲長吟研詞斲句力追古雅一以  
盛唐諸名家爲矩矱晚益博浹喜老莊之言道德  
詩亦歸於性情著爲論叙鬯朗超脫類若寓言生  
平蕭散冲和與悒惋不平之氣感時觸物對景懷



人一屬意於吮毫舒簡沉思高咏間其言曰文以  
宣情言以足志詩人篇什爲情造詞詞人賦頌爲  
文造情情興本乎性真非點綴模寫可擬有味哉  
今其所著詩文具在比於所稱說同耶異耶是所  
謂治世之音非耶方公歸自光州人謂公宦囊不  
貲迨歿殮具猶不能辦將葬輒售所構山房殆本  
無高訾好事者故以相嘲抑踈於治生費侈而易  
耗如此公事母孝處昆弟友與人交和厚易親樂  
施與不責人報噐宇清粹如其詩誦其詩想見其  
人庶幾哉風塵之外曠達之高致與朱寧州爲作

狀曰公疾革無他語惟以詩文爲囑則其精神意  
氣終不奪於世好余是以略其庸言與行而詳論  
其詩歿隆慶己巳八月二十八日生弘治癸亥三  
月十一日不滿七十者僅三歲子男五長淞國子  
生次江縣學生次瀛濱漢女三王夢鰲張櫛其婿  
也一幼孫女六長適沈志餘皆幼辛未 月

日葬 山之陽銘曰溫柔敦厚歸本性情超  
矣光州藝苑崢嶸簪綬匪榮橐裝易敝枕藉百家  
沉吟五字耻彼事事去智遠紛于于百年青山白  
雲



封兵部武庫司主事東洲錢公墓志銘

往余聞錢君卓菴之賢於縉紳間蓋讞刑獄秉威  
明列本兵贊廟勝主營作務均節三試爲郎輒以  
能稱有兼人之長焉及數晤語逡巡如不能勝豈  
與夫積資養譽淹延歲月馳逐聲華矜夸自好者  
同日語哉頃余還自粵錢君以父喪歸間繚絰詣  
余乞銘其封君之墓余旣雅知君逝所由來宜有  
樹德肇基預開其先者及閱狀有足徵焉乃爲志  
曰錢公銳者字進之別號東洲世居海昌後徙會  
城遂爲仁和人高祖得中中生震震生毓毓生文

文配丁氏生公少稟聰慧讀書解大義至聞孝友  
大節即欣欣思欲睹其人履其事如恐不及故事  
父備極孝敬每食必以甘膳尤習察所嗜時時進  
之務得歡心仲弟白首同居飲食起處不離女兄  
無依迎養于家撫所生若已出族人困征輸數捐  
貲周給雖廢已業不悵元配余安人歿後公年未  
衰以有子且不忍忘余竟不復娶性本質直不依  
阿徇人非其義不苟取與鄰人夜盜金心知素所  
識不忍發覺弱者負其貲每不責償彊者施橫逆  
亦忍不較其篤人倫審義利明禮讓類如此彼其



家庭訓迪是效是則所爲陶成嗣人者豈不然哉  
武庫君旣成進士守尚書郎值隆慶改元 覃恩  
中外於是公名秩冠服得如其子 龍章褒嘉燁  
然榮矣乃悉召昆弟親舊爲具相娛樂或徜徉山  
水間愈益謹畏婺源李令所稱善人長者其有所  
試也夫余謂凡爲人父孰不欲其子之才且賢然  
卒不能必其然也自仄其表奚影之直從其好不  
率其教人情自昔然已東洲公不必其子之才且  
賢而竟以才賢顯躬行克肖謂不足爲人士準繩  
也與哉生成化丁未八月一日歿隆慶己巳六月

十日享年八十有三子男三長本次立即武庫君  
次在女四婿曰陳用誠胡文顯沈智陳瓏孫男八  
養廉養高養元養克養亨養正養蒙養度女三二  
許蔣志學聘餘幼是年 月 日將舉公柩啓余  
安人之壙合窆焉銘曰敬典在德曰惟孝恭孚于  
里開洵直以容訓于庭除明允撫冲蜚聲 帝聰  
綸綽顯崇勒岷玄宮億載穹封鬱鬱蔥蔥佳山水  
中

胡貢士夫婦合葬墓誌銘

士君子好學誠難非徒好之貴志不專則業不精



道不成則名不立奚取于士余昔受經爲諸生時  
同業固多雋才然小成自畫不成中弃比比而是  
余於道竟無聞惟孳孳砥礪未嘗頃刻忘屈指吾  
鄉好學之士若龍岡胡君世所罕見也君諱萬言  
字子書自號龍岡君之父曰昆母曰許昆之父曰  
淵淵之父曰效本臨江人效始遷杭故今爲仁和  
人效之父曰廣在宋曰忠簡公銓直節嘉猷事高  
宗爲名臣君其後世子孫也夙賦清粹十歲餘通  
周易四子弱冠克郡博弟子員才名藉藉徐尚寶  
六橋公自以文學雄視一時見所爲文異之曰是

當以文鳴世以女妻之因從公宦遊得泛覽經史  
及先秦兩漢以下諸家言益深沉精確諸生推讓  
人人自以不及督學使校文諸生每褒然首出顧  
大比輒不錄荏苒廩餼凡三十年而老將至矣隆  
慶己巳受知東粵林公石洲公尤雄於文者兩試  
咸稱賞不置於是超二三輩以應貢起舟行猶自  
課其文晝夜誦習不輟庶幾一售京闈卽不售亦  
例得列職儒林少舒積累之蘊命途終蹇卒於清  
源悲夫余嘗遣二三子受經於君君與二三子談  
經亶亶不倦探抉奧眇貫穿傳註類非淺見寡聞



雷同剽說可同日語其違時亦以研窮過反類刻  
深彼淺鮮經術立致青紫者何限設科以網羅明  
經獨遺好學深造之士信出處有命匪安命何以  
稱君子哉君天性孝友事父母雖清約必極鮮腆  
遇歲時張筵歌舞以娛親心歿則哀毀如禮處女  
兄少弟曲全敬愛鄉人服其有容徐氏既奉父母  
歸君盡去貴盛靡麗之習以布素服勤中饋舅姑  
姻族舉稱其賢居常與君交游飲食者亦莫不知  
其賢也先君二十餘年卒君生正德己巳三月十  
五日卒隆慶庚午四月十五日春秋六十有二徐

氏生正德丁卯四月初六日卒嘉靖乙巳五月十  
一日春秋三十有九子男六雍徐出賈竒亮奕燮  
繼娶周出女二長適太學生褚效忠一幼孫男元  
亨元吉元善女二俱雍出雍等以是年十二月初  
九日葬君於仙芝嶺之原與徐合乃持褚郡丞元  
泉所狀行乞銘余竊悲夫好學不倦道藝既成終  
乏一命之榮使進脩之士恨命途之阨也銘曰謂  
生匪天其孰畀之賢生之有意胡靳於一遇行藝  
脩明無忝爾所生仙芝峇芳元配與同域依依樂  
丘世世延餘休



居處士西隱暨朱氏合葬墓誌銘

居氏之先本中州人上世仕宋以提舉扈從南來  
樂海昌地僻而饒廼拓居焉我明高皇帝時諱  
可簡者以經明推上拜尚書水部郎可簡生渤海  
渤海生敬敬生章世多隱德章配呂是生處士賢  
字惟德性孝友痛母早世不逮養事繼母沈以孝  
聞伯兄嫂氏相繼歿獨襄其事又爲婚嫁子女不  
不異已出未幾爲人構陷誣訟數載雖終以孚信  
得白家業頓衰乃出居西郭田廬中躬耕隴畝自  
食其力因號西隱泰然若無求於世者時時課諸

子誦習孔子孟竟能成其子以經術顯今大名同知  
君乃仲子也君始射木甲科令弋陽再令貴溪公  
數以節廉和惠爲訓改君所至行公之意輒有賢  
聲公本直諒又恬澹自適不屑屑家人生產作業  
人負貲不責償有侵犯亦不較鄉人化之終更償  
且不犯年旣七十餘里推錯賓邑侯往往躬詣上  
謁公謝不敢當愈謙抑無異曩時或反過之人以  
是稱鞠躬長者戊辰秋大名君將之任公方寢疾  
欲留侍湯藥公曰吾疾旦夕已而委身公家柰何  
以私恩廢公義立命治裝行未踰月卒不起蓋是



歲十一月十九日也距生弘治壬子七月初三日  
壽七十有七配朱氏穎慧貞淑解書義習女紅事  
舅姑孝歲時蒸嘗親交燕會必務精潔而依於禮  
至自奉甘蔬食不厭愛諸子主於慈獨嚴義方馭  
臧獲主於嚴恩賄不恡歿後咸思慕不忘其即世  
以嘉靖辛亥正月初九日先公十有七年生弘治  
丙辰十月初一日年僅五十有六所生子男三長  
官次守即大名君次憲女一適楊喬孫男五志化  
志脩志偕志伸官出志伊憲出女七適沈應元王  
宰姜維藩者俱官出許聘濮應奎沈大勤密幼學

者俱守出許聘王與偕者憲出君等將以庚午十  
二月二十一日啓孺人之壙奉公合窆焉介余甥  
沈比部才叔來請銘余謂培植不厚枝葉不繁緒  
畜不深流行不遠豈直物理如然人道亦若是爾  
居之肇基於梁綿延於浙省即寢發而未光隱君  
含晦而滋茂旣深且厚大名君可大之業駸駸盛  
矣寧謂非公隱哉爲之銘曰匪深弗長匪善弗  
慶遡源眡流論世考祥勞勩在來 明興寢揚垂  
五百稷積闡彌章孝第力田貽爾熾昌



奚囊蟲餘卷之十五








吳懷壽餘卷之十六

墓志銘

崔淑人李氏墓志銘

李淑人者指揮同知龍橋崔君繼宗配故指揮僉  
 事竹軒琳仲女也李系出中都崔出太原其先皆  
 皇明開國功受封杭州前右二衛世襲茲土遂以  
 聯姻吾杭俗固侈世胄之族恃有祿養尤耽逸豫  
 往往恣為奢縱以是衛所多自相婚姻豈故遠別  
 於士民哉然余從弟子明實為龍橋壻龍橋飾武  
 以文恂恂士君子也故雅好吾弟儒素崔又少曾

吳懷壽餘  
 卷之十六





其舅氏李亦畧崔之迹而好其文是豈尋常狗俗之見已邪本諸二姓可以識淑人之賢矣按狀淑人諱瑛母蕭氏恭人以弘治乙卯六月廿有六日生年十九而歸於崔時崔翁樂間以謝病屏居歲久無以自給里宅久廢僦居民家徒四壁立淑人日黽勉中饋固不戚戚俄而樂間公卒凡棺槨衣衾諸歛具悉出簪珥易之龍橋藉是得終大故如禮既而龍橋襲今官淑人謂祿當萬戶侯宜不為薄何至以朝夕為慮迺節浮費量出入罄其奩資兼積俸餘分命家僮貲貸以牟什一又親為籍記

稽其盈縮竟以是獲稍温厚俾龍橋無內顧憂淑人兩舉女子生男子輒不育憮然語龍橋曰吾聞不孝以無後為大君今四十無子不以此時畜媵妾廣生育將忘滅祖宗汗馬勞耶為擇宜男者二人已而果生子時龍橋始始居增構堂室門第煥耀子女克閭淑人亦不色喜猶勤儉如窮約時值有子妾喪淑人嗚嗚泣數行下蓋傷咏咏失恃所愛念深矣三日而淑人亦歿是為嘉靖丁未九月八日年僅五十有三嗚呼葛覃膠木之風遠矣佚欲裕蠱姑悍離家殆不可一二數矧出世祿之



家自富趨貧轉貧為富終始不渝若淑人者能多  
見哉竹軒公義方之訓龍橋君刑于之德咸可徵  
云所出二女子一歸舉人張洵即吾從弟一歸武  
舉鎮撫陳善道庶出子男二延齡延德女一許配  
李萬秀歿後二載為嘉靖己酉 月 日葬于錢  
塘玉岑山之原銘曰豈曰無祿捐此金穀豈曰頽  
齡遜彼小星振爾族柒渠夏屋介爾福森森樹上  
食報未幾奪何速延爾百世思賢淑

長姊鍾室張氏墓志銘

吾長姊歸鍾君梁以壬寅歲遘疾卒時余為郎京

師不能撫棺盡哀悽然傷心久之已得鍾君書謂  
已筮地將歸藏焉宜有文以垂不朽願遂志之余  
既痛不能言卒不忍以余不文使吾姊壺德媿行  
無聞於後也為記憶作志曰姊諱某吾先世汴人  
扈宋蹕南遷居仁和家世累仁集義多聞人吾父  
封承德郎工部主事亭山公諱某配封安人李氏  
是生姊姊上有三兄皆蚤世姊生吾父母殊愛慎  
繼得諸弟妹慎逾于初姊能周悉調護解衣推食  
以體親心十歲餘即儼謚穎異宛如成人年十六  
而嫁鍾固鉅姓梁值少孤家業中衰吾姊以勤儉



相喻凡經營貨資工作餽廩為之籍其出入贏縮  
旦夕劑量心煩于慮而身親其勞乃鍾子亡內顧  
益修藝餉行卒幹先人之蠱云歲癸未生子炳丁  
亥生子燿吾姊皆口授書稍長遣就外傳俾習儒  
業嘗曰讀書明理修身匪直襲榮名銜鄉曲祇曰  
富貴利達云爾於是二子篤行力學卓立不群孝  
友尤深率母氏儀軌庶幾古人風焉巳亥吾母病  
疽劇姊憂懣亦疽發乳吾母奄逝姊傷痛疽日潰  
再踰歲竟以不起是為嘉靖廿又一年三月二十  
三日距生正德丙寅春秋三十有七吾姊生平寡

言笑性敏慧通小學論語諸女史善楷書尤精刺  
繡纂組一切女紅事姑祖姑極孝敬即嚴厲過責  
亦勉底豫卒以孝終嗚呼吾姊事親承歡相夫克  
裕愛子能誨德宜壽也竟以天邪往見炳燿侍吾  
姊疾籲天變食剗臂克飲歷久憔悴骨立吾謂孝  
感必應竟無益邪天道遠邇不可測吾姊獲報寧  
無期邪悲夫鍾君以歲癸卯十二月 日葬姊于  
里 山之陽銘曰秉懿永遐若淑罔不昌胡俾  
之殃貽厥嗣人開爾芳宜此玄室今有耿光

仲姊墓志銘



余先大夫有子九人其五女也所擇壻皆名族儒  
生往歲余為郎京師不二年三姊妹相繼夭歿所  
存仲姊少妹仲既蚤寡少又差貧傷哉同氣之感  
已昨秋余自西蜀再如京師寡姊又歿於家歸而  
哀之蓋悲吾姊竟以憂戚亡而重增今昔之痛也  
踰年李甥柱馳書閩中將以辛酉歲十二月一日  
附塋姊於李君之壙乞余為銘嗟乎余誠不忍銘  
恐令吾姊無聞邪姊張氏諱德良父工部主事亭  
山府君母封安人李氏嫁為太學生東壁李君妻  
東壁父曰槐軒公母顧氏初槐軒僅有子東壁愛

甚於勞東壁本倜儻不羈雅志高遠為郡得士弟  
子員厭苦約束輸貲入國學益廣交游侈聞見  
於是增構堂室多畜妾媵欲以高門戶蕃子嗣姊  
皆委曲承順不拂其意庚子姊既喪所生子東壁  
又客死濟上計至姊泣轉欲絕既而強起曰吾死  
無足惜獨不忍李氏百世之祀一朝絕也徧召族  
人咸謂兄昊有子宜嗣族固多欲為東壁後者姊  
排群議竟立昊子未幾夭復以昊子繼之即今李  
甥枉寔順序當禮故不可奪也姊愛若已出稍長  
教以儒業妻以余兄光祿公子兄固儒生姊以婦



似姑且兩世一姓肺腑之托滋重所為培植李氏  
計念深矣姊以三十而寡含荼飲血以緩湏臾死  
者徒以柱在庶幾成立而養不逮悲夫吾姊生慧  
婉先大夫愛逾諸男里有紐媪通小學孝經女史  
先大夫延之家以書授姊盡得其指卒用以自淑  
雖猝罹凶變百務總總如蠅終安定不亂忍死存  
孤以保世業天植純懿誠異亦教教漸潤有素也  
生正德庚午二月二十八日吉嘉靖庚申九月七日  
卒年五十有一東壁之喪先姊二十年所生男女  
五人多不育今惟二女子壻曰金佶邑庠生光祿

少卿廷瑞之孫曰朱民建昌丞壁之子孫男一  
銘曰內則是依外傳是資令德令儀于時于歸天  
不勅遺逢此百罹矢死靡渝繼絕持危爾宗百世  
繩繩自茲禮義詩書能忘爾貽

仲兄雙洲公墓志銘

余先君馴行孝謹口不言文章道德心切躬行身  
處富貴之中而樂朴素與閭里人游雖猥賤至忘  
爾汝閭里人共喜無驕氣親就亦忘其形又周人  
之急拯人之難舉貲於人徃徃折券棄責蓋坦然  
篤行君子也識者謂天道常與善人宜享上壽已



而不踰七十仲兄雙洲公號克肖子其積行累義  
恂恂浹洽動合先人遺槩人謂公即不上壽當與  
先人同筭無疑歲甲子終五十有五忽病疽不起  
嗟乎是天之報施善人非邪次年余還自京哭公  
靈下因憶公平生為志曰公諱某字子易別號雙  
洲世仁和人工部都水司主事亭山翁仲子也幼  
與余共學業舉子不相入去為商又不屑動銖兩  
計羸縮歸自念曰吾幸有先世餘貲稍自約當不  
乏朝夕何廼營營自苦效壘斷丈夫為於是躬耕  
居室內外整嚴有隙地即樹藝草木灌花洗竹以

為娛客至布碁局命尊俎雅歌投壺終日不倦或  
起興深酌舉觥高囀客非其任不力疆取自嚼之  
盡醉乃已二三十年之間極遊燕之樂恣湖山之  
觀偕昆朋之幻杼幽曠之襟絲竹之聲不乏于耳  
芬芳之色不絕于目甘鮮之味不靳於口移寒易  
暑不知老至名何必列儒林家何必多貨殖悠悠  
樂事亦已徧矣邑有無賴丁某介其黨求貸公輒  
舉百餘金與之去三年來還途遇公曰遠行良苦  
得利將三倍邪丁拂然去明日赴御史臺計富豪  
以高貲謀女為妾女美而良不願奉箕箒豪逼之



父子命不保矣時御史某好嚴刻往往以微事夷  
滅鉅姓亟檄郡收訊實無女也御史終不釋強郡  
勿理証執亦不償宿逋一時稱寬而公竟不求直  
客有為公致冠帶之檄者公感其意不直拒亦不  
服以示榮非所欲也公所友善傳給舍虛岩周侍  
御密菴高光州賴湖沈比部南泉王豐城冉山每  
每過之歡然不忍去從弟中丞濂寡僻於鄉雖宗  
黨亦鮮親昵兄獨與相敬愛皆樂其質行無偽簡  
易可親也公娶柱史吳萬松女生三子楷檉皆治  
周易為諸生揖倜儻克家諸子稍有過不譏讓第

慨然見面目更即願解如故於是請子之率益謹  
有凶孫某皆幼生正德庚午十一月六日歿嘉靖  
甲子八月六日余竊傷公之修身善行而食報未  
獲其常也悲夫楷等將以

年 月 日 葬公

山之陽余謹銘於墓石曰思昔先子不言躬行  
惟余仲氏克嗣令名耶彼壘斷快我生平樹藝適  
意抨天解醒貧交不厭遠士心傾由由與偕不失  
其貞枉不求直寡不務贏疇曰未竟視厥所生疇  
曰未揚問諸鄉評千秋萬祀奠此佳城

明處士彬齋李君墓志銘



余母贈淑人李出錢塘世家素積仁累義大父榮  
號存德存德翁凡二男三女淑人翁少女也長男  
龍溪禎次桐塢祥龍溪公配高氏是生彬齋應文  
字子質少穎敏與余張高二姓兄弟行若光州刺  
史應冕暨余輩同學為儒業漸知趨向矣值父喪  
家且中衰竟奪其志世遺坊里之役方弱冠委身  
任之令以為孺子解事不怠終不犯令怒已乃薄  
遊吳吳中樂其和易所交接多文墨士則又如梁  
楚入京師由金陵浮沅湘自以快賞心因之量緩  
急通有無年十一之利庶幾俯仰無累克復舊業

輒飄然歸更不復出時母氏春秋高桐塢公又無  
後獨處彬齋皆曲盡孝敬各得其歡相繼壽終殯  
葬如禮性好吟時時咏歌適意嘗曰詩本自然之  
聲亦有自然之節本乎性情隨感而發從心中律  
審其疾徐協於音調信指合拍其亟稱高光州贈  
遺諸篇謂雋逸有巧思效法中唐箴護不爽分毫  
余詩直率已見澹泊無色相詳味其旨若有妙悟  
凡得於性靈與其交游浸潤非必學力能然也夫  
里閭少年不得為儒生即恣睢閭利不知詩書理  
義為何物甚者淫蕩不檢類其家聲徃徃而是混



跡商賈之中雅有文藝之好彬齋信有足多者比其歿也子先春走使淮甸乞銘墓石余素知君且遺言命其子必托余言為重悲夫余言即不足為重忍負臨絕諄諄語哉距生正德甲戌十二月二十一日卒隆慶元年正月十三日年五十有四配顧氏子一即先春女三長適陳三綱次張治次葉懋林先春陳葉皆業儒孫男一景葵西湖佳山水處龍山鍾塢之陽銘曰仁里德裔夙諳道藝聲詩天畀慧心妙契遨遊事事幹蠱用譽孝親不渝敬長克弟斯焉取斯二姓相倚龍山佳氣潛臺是秘

延休世世

明文林郎廣西潯州府貴縣知縣半村夏公

墓志銘

公諱羨字宗羨先名某以避世廟諱入仕後乃改從字別號半村其先隴右人唐濟國公魯才始遷浙之慈谿歷五季宋元代有聞人入明若大理卿時正其顯著者也有千秋遷定海又五世為南京刑部郎中與誠始遷仁和生承事郎醇醇生翰林侍詔杞配賀孺人次金氏生公少俊偉敏慧垂髫習禮成章授詩總髮游郡庠補增廣生援例



入南雍獲友四方英彥屢試上等嘉靖戊子謁選  
天曹授貴州按察司經歷貴陽地雜苗夷風氣稍  
異中土公在司幕以能稱兼理有司之事如繕城  
池練兵馬運糧餉審軍後點營堡理刑獄皆地方  
重務委攝都勻值凱口烏撒土民相仇殺公躬歷  
其巢宣示 朝廷恩威咸感激聽撫按交章旌  
薦有才猷練達操履清真等語乃擢貴縣縣務久  
弛至則振刷修飭首先學校治故瀕江城郭湫隘  
學宮舊在郭外自內遷後又鮮科第公開拓舊址  
徙而新之士咸感奮自是科目彬彬有人龍山三

里徭獍向梗縣化公為建三老給以法服中諭禮  
制遠近歸心遇徵輸以羊單粟糧相從邑中既駭  
凡頌蓋前此未有也東橋顧司寇寄贈以詩有看  
取漢家循吏傳獨憐卓茂最知名之句任凡三年  
屢列薦牘會當考績有上官陰伺之遂憐然歸次  
東津驛賦詩云雨霽東津日未晡洗添新綠岸頭  
蘆而今歸買西湖棹不向潯江聽鷓鴣歸田後詩  
酒自娛構小圃藝蔬種樹掩映書屋自題曰習懶  
歸彭澤遺安卧鹿門親友相過談棊論詩出所藏  
圖書把玩任客去留皆樂其率真卒無忤也善吟



咏垂老不廢兼及繪事亦如其詩有半村稿藏於  
家先是濟國墓在慈谿夏魯歲久漸廢公歛戲憤  
嘆控訴於官勞瘁十年盡復舊業乃已嘗誨諸子  
曰吾家自比部占籍仁和已而廷尉內翰雞澤孝  
感英山後先相望吾獨不能繼述汝等其勉紹家  
聲今予若孫果奮志有聞嗚呼公可謂克承世業  
貽謀允臧矣距生弘治癸丑三月十九日卒隆慶  
丁卯七月二十八日享年七十有五配鄭孺人生  
子男三長垠次塤次培皆業儒女一適大理卿東  
瀛陳公孫文灝孫男九鏗鏘鈞鏞鉅鈇女十陳

香陳重光虞九經其壻也餘與曾孫女二俱幼垠  
等卜以次年 月 日祔葬於八都三峯山之陽  
從先兆也銘曰植本厚其末茂勳伐售視厥後於  
赫濟國開先良舊衍及仁明文林應宿通矣膚功  
塞焉解綬貽厥未完其胤孔秀信無德弗訓哉

明杭州前衛中所正千戶蘇泉陳君墓志銘  
嗚呼是蘇泉陳君墓也往余別君吳山里第時方  
病風差瘥猶談笑引滿眷眷與決別未踰年君竟  
以是不起悲夫君有投筆請纓之志今已矣時四  
方多事 聖皇柎駢思將師之臣以君才智假令



乘時見志圖功閫外所就顧可量邪。慙夫按狀君諱官懋字子政麓泉其自號也。先世居德安七世祖端賢由元進士倅括蒼因家剡。端賢生隆九以功授紹興路總管生紹興守禦使勝明興奪勝官編籍杭州前衛遂徙居錢塘。傳至奉政公昱以子東瀛公珂貴贈刑部郎中東瀛公起家進士歷官右副都御史進大理寺卿娶淑人王氏以弘治己未八月八日生君自幼英敏倜儻有大志涉獵經史不屑屑章句尤好左氏春秋及孫武子兵法弱冠隨東瀛公任閩中值盜起大帽山郡縣不能制

君乃請從擊賊賊平上功幕府授本衛中所正千戶未幾胡賊湯毛九等匿安吉山中四出劫掠時大方伯何公天衢廉君才檄君專捕緝賊果就擒功聞得拜金幣之賜已而東瀛公解組歸君亦棄官屏居時諸弟咸幼君獨綜理家政一切事事皆身親其勞不以煩於親慮以是東瀛公得無內顧優游林壑永終天年寔君孝養以娛悅其志也。迨東瀛公歿王淑人亦歿君喟然嘆曰余昔有狗馬之心冀効尺寸時平莫展其伎將圖所以自適繼先人之志惟吾子若孫耳。迺築室西湖之曲題



曰漁隱約二三知舊定為社會觴咏為歡又時訓  
課諸子俾興於學今其子若孫果皆明經績文補  
學官弟子咸彬彬知奮云君生平和易易親惇睦  
宗族周卹貧乏謹祭享樂朋好處富貴善自謙抑  
士大夫咸以是多君樂與之交然直諒不詭不妄  
悅人疾惡幾甚故群小不無少訾君亦終率其性  
弗恤也嗚呼君簪纓世家所居易溺乃一念圖惟  
樹立不忘報國承家雖數奇不遇然猶出具十  
一明試功能再受封賚非泯沒無聞矣世乃有  
游間公子藉世祿之資紈綺膏粱多然驕其里閭

而審其智慮曾不能辨菽麥視麓泉君何如哉君  
歿嘉靖庚戌九月三十日春秋五十有二娶張宜  
人生子男四長文瀚次文灝次文藻孫男五長椿餘  
尚幼濟藻椿皆生員濟先君卒女一適余子櫟孫  
女亦五一許白戶侯子某餘亦幼歿後二年為壬  
子歲月日文瀚等將奉君柩塋南山楓篁嶺  
之原從祖兆也銘曰南山有虎其變為豹文豈不  
耀武功是効既懋厥功亦繩厥宗高蹈令終頽靡  
以風隰有修篁原有青楓維子之宮垂蔭無窮

明贈徵仕郎中書舍人玉泉林公暨配贈太



孺人張氏合葬墓表

贈中書舍人玉泉林公諱奇字子俊世為錢塘人  
高祖贈通議大夫太常寺卿仲英英生才生秀  
秀生靜得處上巒巒有儒行宮保尚書胡端敏公  
剛正寡交獨與厚善娶施氏生公與異母兄宏爭  
相淬礪補邑博七弟子員飭躬善行懋學績文聲  
藉藉起質本清癯重以勞瘁傷心嘔血忽忽而歿  
性曠達不事家人生產作業舉貲於人負者多不  
較事親孝處昆弟友與人和易可親鄉人無遠近  
少長咸敬而愛之卒嘉靖丁酉年僅三十二配余姊

贈奉直大夫吏部員外郎應禎長女奉直公雅愛  
之擇所歸適王泉身出世家嫁為世家婦絕無驕  
恭事舅姑相夫子克慎於禮玉泉夭亡時遺孤僅  
四歲孺人抱而泣曰吾當從夫地下徒以呱呱兒  
緩死也自是不復近金珠羅綺蔬食布衣以儉嗇  
保其田廬尤珍藏遺書孤梓稍解事手舉授之誨  
以無忘先志方幾望有成而不克待矣卒嘉靖戊  
申年四十四詳見余弟中丞濂所為志中後七年  
乙卯梓果舉於鄉又七年成進士授中書舍人奉  
使南還傷其親之不及見矧二本猶在淺土爰卜



地西谿之鍾山始遷葬成禮焉又三年梓以秩滿  
例得 贈父如其官毋曰孺人制詞褒嘉闡揚潛  
德允慰孝思矣則又乞余文勒石墓上表諸人人  
余以天道難測有時而易人事不足恃亦不盡然  
方自得誣於時齋其志以畀二子視青紫功名不  
啻執契券索負然彼以世積徵諸天力學驗諸人  
也竟之一命之榮及梓幼失怙恃僅以延其世系  
如綫不絕幸已奚意有聞於時卒起家進士列侍  
從為法曹駸駸位望未涯何前嗇後裕耶數之所  
塞力有不能達理之所開天有不得斬誠易測而

可恃已世有不務修身俟命僥倖未定之天盍思  
所以昌熾而後也其諸慎厥詒謀哉

從弟太學生子益墓志銘

張氏自洛而汴自汴而杭累世居錢塘始祖以上  
世遠莫可考述高祖介然公受產伯兄始為仁和  
人曾祖毅菴公有子四人其季曰素菴公以子貴  
封刑部主事所生子六人伯仲皆以科第顯最少  
曰梅軒亦以明經著名士林年未三十而夭娶南  
安毛郡守之孫是生上湖名澥字子益上湖其自  
號也生六歲而孫尋又失恃伯父蘇州公撫育成



立教之治易為諸生輸貲升太學需次銓曹服官  
有期矣奪於治生旦夕孜孜課子毋廣陂池田畝  
名耕漁佃作入其租無愆期又即私居辟地起樓  
臺累岳石鑿魚沼架飛梁椽材選匠惟日不足寧  
復能去鄉土委身公家以是遲延歲月竟不及被  
一命之榮蓋已小試其才比於嵒窳靡蕩墮其聲  
聲者不可同日語居常翼翼自保無忤於物即有  
感觸憤懣至泣數行下終隱忍不能發非夫容人  
之量有足潛消躁心者耶歿之日為隆慶庚午六  
月朔生正德丁丑十一月廿二日年五十有四配

沈氏子男三長植先天次栢次桐女二長適太學  
生陳植槐次舉人沈榜皆宦族卒之明年 月  
日葬楓篁嶺祖塋之次二子匍匐乞余銘余與子  
益從兄弟也見其始而零丁中而勤劬終而富羨  
終其身纖嗇居積不爽毫忽嘗語余曰吾不茹非  
啗肥無輕裘鮮穀惟恐墜先人之業慎自斂爾非  
敢厭交游惜脯醪故簡傲取憎也似自適其好無  
他願慕然顧時時治行裝數除目羨居室嚴訓迪  
其欲高門闊紹冠裳攄胸臆豈一日而忘情執冒  
暑橫林奄忽物化悲夫悲夫思創造之難體節約



之意紹三世之休暝九原之目二子宜何如為心也銘曰居積繁襲慶源賁丘園俟高門名儒之子封君孫賁志悠悠屬後昆

光祿監事風山兄暨配沈氏墓志銘

史稱萬石君謹愿躬行父子兄弟兢兢不失尺寸一時貴盛無與比其後漸習懈恣族亦寔微以余歡於吾杭故家鉅姓孰不以謹厚興以驕淫廢哉吾宗肇迹伊洛自宋徙浙元季亂離無考始祖而下高祖介然公惇道德薄榮利淵然大儒曾祖毅菴公暨四大父與先大夫行皆迪德克肖二百年

繩繩不替有以也迨余同輩日益繁衍其中稱樸茂長者鄉黨遠近宗族大小莫不愛慕有風山公云公諱江字子澄余本生祖贈通議大夫兵部左侍郎誠齋公之孫伯父贈奉訓大夫吏部員外郎愛山公仲子也以明經應貢不願仕授光祿監事少與其季御史中丞子清從弟遂平教授子靜暨余同受易上虞張先生門人高弟無慮數十百人公以篤信簡默尤見愛重謂有近道資愛山公有子八人督課甚嚴見公則曰兒少休暇毋過自苦以寬慰之蓋好學不倦出其性生無藉父師之教



為之先也為諸生凡三十年十試棘闈不遇循資  
貢上春官又當需次外補學博嘆曰吾數竒不能  
及時奮庸垂老矣寧復悅仰局趣希升斗之祿哉  
余稍稍勸之曰吾恨不能相將同老泉石顧強與  
共風塵乎竟以例乞遙授歸是時同試 大廷之  
士以千數飄然弃去惟公一人而已歸後十年歿  
隆慶庚午九月初五日生弘治癸亥四月十三日  
春秋六十有八公身不勝衣言訥訥不出口研窮  
經史尤邃於易性寬仁畏抑嚴自治而薄責人重  
義輕利與人通財往往見負不較季父宦於外公

為紀綱其家所入餽遺雖微至薪楮不私分毫矣  
人有以重貲托公其人死遠方公密召其子持去  
子本不知以為望外之獲也喜聞善言耻言人之  
過周濟貧士不恃富驕人嗚呼中丞已矣遂平留  
滯中州無還期余猶異屣脫冠佩徜徉湖山庶幾  
相從於冲和道義之規而公遽亡矣繼祖宗之積  
累以開後人舍公其誰徵公何以表余宗未艾之  
澤哉公初配李氏生三女子長適大學生傅思道  
次鄭震亨次李柱李出鉅姓賢慧早夭繼沈氏在  
東鄉沙田亦鉅姓也事公久綜理細務以靜婉勤



儉宜其家至讌賓客承祭祀必務豐潔天君之亡以暴疾孺人呼天而泣曰人孰不死君死何太遽耶竟不浔侍湯藥一朝夕相顧出片語永訣吾何以慰吾生悲號累月漸減眠食已而絕不飲食遂歿貞乎烈矣非夫刑于之化使然哉即是年十二月十一日生正德戊寅九月二十六日春秋五十有三生五男子樽先天次檯栳柿朴三女子鄧繼曾金濟許其壻也孫男三文女三俱檯出將以次年一月日合葬於靈鷲山麓祖塋之次檯等衰經詣余泣曰先子隱約無顯稱惟從父

知潛德乞銘墓內以慰先子余不忍辭乃述先世而歸重於公銘曰伊洛肇宗宋季道東奕葉芳風末行見公數竒不逢業豈不工晚既登庸藐彼光榮恬靖謙冲度越顯崇烈烈閨中矢死相從靈鷲崢嶸繾綣偕封秉爨攸同式茲幽宮

高室蔣氏墓志銘

杭郡本名都雄麗多世家鉅族然樂侈靡務矜夸漸漬五方雜糅之俗損鴻龐樸茂之氣故士號才賢即業舉子競進取否且膏梁統綺微聲選伎耽逸欲恣淫蕩豈必皆性成於習哉迺有超越風氣



之外嗜書好古左圖右史克然盈矣猶遑遑焉求  
聞所不聞見所未見以為快若去彼取此然以余  
耳目睹記若鴻臚高君豈不然哉至邈所由來則  
父訓母儀所以陶鎔預養者要必有道已高君與  
余通家頃以其母蔣孺人之喪持趙奉新所為狀  
詣余徵銘余既雅善君重有感於習俗之日非也  
乃不辭而為之誌曰蔣孺人者忻州判官桂亭高  
君應鵬之配隱君鸞之女鸞祖琳仕為御史中丞  
高亦世有開人故宋武功郡王遵甫之苗裔由汴  
來占籍仁和兩姓門閥相埒結為婚姻始于歸時

高方不足於財孺人躬紡績絲臬用佐機杼備極  
勞瘁逮稍溫厚益躡躡服勤作業已桂亭以龍江  
提舉出判忻既富羨有官孺人不改其初桂亭致  
政還故里則相與優游燕喜樂其成而懼其盛也  
出高嘗任鴻臚君遍構經籍百家之書搜竒索隱  
萬卷克棟士大夫鑒賞者往往向君貸取披閱即  
徑持去不較君既樂與賢達博雅相厯澤於是聲  
聞四方士無不願與君游孺人又時時勸勉慰諭  
掖成其志蓋鴻臚誠蹕絕瓌瑋不徇時局使不出  
其庭闈之意方寸計尺度責效旦夕或不檢束其



身縱之跡弛自放何能至是哉先是孺人無子為  
桂亭多置妾媵竟以有子孺人若忘其非己出子  
亦忘其非孺人出也迨本生母歿孺人屬其子特  
厚喪葬於是鴻臚君益感泣圖惟孝養適下第京  
闈遂輸資司農亟就一命還將奉其親以娛愛日  
而孺人不待矣歿之日為隆慶庚午八月十四距  
生弘治庚申十月初十享年七十有一子濂即鴻  
臚君女一適童時英次年 月 日葬北山欽  
賢里銘曰高厚宣仁為宋姬姜開國武功重此蕃  
昌綿延 有明簪紱歌邛徵仕濟羨元配惟良中

丞之孫名閔逾彰處約服勤盈不改常為婦為母  
何用不臧曷以報德既壽且康我輩其略求侈于  
藏

沈母陸孺人墓志銘

余舅氏南昌判府野亭陸翁有二女長為余淑人  
次歸鴻臚司賓署丞沈緣崖生子才淑起家進士  
為比部郎先試中都司理秩滿例得封母氏孺人  
兄弟兩有封號鄉人咸謂野亭翁知人能擇壻也  
今年才淑以錄川使江南奉母還里第還輒病病  
既劇命家人治後事殯殮之具靡不纖悉且皆手



舉身試之已又加命服霞帔引余見之曰殮事苟  
完唯墓中之石非手足之戚莫詳苦辛願乞一言  
光我泉壤余既心許之三日而訃至時隆慶五年  
正月二十四日生正德丁丑三月十三日年僅五  
十四爾頃余再奉雍秦之役緣崖率才叔詣余申  
意恐遠去不及踐宿諾也余因憶安人歸沈氏時  
二姓方貴盛相埒沈世以貲雄里閭家務繁劇翁  
竹亭公亦鴻臚也姑姚氏皆嚴急難事翁又多媵  
妾子女總總不可調安人周旋其間使內外大小  
罔不稱賢未幾翁姑相繼亡奸人利其有挑釁成

訟十餘年不息當官者每遠嫌無斷點傲無所忌  
憚洵洵危疑當是時內安念懷保家業外施德惠  
陰消排擊心煩于慮躬極勞瘁且教子懋學績文  
夜則攻刺繡不寐惟恐怠惰已而憂患釋子以明  
經高第致身青雲奉孺人祿食南北凡五載而歸  
正孺人優游歡暢之日而命不待矣悲夫以二十  
年艱危憂鬱僅僅數年孝養天道報施殆不可以  
尋常歲月計也豈其賦命有定雖脩積不能易或  
本嗇於賦必俟修積而後得助於天加是耶孺人  
嘗曰自吾母見背吾視女兒如母比其遠歸先廟




見舅姑而後及其他夫君急難解粧矢死若出焚  
溺公署訓戒不離廉平為子為婦為妻為母即士  
君子躬行不逮迺全備於孺人可以為難矣野亭  
翁吾郡中所稱有道仁人也其所生育教習宜然  
哉宜然哉緣崖諱重才叔曰梗女二夏祖慶張升  
其壻也是年 月 日 塋 山之陽銘曰易  
謹家人詩首閔睢橫事不雁語亦有之禦侮解紛  
綢繆室廬亦既振蠱鴻漸于逵開子芳譽孰匪母  
儀輝煌象眼祿養委蛇福履茂綏長逝如歸馥鬱  
崇丘百億瞻依



國家圖書館

卷之十六

奚囊蠹餘卷之十六



國家圖書館 NATIONAL CENTRAL LIBRARY TAIWAN, R.O.C.



奚囊蠹餘卷之十七

行狀行畧

從兄東川公行狀

公諱洪字子容東川其自號云余族世籍河南始祖某從自汴京占籍錢塘高祖某遷仁和明性理之學通經史百家言多著作我宗詩禮之傳自高祖始曾大父某大父某是生愛山公愛山公諱某後以季子貴贈吏部員外郎與余先大夫同母出先大夫出後余祖故于公稱從兄愛山公有丈夫子八人公嫡長也生穎敏倜儻不羈能讀先世遺





書業舉子為制科文詞駸駸成矣輒棄去習孫吳  
試劍為搏戰勇已兼人則又棄去挾高貲遊吳中  
通海鹽徵貴賤凡歷艱險悉心計織嗇筋力孳孳  
二十餘年乃益致富羨然不為異財別產悉歸愛  
山公愛山公以是得優游家庭增構典籍延致師  
友旦夕課諸子委心無他者寔公勞苦於外以陰  
贍之也已而嘆曰大丈夫不能奮鴻鵠之翼赴風  
雲之會以文睢雄悍垂功名竹帛而庸庸逐銖兩  
商販間何以自明其志邪於是盡棄所嘗經營日  
泛覽群書因訓迪其子暇則與諸弟商確古今或

對客彈棋六博登山臨水窮險極幽怡然若有所  
得嘗憇北峯之巔為詩曰躡足千仞危山風逐衣  
颺徘徊蒼莽間飛鳥度青嶂牌陳一杯酒洒洒多  
嘉况時當杪秋信宿山寺遇夜則又為歌曰大蕭  
殺兮涼襲水月流彩兮烏鵲啼撫景寥寂兮捲竹  
簾孤燈腫朧兮爰幽帷時序疾兮思徘徊萬物變  
兮心孔悲語義悽惋若憤懣不能平者時季弟為  
選曹即公忽給其家曰欲再入吳尋舊游為樂竟  
買舟常往歷齊魯燕冀不遠數千里訪弟長安旋  
邸曰選曹進退人才登崇賢豪博採輿論為國



得人民且受庇甚盛事也人所屬意子盍慎之吾  
今知所學皆不適用吾其歸老矣強留之數日快  
快不甘餘食雖 宮闕雄麗不一觀望縉紳續紛  
不一交接飄然南歸蓋晦迹以避請托防自點以  
貽弟耳弟感其言為出俸給納 崇府引禮舍人  
榮之非其志也歸即疽發背浸劇猶口占曰匣劍  
渾無用熊經徒自誇醉中輸一局夢裏演三車自  
是不復起矣歿之日為嘉靖戊申十月十五距生  
弘治己未十一月二十一日春秋五十爾所著有  
東川稿二卷藏于家公生平剛毅簡直與人語恣

其劇談不為巽避稍不協輒面折不能容即遇顯  
貴人不過為禮然故舊交歡雖甚貧賤不遺有緩  
急相接忘利害為之圖人亦以此多之初愛山公  
疾篤自以多男子又異母出忽忽為身後憂公乃  
跽進曰大人幸自愛兒輩終不以財貨之故傷天  
倫後果交相讓一無間言公以孝友率先諸弟類  
如此馭僮僕嚴而有恩會有邁青疾者醫謂不祥  
通之將傳染為厲公笑曰少盡其力老弃其身仁  
者不為矧老且疾邪至躬親湯藥迨死不弃居常  
不喜飲酒無紛華綺靡之習不惑於浮屠言惓惓



誨其子卒業儒庶酬素志惜哉子且垂成而公不待矣悲夫即公所自期待若舉天下事無不可為使當一命之寄舒展意氣必將有所建立不泯泯無聞也而令壯歲蹉跎徒以五字沉吟鬱鬱負志以歿天之降才何心哉先配盛氏生子男曰榜補郡博士弟子女一適蔣需盛先公十年卒繼娶金氏生一女許聘徐浣金亦先公數月卒庶出女四人一適蔣致一許唐其餘幼榜將以次年冬月扶公柩詣靈鷲山先塋啓其母之壙與繼母同窆焉欲乞銘墓石而屬余狀其行就所睹記敬列如右

### 成都知府邵公行狀

嘉靖戊午九月七日故成都郡守邵公卒里第是歲予將使蜀便道來還其子崇生取公所自編年譜而予作狀予從弟澥為公子婿代懇尤切不得以蕪拙為解漫摘所編事叙之曰公姓邵諱經濟字仲才別號泉厓宋康節先生之苗裔也南渡時自汴居杭世為仁和人高祖純曾祖信祖琮父鑑以公貴封營繕員外郎母楊氏宜人以弘治癸丑七夕生公幼多智慧稍長習毛詩受家學於營繕公勤厲日進甲戌督學徐公蕃選克邑庠弟子員



譽望籍甚尤見賞于西蜀劉公瑞收列正員壬午  
舉二鄉癸未卒業成均時嚴少師嵩為司成器重  
之因與趙尚書文華同舍相友善丙戌舉進士值  
楊宜人喪未授官歸己丑補工部主事專理清江  
漕船廠多積弊易汙公為立規程嚴稽察事集而  
積羨倍昔有所集濟漕補畧可考任滿進員外郎  
督理臨清磚廠區畫釐正如在淮時甲午進郎中  
督易州廠先是各錢糧解廠多留難公隨至即發  
收迺無留難又為節車輛之費定輸納之期商民  
稱便乙未擢守成都成都劇郡訟獄既繁部使監

司沾沾指拾缺失公勾稽酬答事皆曲中歲旱竭  
誠祈雨匍匐壇壝自為祝文泣與神誓遂得雨如  
注農賴有秋存撫之暇訪求名宦鄉賢祠於大益  
書院郡縣學宮稍敝輒為完繕至昭烈武侯陵祠  
少陵君平遺墟凡郡中先哲祠宇並修飭崇祀以  
風勵百姓又博選茂才異等集書院躬自教育間  
為授之章句稽其勤怠於是壬爭嚮風互相砥礪  
後歲大比裒然首選者多省下士今御史中丞王  
詢張景賢周郁守倅尤為知己會當入覲撫按皆  
薦公賢能不宜久淹外郡未報值營繕公歿公歸



自成都自是議其後者起矣公聞之曰生本微賤  
幸得備位明盛仕至二千石不為卑薄人不我與  
已矣夫遂不復出郡人劉丹厓士元作德星亭記  
紀公治行表遺思彼其親見行事宜非空言也家  
居以來每好出遊嘗入龍虎山登匡廬齊雲浮舟  
鄱陽富春淞泖遇當心處多信口為歌詞自適比  
趙尚書督師入吳則往與之俱張中丞撫南畿歷  
雲間亦往雲間王中丞飭兵海上嘗往薊周郡守  
守信又往信率歲凡數往不厭殆苦城市喧囂浪  
跡山川探奇涉險發舒曾臆以為娛不相諒者顧

謂公宦遊已久何所歛異猶營營遠役至有他疑  
豈其然耶歿之日始亟呼兒女輩命以後事出所  
畜若干金分逮所親有差蓋公素纖嗇深藏雖家  
人不知其有也所著詩文凡二十卷生弘治癸丑  
歿知年六十有六配丘氏封宜人先公八年卒年  
男二長棠生庠生次棣生女二長即予從弟婦次  
許江埭禮部員外郎曜之子孫男三承廉承熙承  
默孫女承孝棠生等將以次年葬公玉泉山營於  
丘宜人之壙合窆焉宜有銘以垂不朽聊述大都  
畀藉手于名公得采擇焉



唐府典儀正柴淳彞行狀

公姓柴氏諱龍字舜臣別號淳齋仁和人也宋南渡時有諱士宗者自汴扈蹕來杭因占籍焉歷傳至政政生質質以勤儉起家益開拓其先業有丈夫子二長靜菴銘次巽菴嵩嵩取南安郡守竹軒毛公女生三男子伯夔季臯公仲子也以弘治己未正月二十六日生生而端凝不為兒戲靜菴公愛之請以為嗣靜菴配張氏得公愛尤甚無何張卒公方童稚哀毀執禮不異成人靜菴固嚴毅難悅稍不慊即盛氣厲聲家人咸嗃嗃公曲為愉婉

務得歡心逮歿哀毀執禮如其幼時自是歲時享祀必戚然悽愴思慕終身抗俗侈靡千金之家率以服餽輿馬侘里閑公獨敦儉朴所服布素數浣綴不厭深居簡出出又深自歛束不踰分為高車與人交直諒不疑舉貲於人人有負者輒折券不債償遇貧乏及婚喪緩急厚卹不吝嘗曰吾寧損已益人必不害人利已然性善貨殖物值貴賤皆能預料盈縮絡始不爽又不錙銖取盈以是漸積饒裕非夫憑藉恣睢干禁龍斷歛衆怨以猝富也往年申舍君舉於鄉時方弱冠公自以僅一子當



遠離念之不置中舍君承其意留止不上春官已而廩上不中公固不色愠迨中舍君登進士高第授官奉使西藩便道歸省當是時司省郡縣諸大夫暨鄉縉紳士咸走賀里第冠蓋填門中舍君又為公輸貲得授將仕郎唐府典儀止父子被服彩綉一時貴盛矣公亦不色喜顧愈自慊抑惇篤故舊即市井猥賤亦必溫溫款曲人稱鞠躬長者謂淳坐稱實云歿之日省城內外知與不知無老壯皆為咨嗟嘆惜彼其忠實心誠信於人也中舍君又謂余曰先君於物無好而好覽史傳涉獵往

迹恒以已意評其是非多出昔人意表守身極慎隆冬盛暑不出內戶小有疾便偃卧累日非全愈不强起處吾叔友對吾母如賓教子無疾言厲色外相南安公歿後家益衰子孫至不能保廬舍已又將及其墓道石坊先君聞之惻然曰榛莽之中知有毛南矣者恃此尺寸石耳蕩廢可至是乎為償其值得無廢其審於輕重類如是晚築圃城西穴池結亭雜植花卉時偕親友徜徉其間一日折花對客曰花誠美廉幸與諸君劇飲明年花發時不知幾人存也悲夫是歲之夏為嘉靖丁巳六月



十九日一疾竟卒公於生死豈能預料不爽耶亦其心誠實誠故明達非必身中其言本聚散常理如然爾凡歷春秋五十有九配田氏生子二長禎早夭次祥即中舍君女二長適余弟洽兵部武選司郎中次適庠生陳文濟大廷尉東瀛公孫也孫男二長應椿聘余孫女次應楠余於公家今昔聯姻積素累舊締好知公宜莫如余併以所聞中舍君言敬為序狀如右真立言君子採而銘之

高祖介然公行略

介然張先生初諱某後更諱某字羽臯本洛陽人

仕於汴始祖諱某者扈宋南渡遂為錢塘人父彬以賢雄里中我 明天下初定嘗輸粟給邊至通藉司農曰富戶母王氏以洪武甲辰生先生自幼穎異器宇冲粹少長精研儒術探抉微眇五經六緯靡不浹洽而周易尤為顯門旁及九流百家技藝至推步天文占風望氣奇驗出自性靈無暇師授先生既深味道腴頗厭棄財貨迨終親喪徙居仁和高賢悉歸其兄自是修學益邃轂聞藉藉宣德間兩廣多事時潘中丞某將往視師雅聞先生自行迎除舍先生為設策乃請與俱凡所遺調一



聽指畫一日坐帳中望片雲隱隱起離震間謂潘  
曰事濟矣有頃烈風南來此捷音也已而果然會  
潘欲疏請 召用先生誓不仕輒悔跡間道趣還  
易後名故先生之名卒不顯晚歲卜居東西壁遊  
心著述所為詩文多不傳傳者若自述云有意欲  
嘗千日酒無心去傍五侯烟夜寒荷葉杯中飲春  
煖梅花帳底眠題像云丹青點染苦勞神寫出緣  
何喚作真自己幻軀留不得却從身外更求身臨  
終云我生原有數數盡復歸元來往自然理何須  
求異端並根極理與非苟言之也姚江馮蘭華以

易學號知名士間從質難先生時年八十餘對衆  
劇談一座皆傾至羅拜執弟子禮去年八十有二  
無疾終今子孫多以文學政行表見當世明經世  
其家云

### 大父質庵公行畧

大父質庵府君諱某字用綱上世出洛陽仕宋於  
汴南渡時扈跡駐杭占籍錢塘當始祖時吾宗素  
饒益高祖某雅尚文學禮義盡以推讓其兄所取  
不及十一遂析居仁和之義和里而曾祖某以下  
始爲仁和人妣毛氏南安郡守母弟也有丈夫子



四人伯授散官仲贈通議大夫季封承德郎皆有稱號府君以景泰辛未人日生幼稟竒秀授書輒通大義顧清弱不任煩勞居常苦疾患恐年壽不永爲父母憂每以親醫藥廢誦習然終身意不能忘垂三十始娶終以多病鮮生育所育仲兄子竟以爲嗣卽先子亭山君也間出累歲所乞諸家禁方脩合藥餌旦夕孜孜不厭歲率費百餘金施人無不立應遠近求請如市竟不取償一錢歷三十餘年歲復辛未再得孫里中父老咸詣賀曰德積厚矣是兒生不偶也日者又推論五行不賤府君

心切喜字之室中與大母孫淑人鍾愛出諸絲上成童遣就外傳居常謂某曰曆火寒灰之下積薪其上光焰燭天義在其中發於事業如此無火不然薪不積易滅敏而好學不當若是邪又曰陶冶不持斧斤追琢不施赭堊凡業貴精專乃成博綜遠獵泔魚兼及而不工乎自是某始知趨向專意經傳然卒不能率教以副所期待固多也生平不惑於佛老素奉儉約習俗奢溢僭差視之厭苦若將浼焉惟歲時追祀祖先必嚴潔致敬宗族親故有不賒輒分所餘振乏鄉人無遠近大小莫不愛



慕里中首舉高年有德為鄉飲賓郡守敦請累歲  
竟不一赴八十後又舉加冠帶亦不赴但謝曰吾  
德薄不足以辱盛典嘉靖壬辰二月壽終後二歲  
而某舉於鄉又三十餘年 今上登極 覃恩以  
某總督漕運得贈兵部左侍郎兼都察院右僉都  
御史嗚呼學道無成仕無偉績茲老矣僅僅以一  
命賁丘壠某之罪負可勝言哉聊記憶行誼大略  
將以丐於立言君子表章潛德切有望焉

先考亭山府君行略

先大夫亭山府君諱某字元錫生成化辛丑九月

二十五日自少端情爽朗有成人之度與諸昆弟  
贈吏部員外郎愛公刑部主事兩山公蘇州府  
倅封兵部主事半公齒相若也以文業行誼相  
砥礪後刑部蘇州相繼登甲科仕有祿秩府君與  
吏部咸奉例輸貲幾望寄一命以自表見值大父  
夙嬰弱疾不忍以遠遊廢定省竟奔所入貲與吾  
母李淑人共極孝養食飲必躬佐烹飪乃敢上大  
父既耄益多疾常在牀篋時時侍湯藥無間寒暑  
已而考終盡哀毀瘠見者為之隕涕終事詳慎以  
禮伯兄嚴毅稍不憚輒厲聲色府君俛首長跽稱



說委順繼之以泣兄每為感動罷去晚歲相與驩  
甚間私語曰弟德度醇篤恢闊非所及吾不能享  
祿養生沐 恩光如弟已疇昔有言能無忘之當  
是時府君已膺承德封兄子中丞濂始有南宮之  
捷自是兄竟不祿府君追思遺言悲慟不已故郡  
人無問識不識咸稱孝友府君愈自損抑有司歲  
舉鄉飲郡守李公冕躬詣懇請僅一赴成禮而已  
益修締故交金太史近山童封君賓山高封君東  
園金山人蒞泉皆以詩酒娛悅結亭泛艇徜徉湖  
山悠然樂也雅不好治生舉貲於人往往見負不

較又乃漸廢落吾母以為憂府君曰義利不同途  
富貴不兼得既自勉遵禮義頭有榮稱即富厚非  
所宜擅又嘗謂某曰兒往試吏得無私家是恤故  
廬無恙薄田不乏朝夕無庸增益慎守節廉以求  
終譽暮年之奉不需汝為給也悲夫親誠無藉祿  
養不孝竟不能躬奉左右承一日之顏豈所以共  
為子職哉府君生平樂易犯而不校喜稱人之善  
不顯言人過失雖訓諸子亦無暴色嚴聲吾母又  
以慈愛相之家庭之間雍如也與人亦亦卒無忤  
史稱敦厚慈孝君子長者何以加焉吾母以己亥



七月歿又七年當嘉靖丙午府君與客夜泛舟渴  
飲湖水遂患脾泄不起某守廬陽委身公家湯藥  
不侍殯歛不親終天之恨忍言此忍言此詳見督  
學憲使豫陽田君所為志中始嘉靖丙申  
先皇帝以祀 天覃恩封南京工部主事母曰安  
人隆慶元年 今上御極 詔例得加贈兵部左  
侍郎兼都察院右僉都御史母曰淑人  
誥勅褒嘉兩詞粹美人謂當其實云

奚囊遺餘卷之十七



奚囊蠹餘卷之十

祭文

祭包孝肅公

廬郡本宋龍圖學士孝肅包公故里城南有讀書  
臺土人呼為香花塾莫詳所自公圖像告身遺寫  
在焉其始至謁像既訝其大異昔聞復厭遊觀者  
會飲歡呼藝狎非禮乃建亭堂前奉公於中令不  
可狎既又題其臺曰流芳為文以祭之曰嗚呼天  
下事以意想擬人必失其實以憤激稱名鮮得其  
理公風裁勁節歷世世罔不企慕雖愚賤童稚皆



知之至繪圖貌像則備極奇恠今覩遺像乃清雋  
古雅殊無異於人人議擬公行輒取廉刻深文發  
姦樞伏至考其實乃敦大體黜慘酷殊無戾乎中  
和然後知習俗所傳皆曲億深索激於時者也宋  
公獨持骨鯁務尊主庇民不為雷同附和以坐鎮  
流俗故天下取立懦廉頑之意獨以嚴厲歸之而  
略其博大流傳既久匠氏務極嚴厲為狀差溫雅  
卽慮弗肖宜乎奇恠之形嚴猛之政愈傳愈失愈  
遠愈信且堅也公嘗疏戒天下觀察使務存體要

無事深求焉有以此倡言朝著顧自食其言卽  
可以槩公之行語云夷齊不念舊惡聖人不先介  
而亟稱其量懼未覩其全也則天下未及覩公之  
全亦久矣余忝刺公郡仰公汗顏敢因蠶測用以  
為質英靈不昧尚默啓所蔽以陰惠公里也

### 重瘞古塚

嘉靖丙午仲春廬郡東北郊盜發古塚二弃骸穴  
外易材於市吏逐得既正典刑仍為治棺收瘞故  
所郡守某遣大使未帶持酒肴祭而慰之曰吁嗟  
乎何人世系無傳生當何代壽夭德凶男女富貴



杳不可知顧茲封砌完密材木堅美應非常人豈  
形生猶豐盛之年終嗣絕在衰微之後已致慎乎  
葬埋遂厄窮而莫守邪荒原蔓草上下牛羊常祀  
久廢濡雨隕霜已足為生人之惜傷矣又以土人  
悖戾罹茲慘患啓枯朽於黃泉暴泥砂之白日彼  
誠見利以忘害幻軀既委其何恤莫謂生前之不  
修實亦廢典之數值也守念政不格於頑悍因之  
熱中然尤情難越於同胞重為此額今來瘞汝庶  
幾有知歆此憫惻未依原魄無因為厲

祭長姊

嗚呼悲夫茫茫天道果可測邪福善禍淫栽培覆  
傾夫順以信天人祐助稽古斯言皆虛語耳不然  
孰謂秉德如姊不俾之壽又孰謂有子克孝卒無  
應耶方吾姊在室余諸弟妹皆幼悻順寒燠怡吾  
親心書史伎藝成吾親教撫翼同氣濟弱扶穉均  
吾親愛遺惠種種筭而于歸流涕牽衣情傾少長  
乃今二十餘年吾弟妹時時興言猶酸心不已孰  
謂吾姊奄逝永隔幽明吾弟妹摧裂肺肝攀號可  
但已邪往年先安人見背余白南水曹匍匐歸廬  
吾姊每慟哭欲絕既而積氣况鬱宿中乳毒乘哀



毀卒發時召醫者有難色余竊謂吾姊以孝思得之雖厲不為害胡為乎天不監于孝女竟以殞其生邪吾姊有二子皆穎敏純恪比侍疾時刻不離躬極勞瘁乞醫投餌顛天變食甚至吮吸潰積割肌體為飲以進經年如一日余見之未嘗不咨嗟嘆服謂其必能全母胡為乎天不監于孝子竟無益于死邪嗚呼悲夫藥藤療風石英全患姊之二子宜無愧于斯人天果不可測矣德基五福賢者永嘏姊之仁孝夫何歎于斯言理果不足信矣天不可測理不足信信乎吾姊宜天也余何忍言余

何忍言惟德在人不朽惟子顯親不死孝慈溫惠無間尊卑威鳳伏龍佇見翔翥茲天道在遠猶邇吾姊得自慰于重泉而亦弟輩藉以少慰哀思者也

### 祭朱母

梁分厚裔吳傳茂族令澤潛流芳華煒郁時凝坤載迺滋茲育誕啓玉儀朗宣蘭馥教崇維四藝精踰六是異凡媛是基永福好述君子卓哉元谷志並鵬騫道隨龍伏疇能曲慰頓輕榮祿天褫其儔矢心栢舟植節明義振盪承休紹揚先烈貽厥孫



謀孫謀允臧彰志闡幽秉心摘藻石介川流式爾  
前徽壯于 帝猷方隆遐祉奄逝莫留業雖失豫  
報劉養弃靳茲生榮遺之隱施嗚呼哀哉維天難  
測惟命不易聚散如然死歸生寄夫復云何所要  
不愧宜家者睦明分者智節凜者貞教成者義有  
美克家亦終繼志永慰重泉冥冥不昧

祭魏令孫允功

伊魯稽之名岳實神禹之舊疆帶三江而襟海誕  
聖哲而興王緬自昔以逮今紛懋實而開芳嗣孫  
今之挺出殆鍾靈而降祥蚤誦法乎典謨振清響

於琳瑯耻白駒之優游指青雲而激昂鳳穴英飛  
於桐嶧龍門角奮於桃浪劔光騰於出匣錐穎脫  
於處囊臨洹作宰惠此魏方允恃允怙為紀為綱  
歌聲聞於武城花陰滿於河陽飄仁風於畿輔馳  
妙譽於巖廊列宿方耀曷掩其光貿易罷鄭人之  
市大音絕單父之堂翱翔未離乎叢棘蔽芾徒咏  
乎甘棠嗟哉哲人罔不盡傷余昔射策回舉於鄉  
飄蓬久歎於契闊彈冠初慰于相慶僅十年而一  
遇不再見而遽亡苟禍善猶難測人何恃於彼蒼  
若夫脩短命定於不易又奚怪乎不俾之壽臧鳴



呼禹麓身天名揚樹偉績於明時托不朽於文章  
已多取諸造化復何憾乎靡常越嶠雲迷漳河水  
決悠悠旅襯孤寡相將縱達觀于聚散情胡忍于  
頓忘薄卹爾後慰爾冥茫永訣臨舟兩泣數行

祭十二弟子德

嗚呼余聞弟之變且三月矣每一念至痛不能言  
憐余者口盡宣諸詞以舒其悲余既無以自解乃  
述哀衷而寄奠曰伊河洛開吾宗之源兮入西浙  
而派分世種德而累仁兮紛內美而修能三台孕  
秀而鍾祥兮迺佑啓於後人嗣吾弟之始降兮屆

昌裕之嘉辰表文明於威鳳兮侈聖瑞於仁麟傳  
一經於四聖兮諳詩禮於趨庭載五車於三冬兮  
煥綵筆於高文遂脫穎於鄉闈兮弄射策於 楓  
宸既簡注於 巖廊兮亦流譽於 緝紳托鎖鑰於  
東關兮念地阻而遺親寧踈迹於南天兮甘祿養  
以娛心除戎噐於武藏兮掌三銓以持衡品藻允  
諧於庶職兮董正克振乎五兵既黽勉於官箴兮  
尤兢惕於檢身羽翮奮於漸鴻兮溫恭協乎謙亨  
胡禍善而天賢兮奄膏銷而蘭焚鄙余浮沉於冗  
賤兮再握符於陽平第方奏最而還轅兮暫把臂



於衛濱折津柳以牽思兮傷朔鴈之離群風雲期  
盛世之績兮湖山訂晚歲之盟胡在耳之未忘兮  
竟未訣於云云嗚呼哀哉繫白髮之在堂兮遺弱  
息之零丁悼孝友於九族兮懷仁厚於鄉評悠悠  
旅襯歸何日兮山城鬱鬱故壠藏何處兮幽高恨  
撫棺之靡及兮時浪浪以沾襟媿脫驂以為賻兮  
聊束芻以寄忱諒有知能諒余兮庶來格於冥冥

祭顧方伯齊賢

維天之道虧益無私維聖之訓禍福有基常理如  
然今也何稽謙謙君子展矣醇儒開芳振玉實懋

聲蜚脫迹鴻遠筮仕雲司遵彼三尺詳於五辭出  
守清漳千里保釐仁澤覃被清譽遠馳乃持邦憲  
文教敬敷起衰崇雅雨化風熙翱翔藩臬秦楚雲  
霓四國是式一節靡渝載陟東省漸騁天衢胡弗  
少延隆揀遽摧豈厭溷濁潔身全歸抑有定命修  
短莫移殃善覆栽厚積薄施天誠難測理亦難知  
國嗟矜式鄉悼表儀矧我姻契誼重心悽陳詞侑  
觴敬祖靈輻冥冥不昧洋洋格思

祭孫柳西

猗與封君周文之裔散處吳中雲間流寓 明興



驅逐編戎入蜀歷世累仁含光守璞或宗夢得蘊  
藉詩書或承思邈醫隱閭閻迨公崛起克濟世美  
庶人在官冠服是被流賊紛擾所過靡遺義激諸  
鄉宣揚武威萬家如堵五里無虞粵歲戊子綿漢  
大侵弃浮載道此穎酸心闢地給力惠沾枯骨冥  
漠有知何以報德篤生令子蚤奮天衢詳刑西省  
剖竹邛畿 巖廊重望 朝野清譽惟 帝念功  
推本自公 龍章再錫進秩荐隆鼎養方盛生榮  
未既胡然厭勞奄忽仙逝嗚呼哀哉魄寢柳西訃  
聞恒嶽君侯奔號士民悽愕嗚呼哀哉掩骨曰仁  
悠

祭劉安人

禦難曰義陰隲既厚明公亦試輝煌紫誥亦既食  
報榮壽及稀繼述克孝桐岡鬱鬱佳城屹屹梧月  
松風相將窳窳生順歿寧胡弗安憚某托交令子  
誼忝同遊仰德有日執紼無由誠無不格我心悠  
旣德世族夙稟淑姿作賓賢雋式慎壺儀蘋蘩禮  
肅琴瑟家宜佑翼鴻舉奮迹天達翱翔卽署澤國  
保鑿載陟臨邛邛憲是司馭歷中外靡往不隨處  
貴思約不驕不移事無攸遂勞罔內虞人知克相



帝鑒孔微翟冠象服玉燦金輝躋榮方茂食報未  
幾胡天不融乘化遄歸蜀山岩岩易水瀟瀟夫君  
嗣子目隳心悲某等分同寅雅情共淒其遙將薄  
奠陳此俚詞

祭張封君

紹世德於故家聿潛脩而誕發浮菁華以藻飾湛  
禮義為輓軌贊郡政兮為郎眇斲試兮雖未蚤厭  
籠樊超然蹀脫盼桑梓兮徜徉孕桂蘭兮芬馥多  
畜啓兮詩書義方授兮英傑尋挺出乎白眉侈大  
來之朱紱譽振兮雲司名聞兮 鳳闕恩錫褒封

兮輝煌綸綍養遂鼎姻兮委蛇閔閱舞筵翻兮編  
衣省闈駐兮憲節正悅豫兮未央胡嗟生兮大耋  
某等托交今子訃傳悲吐遙致薦兮芬芳望冥靈  
兮淪忽

祭蔣食憲

嗚呼士君子寄形宇宙凡砥節礪行確不可拔者  
心能自盡其顯晦得喪紛不可定者勢固難必是  
故隱約能安盛滿不溢惟順應之不遷迺御動而  
常逸嗟嗟環山胡然不憚蚤脫穎於衡茅飄仁風  
於劇邑繼鳴珂於郎署凜紀法之脩飭爰東憲於



滇南丹分符於川北侈彼豸繡舒我胸臆方將屈指功名等之何有詎意轉盼妍媸如斯莫測夙以虛羸因之憤抑貽戚孔多返真何亟果自信之過高豈未達乎通塞嗟嗟環山胡然罹厄諒有生之脩短本定命而不易信有來其必往總生勞而死息悟萬有之皆空奚隨感為欣戚惟有子為不死惟今名為不忒永以慰於沒寧亦將解於生惻

祭周母

夫女德不外見不於其夫則於其子是以表坤順者與其承乾式母儀者本諸賢士惟茲純懿夙成

於名家作配克媿乎前美蘋蘩知婦事之宜絜緝戒冶容之侈夫君得助而內顧亡憂嗣賢有托而忠勤是矢已迺倦遊節鉞奉鼎俎於北堂競秀芝蘭娛桑榆於錦里方永日以祈年胡珠沉而玉毀余輩服官巴蜀久企家風傷素娥之歸月慨婺曜之隕空遙將牲醴用寄哀恫

祭李封君

太行璞韞沁川珠耀誕發清標世德克紹總角攻文弱冠味道疆記博聞精研深造飛藻奪目說詩解頤黌宮萃拔月旦里推自勝者學不偶惟時晚



膺賓薦寔匪心期愴然龍伏後人是啓明允名家  
長公濟美甲第英聲掖垣方軌 朝無闕事告有  
嘉猷蠶叢遠使澤滿西陬孰匪隱施如源見流祺  
壽未央 褒封甫及宜臻遐紀鼎養天秩士永師  
資民留表率胡命不延返真孔亟某托交令子企  
仰淵源訃傳心測執紼無緣束芻萬里歆此不虔

祭郭侍御

嗚呼何木非材喬樹凜其凌寒何士非名特立嘉  
其峻節伊惟雲中之彥允出儒林之傑穎異聞於  
垂髫天固縱之睿哲蚤鵬奮於鴻達試牛刀於鷄

割肆花縣之聲蜚歛蘭臺之萃拔始霜清乎畿甸  
繼春衍於蠶叢驚車照水隼翻搏風表正旌良而  
仁賢有恃繩回殫惡而狐鼠潛踪遠其却肥糞水  
齧檠採辦不避夫煙嵐寔食恒忘於勞劇松栢比  
其志堅天日照其心赤宜荐登於華要庶骨鯁於  
楓宸何風淒而雨泣奄鶴化而雲乘某投分既晚  
傾蓋方新蘭心易洽石介難倫乍黯然於訣別遽  
永隔於幽明敬楫辭於里第紛涕泗之沾襟

祭方室王孺人

毓德世家淑姿誕啓耀彼璵璠鬱若蘭芷施衿結



禱作配君子締綌既閒蘋蘩是擬戒於攸遂遵茲  
婉孌君子儒紳翱翔上林出倅南粵翊懋官箴芬  
芳五桂燁燁森森為婦為母克儉克勤肅肅家庭  
雖雖瑟琴既裕且榮承謙優約厚集休祥長垂矩  
矱食報未幾適還真漠石瀨悠悠雲山磅礴崔嵬  
佳城仙靈永託輶輶即踞酌此清酌眷我姻誼洋  
洋來格

祭郭封君

含章溫璞樂道凝真韓陵雲履洹水葛巾豐藝多  
材冲曠軼倫人倚為玉德飲如醇姻族雖離里閭

恂恂皜皜霽景煦煦陽春介石秉義博愛敦仁儲  
靈毓秀佑啓後人篤生大宰為國純臣鳳池染  
翰天部秉鈞任隆列辟寵溢楓宸器使允諧  
贊翊維新望流知源隱施在民鼎養未艾奄謝紛  
塵嗚呼哀哉孰生匪榮表德恩綸孰歸匪全耄  
耄是臻喬樹在庭叢蘭牲牲樂哉窀穸長夜棲真  
衛秦緬邈執紼無因楫詞寄奠洒淚西津

祭李封君

天植樸茂不斲淳龐允有剛毅亦克慈祥恤難給  
貧勸善抑強教刑於族善蓋於鄉篤生賢嗣教以



義方策名 天府邦家之光計曹振譽文部晉陟  
品藻清濁衡懸冰澈蓋其始教於家也累仁集義  
畎畝而期廊廟之業繼成於國也開芳布德簪紱  
而敦泉石之節方涓水不乏弘濟之謀猷在商山  
奚啻逸民之高紫雖年齡定命之有數而功業已  
託於無疆俟勳庸之焯焯皆隱德之滂洋宜瞑目  
於泉壤懋純孝之盡傷仰賢閭於百里致哀悼於  
一觴

祭靳封君

山鍾道脉川發靈隅茂開人傑間氣夙儲在魯曰

濟謂蜀為眉明允掘起獨負恢竒規為弘遠運智  
知幾誕啓二難玉潤金輝長公穎脫命世鴻儒仲  
亦冲舉步武亨衢翱翔南北岳牧聲蜚有隕自  
天金章紫泥里閭赫奕簪組委蛇懋臻孝養未介  
壽祺豈其仙蛻終與世辭嗚呼哀哉才匪不施視  
彼田廬矧茲嗣賢勲業未涯德匪不酬安享耄期  
亦既 寵褒祿食久綏高朗令終造化為歸笑謝  
塵壒寧復嗟咨某早從伯子附驥以馳微垣表率  
藝苑師資蘭心孔洽芳軌莫追分均猶子遠計酸  
悲酌酒東嚮侑此燕詞



祭周參將

緼藉經史有通儒之學恢弘爽朗有馳騁之才慷慨奮迅有建立之志績文終困就武晚成已非夙昔心期譽匪不虞求全得毀何以舒其意氣足憂憤以殉國且貽戚於佳儷嗚呼哀哉所可自慰者脫跡塵埃制科首出棄繻天衢駟車鄉邑十年榮祿三品崇秩寓世已越耆齡雙玉同封窈窕有子能繼有功可錄生順沒寧何歎何慙陳觴薦俎既旨且馥庶幾來歆我心孔篤

奚囊蠹餘卷之十八



奚囊蠹餘卷之十九

書

寄沈廷尉

廬郡僻在淮西六安尤偏西南當荆舒汝穎間士  
故鮮儒術 國朝開設州治建學立師百七十年  
于茲文教誕敷衣冠儒雅彬彬接踵民間靡然嚮  
風矣頃侍御馮先生奉璽書來董學政適值荐饑  
刺史將發粟賑窮因取公田歲租周諸生之不給  
議既允行且圖為可繼之業謂田係之公非民所  
得私亦非官司可得專也政之公者莫學校若其



以田係之學永以為諸生之需乃檄郡悉查得先  
守林華所置書院田二十有一石在州城之北州  
守鮑德所沒入民互爭田十有五石與前田稍北  
而近凡入租石百二十有二預發所積易材鳩工  
建倉于學宮之東以俟收積計所宜憂卹諸生定  
其數有差掌之學正歲終籍其出入盈縮聞于郡  
議成僉謂宜請文勒石以紀其事乃核田之四至  
為圖附于碑陰俾後有所考以為有司勸學養士  
樹之風云顧文以信遠文傳則事亦不泯立言之  
責在門下不可辭也敬走役臺下伏冀俯念斯衷

特濡彩筆庶嘉惠後學之意表彰不窮而六士誦  
法明訓歷世世亦無窮也

寄謝巡臺

頃得邸報伏蒙謬取不才上塵薦剡法本激揚詞  
多誘掖感激何量竊念少困蠹魚既乏鄉曲之譽  
長淹泮水尤鮮麗澤之益僅飾章句見收甲科一  
試水曹三司法比十年郎署祇自蹉跎千里封疆  
何堪簿領顧茲鷓鴣雖眇志鴻鵠于雲霄駑鈍未  
疲企驕驕之風電若失足于泥滓而恣口于稻粱  
非唯不敢亦所不屑也頃者荒穢初治節鉞遙臨



隼翮橫秋唯驅燕雀鷺車照水不及淵魚表率群  
僚整齊庶政某分常奔走之末仰承師帥之餘驚  
惕四知持循三尺頻年苦旱雨不隨車萬姓其咨  
春慙有脚徒恃孔叔守已之義遂冒仲儀便人之  
稱况乃事上禮踈防身氣直在鳥非善鳴之鴈處  
卉豈附樹之蘿自分沉淪何堪汲引豈期海嶽不  
弃涓埃遂俾槩鉛誤蒙鑄造取以充數已為過情  
列之首行尤難服衆士元拔十得五故逮凡流梁  
公備藥籠中兼收常品此大君子包荒之雅量門  
下吏意外之奇逢也更惟今備末屬逢迎之敬獨

簡昔廝同朝殷勤之歡未協先容無地後效難期  
遽累至明特垂心賞比中丞之得唐介時報面以  
自慙若陸亮之負巨源敢剖心而為誓深諒敬侯  
忠度固不以知感為重輕竊懷鞠詠心知詎敢昧  
玉成之德誼肆陳愚悃俚澁不足展宣干冒威嚴  
慈仁尚祈鑒察

寄劉侍御

某吳越瑣材衣冠下品也無技能取譽鄉曲仕為  
冗賤浮湛莫可表見逮守荒僻幾欲少盡生平竊  
高穎川渤海之行砥節守公拯災卹患不憚勞瘁



凡以仰承 國家為民任官之意然而識鮮通明  
行多峭直竟何裨於元元徒取憎於尊貴幸辱門  
下越拘孿之議任偏私之見謬垂心賞直取鉛刀  
魚目欲令增價連城豈故好偽無深識哉必將有  
誤塵水鑑以為斷犀照乘不是過然某豈其倫哉  
傳聞薦牘所署若將等龔黃而上之每一念至未  
嘗不心忤顏赧跼踖難安嘗聞管子鮑叔知我之  
言豫讓身殉國士之遇謂人生相知古今人何不  
相及自今視昔宜無不相及顧報稱不知何似耳  
久處憂痛無由一申鄙悃頃聞少枉相途暫試畿

輔西浙密邇清化切欲匍匐行臺緣初春終制入  
夏多疾情耽丘壑心憚舟車不克徃偶便頂啓  
通誠臨楮馳神惟慎綏福

寄韓司馬苑洛

頃白水溫令以公所撰新城碑文送閱懸之中堂  
莊誦數過其間論虜勢強弱適當鄙心夫元以尾  
若火食游惰燕安之懦當 太祖練習百戰奮迅  
精銳之雄若猛虎驅群羊不待觀影聞聲先已奔  
命恐後迨 成祖三犁虜庭亦席餘威震讐彼積  
衰固難遽起也今種類日蕃自 英廟北狩以來



百有餘年本以禽獸驚鷙之性習食畜衣皮之俗  
彼益騁驕此方厭武兢兢自保不給寧復望

二祖勲烈哉宜不當輒與較武即郡邑村鎮城宇  
之計何可緩乎白水城中公衙之外民居不數十  
戶關外乃反十倍方虜犯宜君僅隔一山心竊危  
之故倡率吏民躬為畫地分工閭閻歡欣子來僅  
月餘竣事緣彼所畏殺掠在虜所恃捍蔽在城順  
人情以利導故覺易然何敢引以為功猥蒙稱諛  
不置祇增慙悚又嘗步入山後於小秦嶺上度得  
峻削處踞所必經而四面陡絕因鑿斷其脊為深

溝架木為橋橋南壘石為券門門左列營房數椽  
置弩兵五十人遇警但抽橋張弩可保無虞惟黃  
龍堡闊遠坦夷無險可據賴北有九溝稍剜挖疏  
濬胡騎即難奔騰念非道屬已關行矣前書謂臨  
晉夏陽昔險今夷要皆承平歲久人樂行旅之便  
無復深遠之慮爾道體康寧由 上天有意斯文  
聖君久道化成 聖世多壽誠然若曰某有小惠  
境中亦能滋益遐祉未敢承也

寄翁冶山郡伯

暫還無幾值春雨連綿南望樸堂渺渺吳峯雲樹



只尺千里會不得數非我心也津亭別來懷思轉  
劇居人念客將無同之意昔冶山嘗偕伯生訪我  
悟空禪林談及一時朋好謂朝鳴魁岸英爽可屬  
大事子春清雋和厚必躋顯崇良用強毅質直節  
義之士余拙鈍非所及倘寄以民社當不失爲循  
吏伯生雖自負惜骨相非爵祿器也言猶在耳三  
十年間伯生已化爲異物邵許咸致位藩臬駸駸  
盛矣虛岩上書忤旨罷諫垣歸冶山底績廣平  
乞休故里彼各在離隔而兩人者得共蕭散湖山  
適情游藝娛悅桑榆之景累仁集義敦篤故舊矜

式沈囂之風則固士林鄉曲欣欣羨慕謂不可  
也何乃因小有言遽成絕跡僕竊以爲過矣君子  
以同道爲朋固不輕易定交亦不忍情中弃小人  
則勢利是固故易親易疎今數子皆高朗之士其  
始磨礪於布衣韋帶之時非文藝相觀則行誼相  
勸已而仕國彈冠結綬赴功名之會尊主庇民致  
蹇蹇之忠並翱翔道義之林無所謂勢利奸其中  
也今二君之作也豈有壟斷可登勲名可獵相競  
不能下哉不過論議偶殊各持一見務以求勝靜  
言思之祇當發一大喙烏用喧喧較論效賈豎女



子爭言束髮投分今皆白頭片語參差遂為吳越人將以此窺二君素養矣矧時俗下趨交道大壞齊民後覺方引領側目視賢者為矩矱恐自處靡薄致風俗之益偷乎遠則許邵聞言必驚詫不遑寧近則伯生有知猶睜目於地下僕誠恐不盡言誰復為二君言者人去既以此意解於虛岩而尤諄諄為冶山告願修舊好息間言安朋儕之心毋為後生所指

寄張臨溪都臺

得接尊諭仰辱愛念即同氣至情不足過是鄙陋

何當屏居半載自分蹇薄之命無通顯之望雖知厚當途寢淩嚮往有地輒罹意外之讒時行復厄終將奚所希冀而猶策既蹶之足飾已倦之羽邪擬入山之深無意人間事矣繼思束髮仕國三十年君臣大義恐不分明而去宰執臺省共施再造之恩士為知己死何敢忘國士之報遂翻然出門冒暑入秦不敢自惜顧憤心鬱氣一病瀕危急切歸思遂不可遏夫士之仕也猶浮舟也進則進否則退不幸而遇淺阻徒費篙師之力不若勇退免風波之險也再疏具如別幅伏望轉達銓部得賜



優允幸之幸也生死肉骨之恩也如必不然將役  
牒遄往其擅離之罪必不攢眉俛首重足坎壈之  
途屏息嗛伺之側忍辱以延眇小之榮利也前書  
語及是非毀譽念公方總持紀法紛紛議論皆將  
取決於隻字片言竊疑尚有未破之惑不敢不罄  
胸臆以求事理之當夫是非者明覺之自然固有  
之智也見善而好見不善而惡出于天理合乎民  
彝太公順應之常也毀譽者將迎之偏見有我之  
私也黨同阿好逆詐臆不信物蔽其明欲損其智  
徇情滅性之變也吾心之明既有一定之是非自

無偏駁之毀譽語云無毀無譽若毀譽亦是非之  
心則是煦煦亦仁孳孳亦義據流衍之似不遡原  
泉之濁也意發于心意乖心累本於是非之心出  
於愛惡之意萌動僅毫釐之差發見實千里之謬  
也人言君子指小人為邪小人亦指君子為邪邪  
正昭然在人耳目而彼獨不信則私意蔽之二說  
不可易矣竊謂君子亦指同類為邪夫曾參雖不  
殺人殺人固人情所有校人烹魚子產嘆其得所  
校人誠欺而畜魚於池非理所無也然則人以情  
理所有之非加君子欺以其方必且見信豈必小



人毀君子哉其云賢必先覺是沉幾先物堯舜尚  
失之四凶三代以上固已難其人矣孰謂當今之  
世有能洞悉情偽而不惑者乎至謂人毋蹈可疑  
之跡必小有出入人乃增議無瑩然美玉而人指  
其瑕此言青蠅不點白璧尤不敢遽信昔直不盜  
金儀不盜璧二子之心非不洒然自諒其潔而卒  
買金償失其受窘辱如此其汙也當是時有不薄  
其人而耻其行者鮮矣此豈微有盜跡而人甚其  
罪乎疑跡必不可蹈則是瓜李之蹊必不可徑冠  
脫履解不得整且結也夫錢穀刑名藩臬所有事

猶行人必經瓜果之叢而繁枝觸之蔓徒牽之不  
容不整結其間自以不動柔順之欲則無媿矣豈  
能却所有事而瘳曠養清高之望乎是必徑必  
竇科頭跣足責諸衣冠之儒也可乎不可乎又謂  
誰復似某之枉是信張而疑直局於所知而未擴  
昭曠之度非所望於高明辨論議之得失別人品  
之高下察好惡之公私定進退之權衡維持世道  
贊翊 盛明 朝野冀望不淺不特知己區區之  
私也欲因請益輒復縷縷伏惟鑒諒

上督撫公



近得通報獲觀激揚大疏舉措一出至公好惡允  
孚輿論片言隻字輕重不爽毫釐表正旌良光寵  
有踰華袞某材同樗櫟質類駑駘力既倦於長途  
何堪鞭策任不勝乎隆棟誤辱斧斤信大造之鈞  
陶不遺纖細豈冗員之蹇鈍亦有微長不規四知  
徒恃素心未變無聞五十自憐白髮相侵每以棄  
置自甘何意引援猶及於是使處身突奧得覩白日  
之輝濡跡涇塗驀遇消波之濯爽心快目莫知所  
裁自今伊始將慷慨激昂奮厲功名之途回顧碌  
碌非所能也欲循常守故羈縻升斗之祿愧心冲

冲不忍為也進既無一可仰攀退且猝乏善計斗筭  
其量覆餗是虞庶豕何求林莽為快簿田數畝蔽  
廬一區眷眷故山時坐刀夢寐悠悠天關徒負  
恩私此實知止知足之積忱不敢矯情飾偽於明  
鑒也孔懷厚誼莫副心期永矢弗諼圖報何地

其二

恭聞海宇廓清奇勳峻茂光膺綸命晉陟保衡久  
上應乎文昌春宮啓沃復瑞騰於天柱紫極  
輝煌申重巽於楓宸允荐升於槐位秩齊元佐表  
三台心德之同寵冠文班投千載風雲之會慶均



朝野喜溢東南職等素辱鴻私猥叨屬末共濡波  
潤幸托二天時憶節麾神馳千里未遂樞趨之願  
倍增歡躍之私謹專後代申薄將悃款極知鄙陋  
混瀆崇嚴無任悚慄

寄孫蚤川司寇

曩者奉啓不虞猥辱華札嘉幣惓惓愛念不減夙  
昔此非近世人情也一登樞要不問故人蓋仕路  
常態矧蹇拙踈略自宜見擯有道門墻而猶憐察  
如此銘心刺骨何敢忘之某自甲辰歷兩郡六省  
奔走二十年崎嶇險阻不知幾千萬里惟兢兢畏

四知守三尺非有蹕絕之行瑰瑋之才能自表見  
又中遭擠陷益畏縮不敢吐氣伸眉獨懷枉鬱不  
平之忿時或頰赭發熱流汗接踵冢嗣既夭幼子  
孤孫方垂髫未解人事素不事生產作業僅守先  
世敝廬魚一椽半畝之益衰髮秦閔孑然形影時  
因秋風謂不動季鷹之思矯元亮之首豈人心哉  
欲借量移之使徐圖出處方今二三同榜皆當路  
鼎峙片言出口聲價百倍所謂有力者當其前矣  
在門下豈惜舉手投足之勞也惟 台諒之

寄毛介川中丞



伏自附驥迨今結兄弟之誼垂三十年屈指仕路  
十不存一吾浙稱最盛茲僅僅臨溪方崖疊川與  
門下耳鄙人盤桓冗賤亦復覩顏其間追惟夙昔  
感存亡之異世惜聚散之靡常相見能無悽心頃  
訝鄙人非復舊時之態即衰索可知上不能立德  
與言遵孔孟之旨次之殊偉之績藻麗之文聊自  
表見荏苒至暮何以為顏猶蒙不即弃斥寵以盛  
筵規之道論蓋誦習十年不如開導於一夕也豈  
無畏雖遺於五十而知非尚真於朝聞別來靜思  
既喜且懼鄙人入當紛拏都下又將走晉陽上事

瞻企光輝日遠不審爾是尚得聞性命之奧示操  
持之訣否爾行次彭城使還預布悃款舟子復  
命尚圖申候

寄高南宇司成

昨冬服役晉陽聞報榮轉門下守正不疑屹然山  
峙於狂瀾波蕩中視浮湛流止略無介於真靜之  
體此豈近世隨俗就功名者可同日而語往年奔  
走都門數蒙見過又辱探以岐路示以周行似若  
與意氣而維植之惜蹇拙而矜憐之仰承道誼肉  
骨之愛惟有感刻年來朝政維新人情士習頓改



縉紳間稍稍猶三尺謹四維矣更得慎修恬雅如  
門下一二耆宿同秉國鈞亟引賢良布列庶位即  
泰運可躋足待也某委瑣蓄縮自甘退保桑榆但  
庶幾一日為熙皞之氓是願是快爾走後代候不  
盡悽々

寄許茗山右使

頃還家不踰旬百務叢集如蠅所期放舟湖上與  
野老劇談終日竟不可得惟候督府赴公宴因得  
一偕笑語回思省中歡暢何可復得冗中既辱留  
款別日復勞遠送攜來珍品遍建同舟惠至溼矣

感倍感倍行次丹陽不自意有晉陽之報如得在  
兩月前可無勞後顧不在五月後何從便得推正  
也天道人事如循環然極則變變則通頻年鬻官  
售級盡出權門賢人端士動輒得罪即幸不譴逐  
亦棄置不錄誰能不受羈勒得騁康莊血汗鹽車  
困踣槽櫪凡幾何人矣宇宙不平之氣冲霄貫日  
彼安得不及於禍乎今時事一新鈍拙如某亦欣  
欣彈冠門下宜益快意滇南知不必行但安意需  
後命耳

寄王鑑川憲使



歲月同心倉卒分袂彼以乍聞訕詈憤懣難堪雖  
賢達傍觀猶冲冲為之不平况以身當之坐是草  
草為別長途奔走歷崎嶇涉風浪則知軀命重外  
物輕既入武林故廬無恙老稚歡迎則知倫理可  
樂當官多戚已又泛湖登山時熙地勝玩物適情  
較請東池西局冠裳束縛前瞻後顧惟恐失官常  
招物議雖忘形二三知己猶謹相戒期無蕘也則  
豈若此中葛巾芒屨尋幽吊古脫然無憂懼乎彼  
擠排傾陷焉知非造物假手以貽優厚前此怨尤  
盡已霧釋冰消惟懷人感德馳神數千里之外不

敢忘耳勉留之報寔出意外顧跡危心怯進退維  
谷但亟自引退庶可遂初心免後議已專疏北去  
倘幸得遂即野麻適豐草之性倦鳥安故林之棲  
衡門之下樂事備矣青雲故人會無期矣猶冀惠  
問山中也

寄陸省郎小峯

昔人謂人生相知貴相知心略形骸忘爾我遇坎  
窞不疑聞流言不信故管仲身冒貪忍不忠之跡  
而鮑叔能諒其心以為各有所為百世之下語交  
誼不過是矣是所謂知心者耶某鄙陋迂踈省躬



誠無一善獨兢惕四知持循三尺庶幾無悖官箴  
迺萋菲之言正攻其生平所自恃嗟嗟人情殺人  
市虎理本可欺則惑矣誰復諒不肖之心如吾門  
下者哉都門經月每辱相過輒論心道故夜央忘  
疲甚者執禮過謙餽遺逾厚察門下之義真若諒  
其心略其改不減昔人知我顧鄙人無可見知每  
一念至未嘗不赧顏汗背感激銘鏤時刻難忘也  
別來奔走未遑寧不自意復有秦藩之後吹嗟汲  
引知出門下居多行將冒霜雪歷崎嶇捧檄惴惴  
恐後南望故鄉能無兒女之念也區區之意殊不

能悉

其二

夏初得手教體念周悉既不准令謝事又溫詞誘  
獎移文撫按以飾媿赧之顏且銷邪比之私皆非  
意念所敢及也屏居五月庶幾量移已不可得度  
明命漸久又不敢偃蹇恣意不得已冒暑奔馳烈  
日紅塵之中經月甫至以厭苦煩懣之餘當登涉  
勞頓之極憤心病體兩不能堪嗟嗟小峯知耻自  
愛某亦嘗奉夙昔之教矣今將若之何哉左使之  
轉知出委曲造就敢不祇承但自以心性行餒欲



伸眉吐氣滿積宿之弊振頹靡之風如前日徑直  
安可為也苟且偷惰竊祿自全生平賤惡不忍為  
也晝夜思惟展轉至廢眠食以是病久骨立萬不  
容已再草一疏馳上更乞走見相公傳達苦難情  
狀必得優允放還幸之幸也某先人敝廬僅蔽風  
雨有田二頃可繼饘粥一子二孫二三年間向平  
事畢將黃冠白袖蕭散方外安往非適意處寧能  
俛首鞠躬視眉睫聽指揮以蒼顏白髮老人尚效  
小兒曹受村學究約束邪恃愛縱言及此然悽悽  
無仰不堪之懷不能盡述也

寄黃司寇葵峯

某委瑣蹇拙才本不堪致用行復不能隨時蹉跎  
冗賤垂三十年中遭宿釁之人橫羅不根之辱左  
官入蜀深切慙惶自惟投杼之疑雖慈母不能釋  
然於賢子矧分隔於尊卑跡睽於踈迓者耶眼後  
臺下曾未幾何詎意薦揚之章謬以充數因之增  
價遂獲遷寔由臺下昭明博大越拘攣之見秉  
衡鑑之公誤信而不疑也閩中期月出荆入棘曾  
不遑寧式瞻槐府未效寸敬已又歷晉授秦狗馬  
之力猶龜勉在途鷄鸞之翎已厭倦思息終知上



負知人之哲矣茲聞榮躋八座寵並三台振起肅  
清之風贊翊維新之化

天眷彌隆 台祉駢茂矯首廊廟企仰何窮

寄黎子欽叅伯

都門一別忽焉五祀受粲深情永懷弗諼劣弟直  
躄無術拙於處世進咫尺盤桓藩臬十餘年六  
省所經岐路崎嶇不知凡幾萬里塵緣難割薄命  
宜勞每一念至未嘗不懊恨歎息終自哂而莫知  
所裁吾丈高朗明哲當位望之方隆輒抗跡以遠  
引何啻鵬搏鳳舉回視鳧群鴈隊就懋籠甘荼養

真霄壤矣此中心愛慕媿服非敢為佞也遠隔不  
知行踪向稽申悃慕承翰貺依戀彌增惜不能縮  
地攜手傾倒稽累之衷矯首節鉞川雲時時在望  
願為世道斯文順綏多福

寄李侍御

其材本委瑣行乏䟽通冗賤盤桓蹉跎遲暮曩昔  
閩藩之役即已厭苦自弃何幸獲遇明臺曠度海  
涵靈心燭照懸不塵之冰鑒持有定之瑤衡表正  
旌賢繩回瘴惡一時舉措誠快清議而愜人心矣  
鄙陋如某何意亦辱龍門是猶愛玉不必無瑕賦



奕慶書畫錄 卷八  
七  
硃亦豪善價掄材不遺既朽樸檉誤登明堂身非  
木石豈敢遺忘每附心注念未嘗不感伯樂之顧  
惜槽櫪之拘激切思奮而猶惶悚未能也昨聞再  
起蘭臺輒緘書都下至則使車預發僅隔旬日悠  
悠積累之忱竟未及通左右自是力疾入 覲卒  
卒東歸木幾復撫舊地時屆秋防躬軀遠戍回思  
既晚餘榮寔本當年汲引懷德揣分益切惓惓遙  
想節鉞星臨所至春溫雷厲草樹回錦江之色輝  
光開玉壘之雲彼中士民曷勝欣幸某叨忝知厚  
百倍恒情顧久遠師資日益錮蔽責任稍重愈見  
彌厚矣

綿薄尚丐訓言俾得持循勉少副心期



卷之十九

奚囊蠹餘卷之十九



國家圖書館, NATIONAL CENTRAL LIBRARY, TAIWAN, R.O.C.



奚棗蠹餘卷之二十

書

上內閣相公

某竊祿關中無分毫裨益兢兢奉法循理供後不  
敏錢穀是司所關心過慮者亦僅僅計量盈縮構  
事兩月見其中有關係安危分不能轉移者輒敢  
直述一二奉恪采擇倘蒙垂察而留意焉實西上  
之幸也謹按秦中八郡惟西安鳳翔漢中猶為善  
地今錢糧出辦亦全賴之延安慶陽平涼臨洮鞏  
昌皆密邇虜患民窮土瘠額征錢糧拖欠累歲雖



嚴刑峻法終無完期以是貯積空虛軍需每缺一  
難也近年自增絨服之供歲率費銀六七萬兩正  
項織造銀不過萬兩餘皆補湊欲加派則民不堪  
那移借辦每每不繼二難也邊境素無畜積虜已  
熟諳往年犯涇邠犯鄜延入中國數百里不厭其  
欲獨垂涎涇陽三原使虜得逞即大防撤矣防守  
固不可一日懈今額該給軍之資京運歲該七萬  
餘兩秋防正急戶部尚未發解萬一軍中脫中內  
變可慮三難也境內各王府祿糧秦肅慶雖漸加  
於昔數猶不多唯韓府宗室日繁歲供至十三萬

兩積欠至五六十萬兩每歲以諸項湊補大略十  
僅得五呀饑號寒含怒畜怨上年已擁衆辱撫院  
毆郡守矣此後不處將不止是四難也四難之中  
韓府之事尤亟往年題有 欽依闔省賍罰皆聽  
截補祿糧今部劄紛紛猶謂各衙門賍罰不許存  
積上納事例不許停留悉以解部是絨服軍儲祿  
糧所謂湊補者何賴恐各鎮官軍之變韓府宗室  
之變不在數年之外也今撫按以皆有績奉 欽  
依不敢抗疏隱恐釀禍異時誰當任其咎者至於  
各邊兵威不振蓋自昔已然今幸虜入無所掠欲



有所掠必在深入深入則往返途長人畜水草不利火不償得頻年虜患不大以此若使連營大舉各鎮之兵必不敢撓其鋒始至惟擁兵傍伺出掠輒引避自保迨去又徐施其後求免損軍折將不蒙吏議是卓然虜猶計慮萬全知有兵也稍知忌憚但不宜分各鎮之力使疲勞道路有入衛京師之名失捍禦諸邊之實也今各邊既分兵入衛必抽腹裏之兵以補缺額腹裏既虛又招兵以益防守於是遣發有盤纏之費動調有行糧之費招募有供裝之費一軍數以千計即費以萬計是調兵

募兵之議起而邊境腹裏皆困矣今幸時事漸康莫若遵復祖宗舊制盡撤調遣之兵稍做二十年前事規責成巡撫兵備官各將所在衛所嚴行較閱力不堪者易以壯丁數不足者聽其召募務足原額技不精者立法教習務令精強始於京師達於各省民間團結社兵如浙省近日之法責令有司覺察聯屬其心有警則軍民併力驅勦勢果不敵就近調發庶幾人懷內顧家自相保較諸自遠調征若秦越人之不相顧也固不同矣今請罷入衛之議職已上於撫按倘幸得請即每歲可省



數萬費恐終隱忍未敢明言且邊兵始抽於營聽  
擇良馬輒以疲力易之名曰捨父臨去屬其妻子  
於人即為其妻為之子名曰提養捨父行邊無馬  
矣提養行兵無家矣公法人情兩不能堪妄議謂  
宜留止入衛之人令其携家常成遂室家之願於  
彼收糧扣此原衛之供可以別募一役無復更番  
之擾馬亦就彼查給可無捨父之弊兩地皆得充  
實營伍人馬獲免道路疲勞似亦一策也

其二

自晉投秦已歷春夏御念國恩瞻依台範無時能

忘廼畜縮囁嚅口欲言而不敢上達者將仰體獎  
恬抑躁勵士維風至意寧蹈踈簡之跡而不忍違  
肅清之化也今者門下秉鈞軸代 絲綸已朞月  
矣始馬仁賢正士踴躍以喜繼而儉人駭愕以懼  
終之各得其所喜者益堅志飭躬懼者亦心悔面  
革今且喜懼兩忘士習定而風俗回往昔飮聞三  
不朽之訓門下一身兼之宗社斯文幸甚然某竊  
意門下尚有未慊於心者夫革苗有德而羽檄猶  
馳安民有政而瘡痍未起經國費則內外稱匱振  
軍旅則荆棘滋生誰謂禁苑容與之巖旋軋轉坤



之運能頃刻而置於懷乎嘗見居肆之工十人所就一人毀之有餘十日之所毀未能亟成於一日也為政在人取人以身門下既誠心端本矣願優游以需成化急則煩苦而難齊敢以是代芹曝之獻

其三

方竣秋防輒蒙改役又甘狗馬寧辭驅逐之勞素分拙踈不憚勤劬之補誓圖尺寸夙夜未遑荐辱恩私慙惶莫措伏念官名廷尉職在詳刑清欲如淵平須似石宜得習律令如朱博秉廉貞若傳賢

庶幾執憲可與無究平民亦以弼教委瑣多過忝竊奚堪卑恭不類釋之誰相引重經術如何定國自量魚禪信雷電之章明不遺盆覆致陰幽之稿朽亦灑春陽敢不益淬初心勉期後効叅法比之未議時宣欽恤之仁感知遇之非常求砥生平之節

其四

兩領溫諭尋得部檄仰荷慈愛終不惑於彙詞大造竟并包乎弃物君天和地等高厚之難名沃萎沾楛信生成之有自拊心感泣稽首慙惶念某



學術空昧命途蹇薄才非適用行每招尤一罹往  
歲煩言已甘退伏再違茲辰誓詈敢望優容方思  
初服故山恨蜀環之無日何意積愆累罪咸垂鑑  
而不凝豈以任賢不一之公誤采寸長片善抑亦  
人作求舊之念私憐益壯益堅犬馬有知猶懷報  
效迂愚無似敢昧生平三十年慎飭陋躬寧渝晚  
節十五任虛糜厚祿忍負明恩謹自鐫銘莫申祝  
頌候代未能離任馳後預上謝忱外論密事敢不  
仰承其人世居河西離省二千里而遠羈縻夷族  
部落萬余衆之多忝頗驕揚今已病廢積勢既重

非可易圖且密邇強胡本其種類苟懷異志勾引  
非難似不應泄謀於散漫難合妖邪借力於中國  
烏合羣醜也頃聞川省公移言亦草略無當重大  
情節止聽口傳竊恐泛及衆而貽害遠何以安反  
側而保生靈即如某某系出晉之陽曲誤稱秦之  
扶風昆弟三人謂為五子語皆失實事碍施行鄙  
言或有可采乞下本兵熟計彼於兩地無不詳悉  
議定速行寢秘其說不使風聲漏泄致啓群疑機  
事稍踈激成他變地方幸甚

其五



歲裏交承即已具啓馳謝入境誌謝時事山徭海  
寇縱橫四出獸聚鳥散叛服無常蓋自昔仁化之  
所不單成武之所不讐由來非一朝夕而於今為  
其則以兵力日薄兵食相須而頻年財用匱乏計  
歲入之數不足以供額設之需即有調遣又將何  
以為計今海寇之黠莫曾一本若頃徵三叅將之  
兵備四萬之費主帥不親統領衆將各一其心夫  
律喪師損威虛費欲再整已無備矣不得已調取  
四鎮俞大猷前來暫攝東事頗聞將士歸心賊亦  
示憚日下理舟航括糧餉中嚴號令查覈行伍至

日將併力滅賊不敢不殫竭心力仰答明命但恐  
洋巨海追逐良難成功與否不敢逆觀也某未諳  
軍旅况值衰年竊恐懷恩圖報之心不勝罷憊委  
靡之氣貽誤負乘慙負任使此某所為薰心刺骨  
廢棄志命遲遲莫知所措者也尚望廟謨指授使  
知遵承幸甚

其六

某入境暫止肇慶專意東方二旬後乃抵蒼梧猗  
承明命恨不朝滅賊而夕就食顧事有難於猝  
效未敢刻期也兩廣軍務大略藉兵於西資糧於



東東素無兵西兵又不習水戰故前此驅而出海者皆懦弱不教之人三叅將各自為謀原無紀律總兵官遠在潮惠漫不綱維曾首醜類本吳平之黨桀驁有年出沒波濤艦舸之間尤極便捷以此素怯之氣加以不齊之心當彼慣嘗之雄共出必死之命其為勝負不待智者而知兩被挫折悔何及已今俞大猷已至計欲萬全前轍是戒但須假之月日將為不可勝以待之且下整搦舟師度賊又將東驚隨所向往嚴督併力視後舉爾某臨事無策極知非才惟有朴忠天日共鑒伏惟憐察

其七

待罪南粵憂危移日習見時艱詢訪故事信嶺表自為一天風聲氣習變異他處人嘗謂兩廣盜如落葉隨掃隨落蹊徑無光潔之日真切喻也良由滄海渺茫林箐深遠易以伏匿難於驅除人本恣悍株引勾連一呼四集又聚散倏忽暮而剽掠不知其為民朝而耕犁莫辨其為盜何忌憚而不為然自明興以來假借名稱雄肆山海者幾十百人矣卒罹鋒鏑正典刑小者捕滅大者征誅率無苟延五七年者而卒不戒則其性其習信殊異不



可解也方今東省山猺水寇縱橫雜遝雖殺戮無  
虛日而亦不知畏其尤黠悍者曾一本頃緣主將  
不統兵偏裨持異見我軍氣習虜得長技失律喪  
師本自輕敵寡謀非必賊有勝算也此時聞巴東  
驚潮陽本賊故穴俟其定泊然後可徒俞大猷力  
任其事將士舟航稍稍整搦一鼓成擒尚籌畫於  
萬全之後度此釜魚鼓鬣終當就烹不足禦 廟  
堂之慮但西省亦苦山賊俞將之東也議者謂為  
耘人之田意不甚愜不知大征之費非二十萬不  
可近歲軍門糧餉不足供額設之兵二省貯積皆

匱無已將 請發內帑審時度勢尚落落難合料  
酌緩急豈敢顧彼遺此蓋撫按各有所重總督兩  
地關心意見不能盡投也至如嶺南有始興二源  
遺孽嶺西有羅旁潑水負固府江有兩岸峒寨出  
劫海上有林道軋輩數夥妄意好生惡死人所同  
心此輩誠愚豈無一隙之明亦由互相疑畏招者  
每誘而殺之縱欲悔罪向化不可得今將責成合  
屬寬取間諜之人往示 朝廷威德又值 新皇  
赦宥萬方無論盜賊犴獍悉聽撫處為兵為民各  
適其願深山窮谷自安耕鑿者苟無犯於地方悉



不加征遠近並許自新開誠布公深懲既往貪功  
殺降故習稍稍有見信來降者縱不盡然姑以養  
威蓄銳俟恩信既行察擇強梗間一出擊即力併  
事專庶可示警是或一道也頃聞譚二華有薦進  
俞大猷共事之跡此時方區畫勦賊將士帖然心  
服賊黨畏讐求降一月以來鼓舞招來漸可幾望  
成效蓋其人久習水戰老猶矍鑠若即取去則有  
臨敵易將之忌地方益無所恃縱使郭成粹至安  
能遽諳地利得人和如此賊益蔓延不可收拾矣  
展轉思惟萬不得已具疏但乞暫留終此宵寇之

役必不久淹以妨京營大計也伏乞乘察百凡而  
望指示迷惑俾得持循某勉策駑鈍終非素諳未  
效涓埃忽忽頓衰多病伏惟 憐察欸悃延佇  
台垣不任瞻仰

寄孫侍御

僕忝辱龍門托知厚於大賢十年矣非特感汲引  
之仁受規誨之益若尋常監察藩臬意氣相投而  
已寔仰企砥節礪行弘道績文有兼濟之才而藏  
之以靜具大受之量而執之以貞蓋中心悅而誠  
服竊異不日躋華陟要將為世道斯文慶幸何期



道人莫容求全致毀聞報之日真令驚駭狂叫既  
憤懣而難平卒慨嘆而短氣也頃奉教札始知釁  
端在彼蒙議有由何言何言然毀譽無與於身心  
出處素定於命數達人遠覽當付之大喙枕泉漱  
石攬紹綸之具舒吟弄之襟宣諸詞翰載諸方策  
所謂不朽之業以彼易此明公以為孰軒輕邪僕  
與鑑川亦嘗被口語每相對輒取以嘲笑吾兩人  
者固自相信在明公能無信此兩人者邪屈於不  
知己信於知己古之聖賢豪傑亦僅以自解爾豈  
以高朗如門下有不釋然大喙者哉俗吏多冗不

盡欲陳伏惟鑒諒

寄揚中丞幼殷

某自束髮誦習孔孟思欲飭行修詞進思徇馬之  
功退不失枕嗽之潔視富貴利達藪如也一入世  
網浮沉二十年生平意氣銷爍殆盡取嘲笑於山  
靈呼馬牛於兒稚譬之馴鶴甘稻梁秦庶飫芻梗  
循除伏柵人見其可侮可賤而不諒非其所樂悲  
夫何意高賢獨鑒其隱時時感念竊聞上書

新皇宜有微言大略足以格心意善政治昔人所  
謂副毅正直守之以寬忠恕仁厚發之以義要在



有所感格非夫個儻矯異非常驚詫之論逞辨智  
以塞言責而已 天閣尔啓 王心冲融未有定  
向不當汨以紛紜榛雜之言是非攻擊之口使玩  
易淆惑成不繹不改之習門下歷覽諸凡書疏能  
無意乎靜思及此便欲鼓吻嚙毫一效區區而漕  
務敝壞至極殫精竭力尚無分毫之益寧能伸其  
意志為芹曝之獻附有道之末耶慙悚羨服併切  
於衷造便附上 興居中夏漸炎惟 為道珍重

其二

西鄙枉辱教札尋有棘寺之報代者數易經年始  
得釋負再依龍鳳之光叨厠臯夔之後進二司寇  
重習舊聞謂能勉稱其職未幾出鎮再領重計寢  
食不遑未緣布悃預履愛念珪函遠使開示肝膈  
言本蘭如誼同金斷鄙陋何敢當然不敢不勉五  
臺銳意品藻過於自信所諭偏拘誠不盡無然瑕  
不掩瑜瑩然之本體自在謝請託絕朋昵不畏貴  
近不避諛嫉卓然以世道人才為己任此其心真  
切果確可以質神明貫金石大略舉措當人心快  
公論嘗多一二託異乃其篤信本心或誤中人言  
又未有逆耳力攻其偏者以是直行不疑因之歛



怨速謗不得免爾悲夫知人聖哲所難何獨求全  
於彼哉略迹而諒其心欲何為也假令善自為計  
循繩守墨不激不忤奚不相容而必伸其意志如  
彼可謂工於謀國拙於自謀已往聞校南之日值  
歸德盜起輒為檄支家僮入賊中諭令悔禍時賊  
辭已成家僮竟以遇害平生任事諸如此類今其  
歸吳初服故園盡捐物累有超然物外之意用捨  
毀譽應無介於其懷亦惟知厚信之不足為他人  
道也

寄冢宰嚴公

某仕為冗賤久乏功能歲易蹉跎徒慙廩祿頃奉  
雍秦之後已及衰遲夙懷兢惕之心恐踈砥礪獨  
緣迂愚無術益以質直不阿坐是取憎因之多口  
信若人言指謫即竄逐有餘辜仰賴衡鑑公明在  
隱微猶見察蠲彼私惡慈母釋投杼之疑洞悉物  
情容光照覆盆之下破尋常之議示殊異之恩使  
既涸之鱗沾清波之沃已摧之朽回大德之生非  
木非魚能忘再造高天厚地僅比弘庥莫宣感激  
之悰願祝崇勳繁祉緬思報稱之日祇先鏤骨銘  
心願當楚懣之餘遂抱虛羸之疾疲馬非魚高軒



之戀局趣不前倦鳥欲安故林之棲羽翮難振謹  
馳短疏敢乞歸田詞本由衷情非得已仰祈垂鑒  
終望曲成

其二

頃方具啓申謝即有論劾之報積行不孚動干物  
議取譏乘負貽辱龍門罪死罪死然某之鄙陋粗  
率非有加於前而感激振奮不敢懈於後也服後  
未幾防秋無警竊為地方慶幸何意新進喜事反  
謂無事為怯徒以一人之毀為據不顧生平之修  
積堪憐苛禮責人黨同求勝夫復何言三尺之童

猶知有耻某誠不肖亦嘗克勵於君子之塗承誨  
於大賢之側矣寧能緬顏忍辱詆排至再尚不墜  
青雲之志邪濟濟在朝罔非夔龍稷卨陋如其  
豈有涓埃可以塵汗海岳敢履大造垂神無已肝  
膈情私惟乞優賜歸田退保桑榆於兩湖三畝之  
間幸甚幸甚圖報未盡之忱山中無事不敢忘芹  
曝之獻也

寄余德甫憲伯

奉違良久南北渺然不能通問緬憶閩中以夕晤  
語歡然忘形雖同寅結誼維均而吾兩人尤相厚



善以共攝武平出入之踪跡政務之閑白風晨雨  
夜之追逐兵戈擾攘之憂勞時靡不同門下精明  
練達博雅弘遠鄙人十不及一迺涵容誨迪使得  
苟延二載終掩其瑕以及于今皆至德盛惠何敢  
諉也頃古原來按閔中傾蓋如故當訾議洵洵之  
時既體察其心任棘院使令之役又憐恤其病獎  
借維植真若惜涸鱗而亟欲沃之清波此豈借視  
於耳信風鼓柁若近世拘攣之見耶詢所由來皆  
出謬譽得間常品藻之言深信不惑念鄙人何有  
片善寸長上塵知愛如此古原之還正防秋遠戍

不及把臂青門遣後馳送因附此代候緬想閉戶  
著書棲真游藝逍遙物外眇逐逐塵埃之人猶不  
暇瞋白眼及之矧復牽情於毀譽得失之既往者  
哉望示近作以開茅塞

寄郭一臬督府

恭諭秋防事竣節鉞榮旋范老甲兵素制三軍之  
命令公膽略久宣單騎之威是以數萬黠胡竟遏  
南侵之火豕然且重圍主將克全東伐之熊羆夾  
擊僅及於柳門祇清漢界窮追不踰乎明水何異  
周師彼鎮靖一矢之亡本期射雉在郟延千里之



獲幸已無禽喜動旌旄騰士馬某夙塵末屬近  
被餘輝禮宜躬迓遠郊奉揚茂績遠奉傳來成命  
輒敢過行敬循自昔之規聊將不腆之禮專官代  
獻用表賀忱尚冀照存併原不備

寄郭東野閣老

伏聞年伯捐弃祿養厭世仙遊門下暫解鈞衡式  
遵典禮某叨辱驥尾誼均猶子曷勝驚悼遠後西  
鄙不能匍匐奔吊積懷未安繼思封極崇階壽臻  
耄耄備人間難得之福沐 清朝寵異之恩在老  
伯固已忻慰重泉命世人賢功垂宇宙生有鍾鼎

之養歿貽竹帛之名在門下復何歟於純孝也尚  
冀為道為 國以禮制情上副 聖皇眷倚之隆  
下答士民屬望之功

其二

往歲拜謁 禁苑語及被論謂幾欲為某泣下某  
何人也敢當斯誼祇啣結於衷頃見邸報二三元  
老皆有煩言事出意外豈此 聖明之朝人情論  
議猶紛紛不可齊耶仰而思俯而嘆真令短氣悽  
心已聞溫綸留慰辭至再而 聖眷益隆則知上  
天有意啓迪 聖心猶將乘文泰之運垂平治之



休也踈逃無已之心惟願五嶽同其高大一德孚  
於 聖神勿撓箕頰之思共翊唐虞之化  
朝野瞻望均切非直厚昵之私也

寄冢宰楊公

恭聞令嗣首擢武科喜溢縉紳光增 廊廟文雄  
武傑萃集一門此宇宙清淑所鍾 聖世禎祥希  
覩可以驗碩德之格於天而積慶之昌於後矣遠  
羈嶺表不及樞趨門下又不敢以尋常禮幣溷瀆  
惟有欣躍企羨之心囁嚅難已爾某虛糜厚祿秩  
滿無績可考又以多病廢事討賊未即成功皆亟

宜斥去仰仗優容題覆兩荷 恩綸曷勝感激又  
手札責以大義益增跼蹐然豈敢推事避難忍忘  
繫稱實抱大馬之疾恐負重大之寄死無益於事  
也頃已謁勉東來造舟募士雖稍稍集終倚俞將  
率師南下庶勢順力全數日閩省兵船已入潮夾  
擊幸而功成則已萬一賊復西遁即省會雷瓊皆  
為危急造舟既不可坐費月口舟師不集則將領  
怯於航海非得暫借彼中見在之船何以為目前  
追逐之濟計無所出乃敢疏聞先已一面移文彼  
中知會議者每謂但練上兵自可足用此所謂三



年之艾在今固當預畜若借力求援以消醞釀之  
毒則蕩滌黃蘗之劑又急攻之不容已者也統惟  
鑒察

奚囊蠹餘卷之二十終

重刻奚囊蠹餘後序

奚囊蠹餘太冢宰元翁張公所製其名乃公所自署也公歷任中外凡四十載所至徹有詞章因物以達意即事以道情如風行水上自然煥發直當與三百篇嗣其響者公乃納之囊中不欲傳播然而理邃者其辭華實



勝者其文著洋洋乎為天下之至文  
固非囊之所能終秘也陝廣諸公梓  
以傳世道明肅讀服膺久矣時隆慶  
壬申冬承乏廬陽廬之士夫進謁知  
其有公文也爭相借觀咸曰我張公  
治吾廬懿德清芳深仁偉績經濟與  
淮淝並潤行誼與金斗齊暉是以去

後見思立碑留像今誦公之文如覲  
公之面也復相與丐錄之余因謂之  
曰公離廬郡後補我大名道明叨侍  
門墻深荷鈞陶公兩地而治同時異  
而化一徵諸人心碑以頌德祠以繫  
思先後如一轍也惟茲誦公之文章  
又監公之治法道明何幸甚也哉遂



出此集凡二十卷付公門下太學生  
王教詳校正之壽諸梓氏以慰廬人  
之請抑此特其一班云耳他如時義  
之錄可以觀教育三應之編可以觀  
仁誠臺省之疏可以觀忠智公上孚  
下洽人感天應翊助

成世若唐虞統百官均四海則明良喜

起都俞賡歌復見於今日公之文與  
世相為流通悠久矣刊成爰僭一言  
於簡末

萬曆元年孟冬吉旦知廬州府事沙

麓門人吳道明頓首謹書



奚囊蠹餘跋

陝西布政司左布政使李敏德撰

撫臺張公嘉靖乙丑拜中丞之

命拊循全陝德適叅佐藩政備門下屬  
員時覩公製作若天機仙錦鮫室神  
珠誠希世珍也誦法之竊已幸矣然  
而篇什未多也今隆慶辛未公起大



司馬再至開府德以今秩復濫任使  
暇日偕朱大叅卿李少叅江固請全  
帙以傳公始出囊中刻本眎之為詩  
文者各十卷相與誦之譬之陟岱嶽  
之巔而快覩青冥星輝森嚴探滄海  
之奧而縱觀淵藏寶瑞錯陳未易辨  
識而名狀也豈不至幸哉遂付梓人

刻之省署閱月而事竣颯颯乎洋洋  
乎其一代之盛雅哉即漢之顯門唐  
之大家未之或過也嗚呼是可以羽  
翼六經矣後學終身法謂不在茲乎  
是帙也公鎮兩廣時曾刻于蒼梧然  
公宦跡所至獨秦中久今秦中人人  
能頌公功業而文章末由覩焉秦人



之情可能已哉公奉

綸簡晉右都御史將之留都矣刻而傳之蓋重以慰秦人之情不但嘉惠後學已焉耳

隆慶六年四月朔日

刻奚囊蠹餘後序

公德業文章踔躒海宇余自筮仕竊聞之往歲以理驛傳事如杭甫下車輒被容接嗣是官府無公跡訊所事日惟獨棲精舍頓遠塵囂圖書四壁而已得景則暫憇湖山以適吟咏余益切嚮慕間嘗竭誠造廬以後進



未敢率爾扣所有也無何起公撫全  
陝比余督關中學得備屬員朱祇承  
德意公政先仁恕事挈要綱藹然春  
噓沛然雨化百寮喁喁焉若臨師保  
然吏卒慄慄焉若畏神明然士民依  
依焉若戴父母然德風遠播仁澤旁  
流未期月而

留都中丞之

命下矣行將從容

廊廟整頓乾坤執此以往何有蓋自是  
余始得法公政事矣時藩臬大夫進  
而請曰文章政事相為流通公五入  
關人心思公政奚啻粵中寧獨以其  
文膾炙粵人口哉固索乃出名曰奚



囊蠹餘詩文凡二十卷雄渾悠雅陶  
寫性情閎肆精深發明理道抽肺腑  
絕煙火裒然自成一家體若乃忠誠  
貫金石節操凌松栢境融逆順機握  
盈虛幽協造物而奪之柄超時網邁  
樊籠飄然鳳翔千仞氣象又往往見  
于辭外蓋自是余始得誦公文章矣

已而余將從後延安入辭丐以誨言  
公曰人心于五行屬火不善養則易  
熾即喜怒哀樂鮮能中節其嘗灌溉  
以義理覺心田滋潤而應用為有力  
旨哉斯言直探本體余何幸而得聞  
所未聞哉蓋雖堂屬分嚴未窮辨列  
而公心學淵源亦庶窺其梗概云夫



文章華也政事實也道德本也本弗  
固實弗大華焉用為乃公義理沃心  
默契道妙敷而為事業煥而為文辭  
可不謂本實敦而華自茂者非耶刊  
既成余謹序諸篇末使後之觀是集  
者以邇其所謂實與本焉而公之德  
業文章一以貫之矣

隆慶六年四月吉日陝西按察司提  
督學校副使劉友誠頓首謹序



刻奚囊蠹餘序

古之為詩人人而能言之初無顯名  
之家下至閭巷田野之賤其所歌者  
往往感發聽聞而關乎政教故季札  
能言列國之風亦以所言出乎性情  
攷驗者有所因而辨其俗此道變於  
漢以下其間騷墨之徒擅材爭驅體



法顓門以詩賦名家者接武而起其  
病在抉奇挾氣傲世調俗嘲侮造化  
題品萬類使後來之儁希附流風引  
脰掉吻睥睨叱咤甚至準體肖字抵  
掌優孟履亨順而有餘悲富盛年而  
傷揉落槩於詩家之道未得其似先  
得其病然此惟材高者有之而近習

尤甚故昔人評詩上下千年間獨無  
憾於晉之陶潛非謂其言出性情而  
有古詩之遺耶今讀

大司馬元洲張公之集必知其為有  
德者之言矣蓋公夙稟異質書無所  
不窺奮迹東南裒然為人士之冠冕  
釋褐以還逾三十載足跡所窮幾遍



天下所至輒以道德文章為陶士宜  
民之具其雅操大節不能與世浮沉  
宜其德性之醇深而言之可觀如此  
今集中所載群體派分而殊貫嘉言  
颺發而霞舉短章大篇成聲合節自  
漢後諸家所以名世者無不會其精  
駁以鎔裁於無迹若廼雕擬不施性

靈洞見方諸元亮天趣雖同而制作  
之該倫違會之昌隆勛名之駿烈又  
元亮所不能兼者昔王維柳宗元卓  
然為天寶貞元之鴻筆聽其言非不  
瀟遠有致惟名檢凌遲而言有餘辱  
如公之因物寓言因言明志不惟不  
蹈材高者之病即古今能言之士何



以加之竊謂公詩不當與櫛字飭句  
刻鵠效顰者共論直當追三百篇而  
嗣其響使千古之下知言者起想見  
公之德業必於斯集乎攷驗矣公今  
開府二廣總文武之憲綏馭既暇出  
次往作莊大叅應禎借夏僉憲道南  
謀佳胤請梓而傳之欲與功烈並永

顧佳胤識陋無以窺測閣深居嘗獲  
公隻語寸墨藏之甚珍不意今日縱  
觀武庫之富而更得托一言於簡末  
佳胤之生豈徒也哉

廣西布政司左叅議銅梁張佳胤頓  
首謹序



奚囊蠹餘後跋

孔子曰游于藝文公先生釋云游者  
玩物適情之謂夫玩天下之物以適  
其情則物不在物而在於吾心繫於  
吾之情是為吾之真明而大觀之道  
備矣然今之奚囊蠹餘之作也其亦  
聖人游藝之旨乎我



大師祖元翁道妙聖賢辭合今古是集  
之作乃在四十年間茲再翻刊者我  
廬郡大岳牧豫翁吳公也命教較正  
既梓矣即今公之文章布海內相業  
在

朝堂豐功洪休勒金石而傳萬世緣此  
可以窺其一斑云爾是豈流連光景

者可得而道耶爰囊數語於末簡

萬曆元年季冬吉治下廬州府歲貢  
監生門人王教頓首百拜謹跋



